

## **Matiu** **Meng solian ti Jises tataiai Matiu** **Kakain ti haxewai tenen meng** **ie**

Matiu tel aposel tai tenen meng solian ie sai ahang 35 muhin ti Jises moih aliawa ape Haeu waxi i hani tesol tonan. Matiu axan liai tenen Livai. Pupuasan waxiai moni ti teka akikin Ju hani teka masiwi ti Rom. I lioi tenen puasan ien ti Jises kilamiwa i tel ti tesol huopanim hua aposel. Matiu tai tenen meng solian ie nake pahan i haxewa hani teka akikin Ju ka Jises i se Krai tetel laha to atetengi na Haeu taloma. Teka masiwi ti teka Ju laha kum aile ukek ka i tel Masiwi ti laha. Aile ape leili tenen meng solian ie Matiu uke hina kakain ti teka kuluiai kakai Haeu ti imat taiwen. I haxewa hani teka Ju ka puase Jises i hapoponowi hawane waliko ti Haeu namiloiwen i aile hani teka seilon. Matiu tin i tai hahaxewa ka teka na laha sohot kahikahi Jises, Haeu neini laha ape laha hatesol se akikin ti hahitake axe Krai.

*Teka matahaun ti Jises Krai*

*Lk 3:23-28*

<sup>1</sup> Ie se sale nenex ti Jises Krai. Jises Krai i nakuama ti David a David nakuama ti Abraham.

<sup>2</sup> Abraham tel tame Aisak,  
Aisak tel tame Jekop,

Jekop tel tame Juda ma tesol ukalan.

<sup>3</sup> Juda tel tame Peres ma Sera, tinalalu Tamar.  
Peres tel tame Hesron,

Hesron tel tame Ram.

<sup>4</sup> Ram tel tame Aminadab,  
Aminadab tel tame Nason,  
Nason tel tame Salmon.

<sup>5</sup> Salmon tel tame Boas, tinan Rahab.  
Boas tel tame Obed, tinan Rut.  
Obed tel tame Jesi.

<sup>6</sup> Jesi tel tame tel masiwi David.  
David tel tame Solomon, tel tini Solomon  
tetel axoi Uraia axan Batseba.

<sup>7</sup> Solomon tel tame Rehoboam,  
Rehoboam tel tame Abija,  
Abija tel tame Asa.

<sup>8</sup> Asa tel tame Jeosapat,  
Jeosapat tel tame Jeoram,  
Jeoram tel tame Usaia.

<sup>9</sup> Usaia tel tame Jotam,  
Jotam tel tame Ahas,  
Ahas tel tame Hesekaia.

<sup>10</sup> Hesekaia tel tame Manase,  
Manase tel tame Amon,  
Amon tel tame Josaia.

<sup>11</sup> Josaia tel tame Jehoiakin ma tesol ukalan.  
Tataen ien teka Israel kalabus hani Babilon.

<sup>12</sup> Muhin ti lato kalabus kewa ti Babilon:  
Jehoiakin tel tame Sealtiel,  
Sealtiel tel tame Serubabel.

<sup>13</sup> Serubabel tel tame Abiud,  
Abiud tel tame Eliakim,  
Eliakim tel tame Asor.

<sup>14</sup> Asor tel tame Sadok,  
Sadok tel tame Akim,  
Akim tel tame Eliud.

<sup>15</sup> Eliud tel tame Eleasar,  
Eleasar tel tame Matan,

Matan tel tame Jekop.

<sup>16</sup> Jekop tel tame Josep, tel axoi Mary, tetel tini Jises,  
tel Kraiss Haeu taloma.

<sup>17</sup> Tataen Abraham hanima David, nakuale huopanim hinalo. David hanima tataen ti lato kalabus hani Babilon, nakuale tin huopanim hinalo ape huopanim hinalo hani tataen takahe Kraiss.

### *Takahe Jises Kraiss*

<sup>18</sup> Sale takahe Jises Kraiss. Tel tinan Mary laha kilami hani axoi Josep, tuahe imat ti lalu sal, liai i petiwen akaik ti pohe Holi Spirit.

<sup>19</sup> Josep se seilon sawisawin, i watakai hahienai Mary ti puli lawe seilon. Aile ape i namilo i na i tua lioi hakokol Mary.

<sup>20</sup> Lokon ti i to nanamilo i, tel engel, spirit solian ti tel Masiwi Haeu, sohot hani i ti paxangongo, i ukek, “Josep, tel kahi nati David, kum maamata waxiai axoam Mary. Tel akaik he tian i pet ti pohe Holi Spirit.

<sup>21</sup> I hatakaha tel akaik wawan, o axaiwa axan Jises nake i awai seilon ti kawate saun lialun ti laha.”

<sup>22</sup> Hatesol waliko ie i sohot hapoponowi hawane kakai Haeu masin ti tel seilon kuluiai kakaian kakawen, i ukek,

<sup>23</sup> “Tel hehin tenen i tai eng akakati tel na wawan i pet akaik ape i hatakaha tel akaik wawan, laha axai axan Imanuel.

Tenen kakain Imanuel i ukek, ‘Haeu kapi kaha.’ ”

*(Isa 7:14, 8:8, 10)*

<sup>24</sup> Muhin ti Josep haiwa, i waxi Mary hanowi ti tel engel ti Haeu kaakane i.

<sup>25</sup> Tuae Josep tai eng akati i hani tataen tel akaik takah. Ape Josep axai axan Jises.

## 2

### *Tesol soliwa ti angiha*

<sup>1</sup> Jises takah leili taon Betlehem ti Judia, lokon ti Herod masiwi. Lokon ien, tesol seilon ti sai angiha tahia hani Jerusalem. Lato aneso mumuh ti kohot.

<sup>2</sup> Ape lato kamea, “Ia tetel akaik i takahale masiwi tapein ti teka Ju? Amite ningahi tehu kohot ti sai angiha i kola takahan ape amite nahima lotuian.”

<sup>3</sup> Ti tel masiwi Herod hongoa, namilon sihikuk hawane hetekie teka seilon ti Jerusalem.

<sup>4</sup> I tiloi teka masiwi tuah ti hukuminiai Haeu ma seilon, ma teka hanau nauna ti Moses ape i kamei lato, “Tel Krai i takah tetesol ia?”

<sup>5</sup> Lato ukek, “Leili taon Betlehem ti Judia masin ti tel kuluiai kakai Haeu taiwen ukek,

<sup>6</sup> “ ‘Betlehem, taon ti Judia,  
o kumahe tehu taon tap axan ti Judia  
nake o tetesol tel masiwi i po sohot  
ti ngahatiai teka seilon tetak ti Israel.’ ” (*Mic*  
*5:2; 2 Sam 5:2*)

<sup>7</sup> Ape Herod tiloi tesol soliwa ti angiha. I kamei hakokol lato lokon wanen ti tehu kohot sohot.

<sup>8</sup> Ape i talo lato hani Betlehem i ukek, “Amuto nahiwa ape puas nihehi upia aluini hawanewa tel akaik. Na amuto tunahi, hahongo aliakema nga lehe tin nga nahih lotui i.”

<sup>9</sup> Muhi kakai Herod ape lato nahih. Ti lato lulu-ainiwa, tehu kohot i sohot alia ape i to neneiniwa aweisalulato hani tataen tesol tel akaik takah.

<sup>10</sup> Ti lato ningahiwa tehu kohot pate lato amuam hawane.

<sup>11</sup> Ti lato soh haniwa leili ing, lato ningahi tel akaik ma tel tinan Mary. Lato lokuha lotui tel akaik. Lato heiwa kakulato ape axi i waliko tuah: gol, sanda ma mer, paura tenen poun pate solian.

<sup>12</sup> Ti leili paxangoalato Haeu hahongo lato ukek, “Kum alia hahani kapi Herod.” Ape lato non aweisal liai alia hani xuxulato.

### *Josep oxake lato hani texux xux Igip*

<sup>13</sup> Muhin ti tesol soliwa aliawa, Josep i paxangong. Leili paxangoan tel engel ti Haeu hone i ukek, “Xahatawa! Waxiwa tel akaik ma tel tinan ape ox haniwa Igip nake Herod i upiup tel akaik lehe i telei. Amuto toa ien atengi tataen na nga hahongo aliakewa amuto.”

<sup>14</sup> Josep xahat waxi tel akaik ma tel tinan ti ipong tutuen ape lato ox hani Igip.

<sup>15</sup> Lato to ien atengi tataen Herod mat. Waliko ien i sohot hapoponowi hawane waliko ti Haeu kaxiwen leili pepai tel kuluiwai kakaian i ukek, “Nga tiloi ahuti tel Natuk ti Igip.” *(Hos 11:1)*

### *Laha telei teka akaik*

<sup>16</sup> Ti Herod tioiwa ka tesol soliwa ti angiha pisiwen i, lon lialu hawane. I hani kakain ahian ti teleiwi hatesol akaik wawan ti Betlehem ma xux ti xohixohin, akaik ti ahangun huohu hanima itan. I usima minge tesol soliwa ti angiha ka lato ningahi tehu kohot ahang huohu tamusuen.

<sup>17</sup> I sohot hapoponowi hawane waliko ti tel kuluiwai kakai Haeu, Jeremaia ukek,

<sup>18</sup> “Tangitangi lalap ma kinax ti tatahan i sohot ti tehu taon Rama.

Rakel i tangixi tesol natun.

I watakai laha hasoli i nake tesol natun  
mat hatapoen.” *(Jer 31:15)*

### *Aliaialato ti Igip*

<sup>19</sup> Muhi matei Herod, tel engel ti Haeu sohot hani Josep ti leili paxangoan lokon ti i Igip.

<sup>20</sup> I ukek, “Xahatawa, waxiwa tel akaik ma tel tinan ape alia haniwa xux ti Israel pake teka lehe laha telei tel akaik ape laha matewen.”

<sup>21</sup> Josep xahat waxi tel akaik ma tel tinan ape lato alia hani Israel.

<sup>22</sup> Tuahe ti Josep hongoa Akilaus kewen totone tel taman Herod masiwi ti Judia, i mamata na i soso. Haeu hone ulea i leili paxangoan ka sos haniwa Galili texux xux leili Israel.

<sup>23</sup> Ape Josep aile tonalato tewau toan Nasaret. I haponowia hawane kakai tesol kuluai kakai Haeu, lato ukek, “Laha axai i Nasarin.”

## 3

### *Jon Baptis apeseni aweisali tel Masiwi*

*Mk 1:1-8; Lk 3:1-17*

<sup>1</sup> Hina ahang tamusua Jon Baptis i hutui ahutiai kakai Haeu ti i nahih hahaniwa he lohong ti Judia.

<sup>2</sup> I ukek, “Towiahua ti saun lialun ti amuto nake nenein ti Haeu i xohiwen!”

<sup>3</sup> Jon se tetel seilon Aisaia kakak imat, i ukek, “Tel seilon i titilol he lohong, “Towiahua ti lialui woumuto lehe tel Masiwi neini amuto taen i tahiamal!” ” *(Isa 40:3)*

<sup>4</sup> Jon, soston ma puxuaun uli kamel, teik tahan tin tuahe uli manihuh a anan kukunalel ma xuni awe nini.

<sup>5</sup> Seilon ti laha nahih hani kapin, teka ti Jerusalem, ti hatehu Judia ma kakalini toan ti xohixohin kan Jordan.

<sup>6</sup> Laha kaxi ahuti lialui woulaha ape i baptaisihaha leili tehu kan Jordan.

<sup>7</sup> Tataen ti Jon ningahiwa kilai teka Parisi ma teka Sadusi nahih hahanima kapin ti ukei baptais, i kakane lato ukek, “Amuto seilon tenen lehomuto huoka! Aita hone amuto ka amuto salia uke ti kaui kawatan ti Haeu hani amuto?”

<sup>8</sup> Ailewa saun tenen ti i kola ka amuto lioiwen saun lialun.

<sup>9</sup> Kum ukekek amuto salia uke ti kaui kawatan nake amuto nakuama ti Abraham. Nga kakane amuto, Haeu pon kolitinaia tesol pot ie hani kahi nati Abraham!

<sup>10</sup> Haeu apeseniwen tea ngolapung. Pata tenen i kum hua alua, i koti hamahusu ape i towi lui hani leili ah.

<sup>11</sup> “Nga baptaisihaha teka seilon ani kan ti kolaiian ka laha lioiwen saun lialun tuahe Jises Kraia, tel i sohotuma muhik, i hani laha Holi Spirit ti kapi-tialaha. Jises pamu masiwian tetak, masiwiaian ala i kum pon nga unauan.

<sup>12</sup> I hiniti seilon masin tel na i hapuasa nuhinuh ti i selai api ti penun. I apuhini api wanen ape i lui xoini penun. Tin masin Jises i towi xoini teka seilon lialun hani leili tehot ah tap tahi pehoan.”

### *Jon baptaisihaha Jises*

*Mk 1:9-11; Lk 3:21-22*

<sup>13</sup> Lokon ien Jises nahih ti Galili hani kapi Jon ti ukei baptaisihaha he kan Jordan.

<sup>14</sup> Tuae Jon towiahu lali namilon. I ukek, “Lehe nga baptais i o? Ala o baptais nga.”

<sup>15</sup> Jises hone i, “Tilimuen masin ie. Kalu tua aile usi waliko ti namili Haeu.” Ape Jon sowini.

<sup>16</sup> Muhin ti Jises baptais kewa, i xaheale. Maun i hea ape i ningahi Spirit ti Haeu mos hani kapin hanowi tok pux.

<sup>17</sup> Tataen ien teik kakain ahuma ti tone Haeu, “Ie se tel Natuk wanen nga waheni, nga amuke hawane i.”

## 4

### *Satan tohongi Jises*

*Mk 1:12-13; Lk 4:1-13*

<sup>1</sup> Muhin Holi Spirit kapiti Jises hani he lohong lehe Satan tohongi haputaian.

<sup>2</sup> Jises tai angiang leili 40 ngain ma ipong ape pate i hitol.

<sup>3</sup> Satan nahih hani kapin ape i ukek, “Na o tel Nati Haeu, kolitiniwa tesol pot ie haniwa bret.”

<sup>4</sup> Jises pahoi i, “Leili pepai Haeu i kak ukek, “Seilon ala i hana hatapo namilon hani kakai Haeu kumahe an.’ ” *(Deut 8:3)*

<sup>5</sup> Muhin Satan hakahita Jises hani Jerusalem ape hatuhi i he teik tumi Ingi Haeu patul wanen.

<sup>6</sup> Ape Satan kakane i, “Na masin salan o tel Nati Haeu, tautit haniwa itan. Ti leili pepai Haeu i kak ukek,

“Haeu talo tesol engelaun tengeni awaiam he minalato lehe kalak taen aem pot kum hamange.’ ”

*(Ps 91:11-12)*



<sup>7</sup> Jises hone i, “Leili pepai Haeu tin i kak ukek, ‘Kum totohongi Haeu tel Masiwi.’ ” *(Deut 6:16)*

<sup>8</sup> Satan hakahita ulei Jises hani tehu maunten patul wanen ape kola hani i hatesol xux ma soliai waliko ti tehu pon itan ie.

<sup>9</sup> Satan hone Jises, “Hatesol waliko ie nga hani tetam na o lokuha lotui nga.”

<sup>10</sup> Jises kak pahoi i, “Nahih xaxaua Satan! Teik pepai Haeu i kak ukek, “‘Lotuiwa mewenae Haeu tel Masiwi ma ailewa mewenae puasan.’ ” *(Deut 6:13)*

<sup>11</sup> Ape Satan nahih salili Jises. Teka engel ti Haeu tahia hani kapi Jises ape lato ngahati i.

*Jises hutui puasan leili Galili*

*Mk 1:14-15; Lk 4:14-15; Jn 4:43-45*

<sup>12</sup> Ti Jises hongoa ka Jon kalabusawen, i nahih alia hani texux xux Galili.

<sup>13</sup> I salili Nasaret ape aile tonan Kapenaum, tehu taon xohixohin ti kanitax Galili ma xuxi teka Sebulun ma Naptali.

<sup>14</sup> Waliko ie sohot haponowiai kakai Aisaia, masin ti i kakawen,

<sup>15-16</sup> “Teka seilon ti xux ti Sebulun ma Naptali, xux ti pahoiwa kanitax Galili, pape kan Jodan, tewaok ti Galili ti teka kumahe Ju totonai, laha toto he tilokoan ti saun lialun tuahe laha po tunahi lalape xewai Haeu.

Laha toto he tilokoan ti matemate tuahe xewai Haeu po haxewa laha.” *(Isa 9:1-2)*

<sup>17</sup> Lokon ien Jises hutui pupuasan ti sawate-niai kakai Haeu i ukek, “Amuto towiahua ti lialui

woumuto nake xohiwen ti Haeu neini hatesol seilon.”

*Jises tike waxaini seilon hani kahikahin*

*Mk 1:16-20*

<sup>18</sup> Ti Jises tau nanahih pape kanitax Galili, i ningahi hua seilon ti tikei xixi, Saimon Pita ma tel ukalan Andru. Lalu totowi upen puliai xixi.

<sup>19</sup> Jises hone lalu, “Kahitima nga lehe nga hanau amulu tike waxainiai seilon hani kahikahik.”

<sup>20</sup> Kakanua lalu hana lioi upen ape kahiti i.

<sup>21</sup> Jises nahih ahewa ape i ningahi hahutalin liai, Jeims ma Jon, nati Sebedi. Lalu he tea koap kapi tel tamalalu apepeseni upenaulato. Ape Jises tiloi lalu.

<sup>22</sup> Ape salan, lalu nahih salili tea koap ma tel tamalalu ape kahiti i.

*Jises kakaxi meng solian ti Haeu ma i haewia teka tinun*

*Mk 1:35-39; Lk 4:42-44*

<sup>23</sup> Jises nahih hani tesol tesol ti Galili hahanau teka seilon leili synagog, ing ti apuhai teka Ju. I kakaxi meng solian ti Haeu neini seilon ape i aile hasolia teka hina nax tenen tenen.

<sup>24</sup> Menge waliko ti i ailele i sawat kakalini ha-texux xux ti Siria. Ape teka seilon atoheni hani i hatesol teka tinun, teka hina moloan lalap, seilon teka spirit lialun kapiti hahialalu, teka lawe laha put xexex ma teka laha kum nahih uke. Jises aile haewia laha.

<sup>25</sup> Kilan wanen seilon kakahiti i, teka ti Galili, seilon ti huopanim taon axan Dekapolis, Jerusalem, Judia ma teka ti liai tepaun ti tehu kan Jodan.

## 5

*Jises hanau teka seilon he tehu maunten*

*Lk 6:17-26*

<sup>1</sup> Jises ningahiwa mongohe teka seilon ape i nahih hani he maunten. Tekahikahin nahih to apuha hani kapin.

<sup>2</sup> Ape i hutui hanau lato saun ti soliai Haeu, i ukek,

<sup>3</sup> “Haeu aile hasolia hani teka pahalaha wanen i neini ma ngahati laha.

<sup>4</sup> Haeu aile hasolia hani teka laha toto ti tatahan. I hasoli laha.

<sup>5</sup> Haeu aile hasolia hani teka laha tap namil ti halepelep.

I aile laha tame tehu pon ie.

<sup>6</sup> Haeu aile hasolia hani teka pahalaha wanen usiai

nauna tetan.

Laha pono ti waliko tenen solian.

<sup>7</sup> Haeu aile hasolia hani teka laha hina tatahan ti seilon liai.

I tin hina tatahan ti laha.

<sup>8</sup> Haeu aile hasolia hani teka laha hani hatapo namilolaha

ailei pupuasan. Imuh laha ningahi i.

<sup>9</sup> Haeu aile hasolia hani teka laha pupuas ti hasoliai

wasole seilon. I axai laha natun wanen.

<sup>10</sup> Haeu aile hasolia hani teka seilon teteka liai aile halialu

nake laha ailele pupuasan. Laha seilon tetan wanen.

<sup>11</sup> “Haeu aile hasolia hani amuto na seilon kak saxuti axamuto, sului putini amuto ma aile waliko lialun hani amuto nake huak.

<sup>12</sup> Amuamua nake kahumuto solian Haeu ape-seniwen patul leili tonan. Nameniwa ka teka kuluiwai kakai Haeu ti matahaun tin lato kauen kawatan ti teka seilon aile halialu lato.

*Kahikahi Jises masin sol ma xewan*

*Mk 9:49-50; Lk 14:34-35*

<sup>13</sup> “Amuto tuah ti hani lawe seilon masin sol ti hanamui an. Tuahe na taxiai sol i tapo, kaha kum hataxia aliake uke. I ape tap solian tetan. Seilon towi xoini ape laha tua nahih tutuhi.

<sup>14</sup> “Amuto tuah masin xewan ti kolai aweisali Haeu ti tehu pon itan ie. Amuto masin tehu taon laha atai patul he tehu maunten lehe lawe seilon ningahi.

<sup>15</sup> Tap tel i hakama tehu kamaian ape hana hani hahitake salek. Laha hakama ape hakea hani patul koukean lehe i haxewa seilon ti leili ing.

<sup>16</sup> Tin masin amuto haxewa haniwa seilon liai lehe laha ningahi saun solian ti amuto ape laha sameni Haeu tel Tamamuto.

*Kakain ti sale nauna ti Moses*

<sup>17</sup> “Amuto kum ukekek ka nga tahiamaxaxawenai nauna ti Moses ma kakain ti teka kuluiwai kakai Haeu kakaxi. Nga tahiamahaponowiaian lehe seilon xeu kakai Haeu.

<sup>18</sup> Nga kakane hawane amuto, ti maun aheah ma pon itan ie tutuen, tap teik kakain ti Haeu haniwen Moses i sohia atengi lawe waliko sohot poponowi hanowi ti Haeu kakawen.

<sup>19</sup> Tel na i tahi tuahe teik nauna ti Haeu ape i hanau seilon liai tahian, Haeu namilo i ukek i tel pate naun. A tel na i puas usi ma hanau seilon liai

puas usiai nauna ien, Haeu namiloi ukek i tel pate tuah.

<sup>20</sup> Nga kakane hawane amuto, Haeu hani amuto tonain tuah kapin mewenae na usiai Haeu ti amuto i xoini teka Parisi ma teka hanau nauna ti Moses.

*Kakain ti sale lengelenge*

*Lk 12:58-59*

<sup>21</sup> “Amuto hongoen nauna ti Moses hani teka seilon ti kuwen i ukek, ‘Tel na i ulini ape i telei seilon i tu ti sulusulu.’ *(Exod 20:13)*

<sup>22</sup> Tuahe nga kakane hawane amuto, tel na i tua lengeini lalolal seilon, i tu ti sulusulu ti puli Haeu. Ape tel na i kak halialu seilon liai i ukek, ‘O tap pupuasam,’ laha sulusu i hani teka masiwi. Ape tel na i kak halialu seilon liai i ukek, ‘O taxitaxia,’ i kane tehot ah lalap tap tahi pehoan.

<sup>23-24</sup> “Na masin ti leili Ingi Haeu lehe o hani i teik na waliko ape o nameni tunahi ka wasolamulu tel seilon o halialuen, hana lioimua teik akekenam he aweing, ape nahih hasawimua wasolamulu tel seilon ien. Na o hasawi kewa, ien, ape o haniwa Haeu teik akekenam.

<sup>25</sup> “Na tel i namiloi sulusuai tel ti amuto, hasawi koseniwa wasolamulu uke i hatuhi o hani puli tel masiwi ti hongoi meng. Ape i hana o hani mini teka masiwi ti kalabusiam.

<sup>26</sup> Na i sohot ukek ien, o kum ahuta atengi o hasawi hatapoa moni. Tin masin amuto hasawiwa wasolamuto ma Haeu uke amuto kau kawatan ti lialui woumuto.

*Kakain ti sale saun lialun ti wawan hehin*

*Mk 9:43, 45, 47*

27 “Amuto hongoen, ‘Kum ailele saun lialun ti wawan hehin.’ *(Exod 20:14)*

28 Tuae nga kakane amuto, tel na i paxai nahaini tel na hehin ape namilon i eliel pahan i eng akati, tel seilon ien i ailewen saun lialun ti wawan hehin leili namilon.

29 Na o hapuasa tepaun pulam manau ti ailei saun lialun, xaxusi xaxaweniwa! Pamu ewian na o lioi teik ti tupuam uke laha towi xoini o hani tesol ti kawatan tap tahi tapoan.

30 Na o hapuasa tepaun minam manau ti ailei saun lialun, koti xaxaweniwa! Pamu ewian na o lioi tepaun minam uke laha towi tupuam hatel hani tesol tonain ti kaui kawatan lian tehue.

*Nauna ti sale lioiai hehin*  
*Mk 10:11-12; Lk 16:18*

31 “Tin Moses kakawen, “Tel na pahan i lioi tel axoan hehin, i tai hahongoa tel hehin sale lilioa-ialalu.’ *(Deut 24:1)*

32 Tuae nga kakane amuto, tel seilon i tapai lioiai tel axoan hehin mewenae na tel hehin eng akati tel seilon liai. Na i lioi tel axoan ti hui waliko liai, i aile haputa tel axoan ti ailei saun lialun ti wawan hehin. Tin i aile haputa hetekie tel wawan ti i uke tetel hehin mahe axoan.

*Kakain ti sale tuohain*

33 “Tin amuto hongoen, ‘Kum xaxaputi kakain ti na o tuoha haniwen Haeu.’ *(Num 30:2)*

34 Tuae ape nga hone amuto, kum tutuoha ukek kuinakei tone Haeu nake se tone tel Masiwi Haeu.

<sup>35</sup> Kum tutuoha ukek kuinakei tehu pon itan ie nake i ti Haeu. Kum tutuoha ukek kuinakei Jerusalem nake se taon ti Haeu.

<sup>36</sup> Kum tutuoha ukek kuinakei patum nake o kum pon aile hapolui ma hapaxaxui tok na uk.

<sup>37</sup> Na o tuoha, tua kakawa 'se' ma na 'kumahe.' Na o kak hakila kuinake ti tutuoh tetam, i ahuma ti Satan.

*Kum he kahukah saun lialun*

*Lk 6:29-30*

<sup>38</sup> "Imat amuto hongoen, 'Na tel seilon i xaxusi tepaun pulam, o xaxusi aliakewa tepaun pulan. Na tel taputui hataxuxu nisum, o taputui hataxuxu aliakewa nisun.' *(Exod 21:24)*

<sup>39</sup> Tuae nga hone amuto, kum kahui aliliake waliko lialun ti seilon liai aile hani amuto. Na tel seilon aile hani amuto saun tenen pate hahien, kum aile kahui aliliake. Tiliwen i aile tuhi ulea.

<sup>40</sup> Na tel lehe i sului amuto ape waxi lungei tehu puxuaumuto, hani palahiwa i tehu liai.

<sup>41</sup> Na tel i hone lungei amuto kua teik kokol tehu kakun, amuto kau haxau ahekewa teik.

<sup>42</sup> Na tel katei amuto teik na soxi, haniwa i. Na tel seilon pahan i hapuasa teik na soxiamuto, haniwa i hapuasa.

*Waheniwa teka laha pahoxai o*

*Lk 6:27-36*

<sup>43</sup> "Imat amuto hongoen, 'Waheniwa teka lohumuto ma tumuiwa teka na lialun ti amuto.' *(Lev 19:18)*

<sup>44</sup> Tuae nga hone amuto, waheniwa teka laha pahoxai amuto. Lotu hualiwa teka laha halialu amuto.

<sup>45</sup> Na amuto aile ukek ien, amuto sohot hawane nati tel Tamamoto Haeu. Waheniwa hatesol seilon tekewe nake Haeu hani alon haxewai ati seilon solian ma lialun. Ape i hauxa akah hani seilon teka sawisawin ma teka weli ailei saun lialun.

<sup>46</sup> Haeu kum kahui hasolia amuto na masin amuto waheni mewenae teka laha waheni amuto. Kalak taen teka seilon waxiai moni hani teka masiwi ti Rom, lato waheni mewenae teka laha waheni lato.

<sup>47</sup> Na amuto kakak mewenae kapi teka lawamoto, kalahai lehe Haeu kahui hasolia amuto? Kalak taen laha kum ttoi Haeu laha ailele saun tenen ien.

<sup>48</sup> Amuto kewa seilon sawisawin wanen hanowi ti tel Tamamoto Haeu i sawisawin wanen.

## 6

### *Sale hualiai teka tap soxi*

<sup>1</sup> “Na amuto aile puasain solian, lepeteniwa, kum ailele ti lehe laha sameni amuto. Na amuto aile kola lehe lawe seilon sameni, amuto kum uke kahumuto ti tel Tamamoto Haeu.

<sup>2</sup> Na masin amuto huali tel seilon, amuto kum aile kokola hanowi teka seilon leholaha huoka, laha ailele leili synagog ma he puli lawe seilon. Laha aile lehe teka seilon haxawa axalaha. Nga hone amuto, laha uke hatapoen kahulaha.

<sup>3</sup> Na masin amuto huali tel seilon, amuto kum kakaxi hani tel na seilon kalak i lohumuto solian.

<sup>4</sup> Na masin amuto huali tel seilon a teka liai kum ttoi, tel Tamamoto Haeu lawe i ningahi ape i kahui amuto.

*Jises hanau sale lotu*  
*Mk 11:25; Lk 11:1-4*



<sup>5</sup> “Na amuto lotu, amuto kum aile hahanowi teka seilon leholaha huoka. Pahalaha lawe laha lotu ti leili synagog ma ti he puli lawe seilon lehe lawe seilon niningahi laha. Nga hone amuto, laha uke hatapoen kahulaha.

<sup>6</sup> Na masin amuto lotu, soh haniwa leili ing, keitiwa aweing ape lotu haniwa tel Tamamuto Haeu. Kalak amuto kum niningahi i, tel Tamamuto lawe i ningahi waliko likihan ti amuto ailele ape i kahui amuto.

<sup>7</sup> Na amuto lotu, kum aile hahakila kakain tenen i tua lalolal, hanowi ti teka seilon laha kum tioi Haeu. Laha sokok Haeu hong laha nake lotu ti laha pate weluwelun.

<sup>8</sup> Amuto kum hahanowi ti laha. Tel Tamamuto hoi liai i tioiwen waliko tenen amuto tae, imat ti amuto kamea.

<sup>9</sup> “Na amuto lotu, amuto kak kewak:  
 “ Tel Tamamite Haeu,  
 amite sameni o nake o pate tuah wanen.

<sup>10</sup> Pahamite o neiniwa ma ngahatiwa amite.  
 Hualima amite usiam hanowi tetesol lato  
 kapim  
 leili tonam.

<sup>11</sup> Axima amite an tapai ti ngain tehu tehu.

<sup>12</sup> Ooxiwa amite ti kawatan ti lialui woumite,  
 masin ti amite ooxi seilon liai ti kawatan  
 ti waliko lialun laha aile hani amite.

<sup>13</sup> O kum hahani amite totohong ailan  
 lehe amite kum aile saun lialun.

Ape awaiwa amite ti Satan  
 ma teka spirit lialun tetan.’

14 “Na masin amuto oxoxi seilon liai ti kawatan ti waliko lialun laha aile hani amuto, tel Tamamoto Haeu tin i oxoxi amuto ti kawatan ti lialui woumuto.

15 Tuaehe na amuto kum oxoxi seilon liai ti kawatan ti waliko lialun laha aile hani amuto, tel Tamamoto tin i kum oxoxi amuto ti kawatan ti waliko lialun amuto ailewen.

*Jises hanau sale haliniai an*

16 “Ti amuto halini an hualiai lotu ti amuto hani Haeu, kum aile kokola he kawamoto, hanowi ti teka seilon leholaha huoka lawe to ailele. Laha aile kola lehe hatesol seilon tioi ka laha hahalini an. Nga hone amuto, laha uke hatapoen kahulaha.

17 Tuaehe na amuto halini an, nuhiwa kawamoto ma hexiwa ukumuto.

18 Amuto aile kewak ien lehe laha kum tioi ka amuto hahalini an. Pake tel Tamamoto Haeu, amuto kum niningahi, i tioi. Lawe i ningahi waliko likihan ti amuto ailele ape i kahui amuto.

*Sale apuhiniai soxi*

*Lk 12:33-34*

19 “Amuto kum apuhini hahakila waliko solian tenen tenen ti itan ie. I aneso lialu ma teka seilon ti xuxuina waxi.

20 Hani hatapoa kuimuto ma namilomuto haniwa Haeu. Ie masin ka amuto apepeseni kahumuto ti tonan. Tesol ien tap tahi lialuan ma tap teka xuxuina.

21 Namilomuto toi waliko tuah ti amuto. Aile ape kewa Haeu kapitiai namilomuto.

*Namili seilon masin tehu kamaian*

*Lk 11:34-36*

22 “Namilomuto masin tehu kamaiamuto. Aile ape na namilomuto solian, amuto xuhai xewan ti saun solian.

23 Tuae na namilomuto lialun, amuto xuhai tilokoan ti saun lialun. Ien masin ka kamaiamuto i peh ape amuto leili lalape tilokoan.

*O kum puas uke hahitake masiwi hua*

*Lk 16:13*

24 “Amuto kum puas uke hahitake masiwi hua, uke amuto waheni tel ape amuto watakai tel, amuto hong kakai tel ape kum hong tel. Amuto kum aile uke puase Haeu na masin namilomuto tin xoxoan ti ngahoi moni.

*Kum hahakila namil*

*Lk 12:22-31*

25 “Nga hone amuto, kum namiloi hahakila an, unumamuto ma sosomuto. Sale totonamuto seilon pamu tuah ti an a tupuamuto pamu tuah ti maia.

26 Paxaiwa manixux, laha kum seseini ma apupuhini an a tel Tamamuto Haeu ngangahati laha! Nga kakane hawane amuto ka Haeu namiloi ukek amuto pamu tuah ti manixux.

27 Kaie amuto pon hawelu ahekei tuahe na teik totonamuto ti amuto to nanamiloi?

28 “Ape kalahai amuto to nanamiloi maia? Paxaiwa sale xexei palawa. Laha malang puas sawitiai maia sosolaha!

29 Tuae nga hone amuto, kalak taen tel masiwi Solomon, sosen, maia ma hatesol soliai waliko tetan, i kum pon soliai palawa.

30 Haeu tel i ngangahati pahoah, i ie tetelao ape letu laha lui xoini. Kaie kumahe pamu i ngahati aluluini amuto? Amuto tap namil xoxoan ti Haeu.

<sup>31</sup> “Ape amuto kum namilo i ukekek, ‘Kaie anak, unumak ma sosok nga kema ia?’

<sup>32</sup> Tesol waliko ien, teka laha kum tioi Haeu to namilo i hahakila. Tel Tamamoto Haeu tioi waliko ti amuto tap.

<sup>33</sup> Haniwa i neini amuto ape ailewa waliko tenen i hamuamua i. Ape i hani amuto hatesol waliko ien.

<sup>34</sup> Kum namilo i hahakila waliko ti na i sohot letu. Waliko ti letu, tiliwen ti letu. Amuto kum huhukumini kawatan ti ngain tehu tehu.

## 7

### *Kum kak hahialu woi seilon liai*

#### *Lk 6:37-42*

<sup>1</sup> “Kum kak hahialu woi seilon liai lehe Haeu kum lengeini amuto.

<sup>2</sup> Haeu nam kolongeni woumuto hanowi na amuto nam kolongeni woi teka liai. Ape i aile hani amuto waliko tenen na amuto aile hani teka liai.

<sup>3</sup> “Kum hahanowi teka laha kak hialu woi seilon liai a laha kum paxai tioi puki lialui woulaha. Laha masin teka seilon laha ningahi teik masiap kokol he puli tel seilon liai a laha kum paxai tioi teik masiap lalap he puki pulalaha.

<sup>4</sup> Lehe amuto hone ukek ia tel seilon liai, ‘Han-ima nga xaxaweni teik masiap kokol he pulam’ na masin puki amuto teik masiap lalap he pulamoto?

<sup>5</sup> Seilon tenen lehomuto huoka! Amuto xaxawenimua teik masiap lalap he pulamoto ape muhin ien amuto paxapax alua ti xaxaweniai teik masiap kokol he puli tel seilon liai.

<sup>6</sup> “Kum kaxi hahanau kakai Haeu hani teka laha watakai hawane i. Laha aile hanowi ti sinen ma

pou. Na amuto towi hani lato waliko tenen tuah, lato tuhi pexi halialu ape lato towiahu atalahi amuto. Tin masin teka laha watakai hawane Haeu, laha hil pahoi aliake amuto ape laha kak halialu kakai Haeu.

*Kamei talingoiwa Haeu*

*Lk 11:9-13*

<sup>7</sup> “Amuto kamei talingoiwa ape Haeu hani amuto waliko ti amuto kakamea. Upia talingoiwa ape Haeu huali amuto tunahian. Kikini talin-goiwa kahip ape Haeu hei hani amuto.

<sup>8</sup> Teka na laha kamea, Haeu hani laha. Tel na i upia, Haeu huali i tunahian. Teka na laha kikini talingoi kahip, Haeu hei hani laha.

<sup>9</sup> “Na natumuto kamea an, kaie amuto hani i pot?

<sup>10</sup> Na natumuto kamea xixi, amuto hani i weiko?

<sup>11</sup> Kalak woumuto lialun, amuto tioi haniai waliko solian hani natumuto. Tuahe Haeu tel Tamamuto i hani amuto pamu kilaian ti na amuto kamei i.

<sup>12</sup> “Aile haniwa seilon liai saun tenen pahamuto laha aile haniwa amuto. Tenen saun ien i salan-gawe nauna ti Moses ma teka kului ai kakai Haeu.

*Aweisal omiomin ma mamananan*

*Lk 13:24-25*

<sup>13</sup> “Nahih usiwa tewau aweisal omiomin kane tesol tonain kapi Haeu ti tap tahi tapoan. Tewau aweisal hani tesol ti kawatan tap tahi tapoan i mamananan ma pate malimun ape pate kilan seilon nanahih ien.

<sup>14</sup> Ape tewau aweisal kane tesol tonain kapi Haeu ti tap tahi tapoan, i se omiomin a pate ailan ma pate palai seilon tunahian.

*Tea pata ma huan**Lk 6:43-45*

<sup>15</sup> “Amuto kanipetiwa teka seilon laha woinakon kului ai kakai Haeu. Paxai laha ti melal masin sipsip tuahe ti leilon laha masin sinen tenen tumun pate kalimen.

<sup>16</sup> Amuto paxai tioi laha ti sale pupuasalaha. Au i kum hahuama huai laku ape sawaul i kum hahuama huai ul.

<sup>17</sup> Pata xexean solian, huan solian a pata xexean lialun, huan lialun.

<sup>18</sup> Pata tenen xexean solian, huan kumahe lialun ape pata xexean lialun, huan kumahe solian.

<sup>19</sup> Tenen pata na i kum hua alua, laha koti hamahusu ape lui xaxaweni.

<sup>20</sup> Aile ape amuto tioi teka seilon woinakon kului ai kakai Haeu na amuto paxai ani pupuasalaha.

*Teka woinakon kahikahi Jises**Lk 6:46*

<sup>21</sup> “Teka laha axai nga Masiwi, kumahe hatesol soh hani tesol tone Haeu ti neinia i lawe seilon, mewenae teka na laha puas usi waliko ti tel Tamak Haeu pahan.

<sup>22</sup> Tehu ngain tapeinan ti Haeu hiniti seilon, kilan teka laha kum puas usi kakai Haeu laha hone nga ukek, ‘Tel Masiwi, hahitake axam amite kului kakai Haeu, amite usi xaxaweni spirit lialun ma aile kilan waliko lalap ti i kola pohem.’

<sup>23</sup> Ape nga kakane laha, ‘Nga kum tioi amuto. Xaxaua tetak amuto seilon lialun!’

*Puas usiai kakai Jises**Lk 6:47-49*

24 “Na amuto hong kakaiak ape puas usi, amuto masin seilon tenen hina namilon. I atai tehu ingan he hepekeun ailan.

25 Akah lalap uxalih, weu lalap hutomile, aupol kuin taheilih tehu ingan tuahe i tai put manan nake i hahatuhi he hepekeun ailan.

26 Tuahe na amuto hong kakaiak a kum puas usi, amuto masin seilon tenen tap namilon. I atai ingan he hepekeun wakiakin.

27 Akah lalap uxalih, weu lalap hutomile, aupol kuin taheilih tehu ingan ape i manan. Malehe ape lialui mananaian!”

28 Taen Jises kak hatapoa, teka laha apupuha laha hong ong amuke hawane sale kakaian.

29 I kumahe masin teka hanau nauna ti Moses, kakaian masin ka i tel pamu masiwian ti lato.

## 8

### *Jises haewia tel seilon naxe tinun hakaliape i*

*Mk 1:40-45; Lk 5:12-16*

1 Muhin ti Jises hanau kewa teka seilon, i mos alialih he maunten ape kilan wanen seilon nahih kahiti i.

2 Tel seilon hina nax lialun he tinun nahih hani kapin, i lokuha mateiwaun ape i ukek, “Tel Masiwi, na o waheni, xaxaweniwa naxe tinuk lehe nga hau alia.”

3 Jises tulini aka soti tel seilon. I ukek, “Nga waheni. Ewiwa ma haua!” Ti i kakawa tel seilon ewi huluta.

4 Ape Jises hone i, “Kum kaxi hahani teka seilon liai. Nahih sawi haniwa kapi tel masiwi ti huku-miniai Haeu ma seilon lehe i paxai kalisi tinum.

Kau hetekiewa huok manixux ti haniai Haeu masin ti Moses kakawen. Ien kola haniai teka seilon ka o ewiwen ape pon o hukuma hani kapi laha.”

*Jises haewia tel unau tel masiwi ti hile ti Rom*

*Lk 7:1-10*

<sup>5</sup> Ti Jises tahia haniwa Kapenaum, tel masiwi ti hile ti Rom kamei i huhual.

<sup>6</sup> I ukek, “Tel masiwi, tel unauak pate tinun engeeng leili ing, tupuan maten ma pate i lamani tinun.”

<sup>7</sup> Jises ukek, “Nga nahima aile haewiaian.”

<sup>8</sup> Tel seilon pahoi ukek, “Oie tel masiwi, kumahe. O pate masiwi kasia ti na o nahih hanima leili ingak. O tua kakawa ape tel unauak i ewi.

<sup>9</sup> Nga tin hina seilon pamu masiwian tetak ma tin hina seilon ti hile hahitakak. Na nga hone tel, ‘Nahiwa,’ i nahih. Na nga hone tel, ‘Nahima,’ i nahima. Ape na nga talo tel unauak, ‘Ailewa tetenen,’ i aile.”

<sup>10</sup> Ti Jises hongoa, pate i ongake ape i hone teka seilon kakahiti i, “Nga kakane amuto, ti leili Israel nga tai tutunah tel seilon i hina namil xoxoan tetak masin tel seilon ti Rom ie.

<sup>11</sup> Nga kakane hawane amuto, ngain telao ti Haeu hiniti hatesol seilon, kilan laha ahuma xux tesol tesol ape to kapi Abraham, Aisak ma Jekop ti tehu angiaian lalap Haeu apeeseni leili tonan.

<sup>12</sup> Tuahe teteka seilon ala ti Haeu, teka ien Haeu towi xoini hani he tilokoan. Laha tang lialu ma atalahi hamekimeki nisulaha nake moloan lalap tap tahi tapoan.”

<sup>13</sup> Ape Jises hone tel masiwi ti teka seilon ti hile, “Nahih haniwa ingam. Nake o soh ka nga pon



haewia tel unauam, i sohot.” Tataen ien wanen tel unauan ewi huluta.

*Jises haewia kilan seilon*

*Mk 1:29-34; Lk 4:38-41*

<sup>14</sup> Jises nahih hani leili ingi Pita ape i paxai tunahi tel hehin ihai Pita tinun engeeng he sau. Lul tunahi i.

<sup>15</sup> Ti Jises aka sotiwa minan, tinun ewi. Ape se i xahat apeseni ani Jises.

<sup>16</sup> Ti ape alohah, teka seilon hakahita hani Jises kilan seilon ti spirit lialun kapiti hahialalu. Kakain tehue Jises xaxaweni hatapo teka spirit lialun ape i haewia hatesol seilon tinun.

<sup>17</sup> Waliko ien i haponowi hawane waliko ti Aisaia tel kuluiai kakai Haeu kak kilamiwen, “I xaxaweni nax tenen tenen ti kaha.” (*Isa 53:4*)

*Sale kahitai Jises*

*Lk 9:51-62*

<sup>18</sup> Ti Jises ningahiwa kilai teka seilon kapin, i hone tesol kahikahin lang haniai sai liai tepaun ti kanitax Galili.

<sup>19</sup> Tel seilon ti hanau nauna ti Moses, i nahih hani kapin ape i ukek, “Tel masiwi, tesol tesol na o nahih, nga kahiti o. Nga lawe kahikahim.”

<sup>20</sup> Tuahe Jises pahoi i ukek, “Sinen hina walun, manixux hina ingan a nga, tel Nati Seilon, tap tuahe tesol na tone hanawaiak.”

<sup>21</sup> Tel seilon liai, tel ti kahikahin, hone i ukek, “Tel masiwi, nga aunimu tel tamak atengi tataen i matewa ape nga tihini.”

<sup>22</sup> Tuahe Jises pahoi i ukek, “O kahitima nga. Teka seilon kumahe ti Haeu laha masin seilon maten. Tiliwen teka ien tihiniai teka maten.”

*Jises hamonga tehu ahon lalap*

*Mk 4:35-41; Lk 8:22-25*

<sup>23</sup> Jises ku haniwa he tea koap ape tesol kahikahin kuoxi i.

<sup>24</sup> Tai kue, ahon lalap tunahi lato. Laman i hutomi tea koap. A Jises i mamatih.

<sup>25</sup> Tesol kahikahin hangoni i. Lato ukek, “Tel Masiwi, hualiwa kako uke kako taxix mat!”

<sup>26</sup> Jises ukek, “Alahan ka pate amuto mamata? Nakon amuto tap namil xoxoan ti Haeu?” I xahatawa ape i kakane aupol ma laman, “Mongawa!” Ape i tuxi.

<sup>27</sup> Tesol kahikahin pate lato tataxini, “Seilon lahan tetenen? Taen aupol ma kanitax hong usi kakaian!”

*Jises haewia hua seilon spirit lialun kapiti halialu*

*Mk 5:1-20; Lk 8:26-29*

<sup>28</sup> Jises kolia hani pape kanitax Galili sai liai tepaun, hepekeun ti Gadara. Hua seilon lalu sohotuma he amal ti ien nahih pahoima i. Spirit lialun kapiti halialu lalu ape lalu se lengean wanen. Aile ape tap tel seilon nanahih tewau aweisal ien.

<sup>29</sup> Ti lalu ningahiwa Jises, tesol spirit lialun leilolalu ausini, “Tel Nati Haeu, o paham waliko la ti amite? O nanahima ti aile halialuamite? I tai meiwa ngain ti Haeu kikilami.”

<sup>30</sup> Xohixohin ien, kilan pou exiex.

<sup>31</sup> Tesol spirit lialun kamei eliel Jises, “Na masin o usi ahuti amite, talo haniwa amite leili tesol pou.”

<sup>32</sup> Salan, Jises hone lato, “Amuto nahiwa!” Ape lato ahuta soh hani leili tesol pou. Hatesol pou

ien kiliwau mosua ti he sahikekean tamus hani itax ape lato waut mat. <sup>33</sup> Tesol ngahatai pou, lato mamata kiliwau hani taon ape kaxi sawatени waliko ti i sosohot. Tin lato kaxi hetekie waliko ti i sohot hani huhua seilon spirit lialun kapiti hialalu lalu.

<sup>34</sup> Ape kilan wanen seilon ti tehu taon ien, laha nahih upia Jises. Ti laha tunahiwa, laha kamei eliel i ti nahih saliliai hepekeunaulaha.

## 9

### *Jises haewia tel seilon tupuan maten*

*Mk 2:1-12; Lk 5:17-26*

<sup>1</sup> Jises ku haniwa he tea koap ape i luaini kotiwa kanitax Galili hani tehu taon tonan.

<sup>2</sup> Teka seilon kau hani i tel seilon tupuan maten engeeng he sau. Ti Jises ningahiwa xoxoi namilolaha, i hone tel tinun, “Tu xoxoa tel natuk! Nga oxoxi o ti kawatan ti lialui woum.”

<sup>3</sup> Ape tesol hanau nauna ti Moses kakak alia puki lato, “Tel seilon ie kak hanowi ka i Haeu. Mewenae Haeu pon oxoxiai seilon ti kawatan ti lialui woulaha.”

<sup>4</sup> Jises ttoi namilolato ape i ukek, “Alahan namilomuto lialun?”

<sup>5</sup> Tetenen ia pamu malimuan? Nakon pamu malimun na nga hone tel seilon tupuan maten, ‘Xahatawa ape nahiwa,’ ka ‘Nga oxoxi o ti kawatan ti lialui woum?’ Ti ailei hahuonen, mewenae seilon ti hina pohe Haeu i pon ailean.

<sup>6</sup> Nga aile kola lehe amuto ttoi ka nga, tel Nati Seilon, he tehu pon ie nga hina poh oxoxiai seilon ti kawatan ti saun lialun ti laha.” Ape i hone

tel seilon tupuan maten, “Xahatawa, waxiwa enepam ape nahih haniwa tonam.”

<sup>7</sup> I xahat ape i nahih hani ingan.

<sup>8</sup> Ti teka seilon paxaiwa, laha ong mamata hawane ape laha sameni Haeu nake i axi poh tenen masin ien hani seilon.

*Matiu sohot kahikahi Jises*

*Mk 2:13-17; Lk 5:27-32*

<sup>9</sup> Jises nahih salili tesol ien. Ti i nanahiwa, i ningahi tel seilon axan Matiu toto tesol tone puasan. Pupuasan waxiai moni ti teka Ju hani teka masiwi ti Rom. Jises hone i, “Kahitima nga. Pahak o kahikahik.” Matiu tule ape kahiti i.

<sup>10</sup> Ti Jises to angiang leili tehu ingi Matiu, kilan teka waxiai moni ma teka weli ailei saun lialun nahima to akati Jises ma tesol kahikahin.

<sup>11</sup> Teka Parisi paxaiwa ape laha kamei tesol kahikahin, “Kalahai Jises to ang kapi seilon tetenen?”

<sup>12</sup> Jises hong lato kakak ape i ukek, “Dokta kum puasake seilon huliwi, mewenae teka tinun.

<sup>13</sup> Nahiwa ape paxai tioiwa waliko ti Haeu kakaxi leili pepaun ti i ukek, ‘Nga pahak amuto hina tatahan ti seilon liai, kumahe pahak amuto telei axi nga manihuh.’ *(Hos 6:6)* Kumahe ka nga he tehu pon ie upiai kahikahik seilon tenen laha sokok laha sawisawin. Nga tahياما upiai kahikahik seilon tenen laha tioi woulaha lialun.”

*Nauna wasan ma nauna haun kum he paho*

*Mk 2:18-22; Lk 5:33-39*

<sup>14</sup> Imuh tesol kahikahi Jon Baptis nahih hani kapi Jises ape kamei i, “Nakon lahan teka

kahikahim kum halini an ti hualiai lotu ti lato hanowi ti amite ma teka Parisi?”

<sup>15</sup> Jises kak pahoi lato, “Taen tel seilon i sal i kapi tesol seilon ti laha ilowima ti salasala, kaie lato to ti tatahan ape kum ang? Kumahe! Lato ang amuam kapin. Tuahe ngain tehu i luluainima ti laha waxi tel seilon i sal ti lato ape tataen ien lato halini an.

<sup>16</sup> “Tap tel ukeke teik maia haun paxatawaiiai teik maia wasan. Na i aile ukek ien, teteik haun i lexi teik wasan ape wawan i lap ahe.

<sup>17</sup> Seilon kum lohi hahakila patula wel hani tehu po wasan nake na i lauti, tehu po i watat ape patula tapulol. Pamu ewian na i lohi hani he tehu po haun lehe ati lalu kum lialu.”

*Tel akaik hehin maten ma tel hehin tinun  
Mk 5:21-43; Lk 8:40-56*

<sup>18</sup> Ti Jises kaakane lato, tel ti tesol masiwi ti teka Ju nahih hani kapin. I lokuha mateiwaun ape i ukek, “Tel natuk hehin i mamatewa aoep. Pahak o nahih hanawa minam patul tetan lehe i moih alia.”

<sup>19</sup> Jises tu nahih kahiti i ape tesol kahikahin tin nahih usiwa i.

<sup>20</sup> Lokon ien tel hehin hina nax ti sale tapunaun leili ahang huopanim huohu, i nahih usi Jises ape soti ngixi tehu puxuaun.

<sup>21</sup> Ti namilon wanen i ukek, “Kalak nga tua soti tehu puxuaun, naxe tinuk i tapo.”

<sup>22</sup> Jises tohea paxai i ape ukek, “Amuamua tel natuk. Xoxoi namilom tetak i aile hasolia o.” Ape salan, i ewi huluta.

<sup>23</sup> Ti Jises nahih haniwa leili tehu ingi tel masiwi, i ningahi ka teka seilon laha tangitang ma wiliwilia.

<sup>24</sup> Ape i ukek, “Amuto hatesol nahiwa! Tel akaik ie i tai mat, i tua mamatih.” Tuahe laha hatesol mal soxeni i.

<sup>25</sup> Ti laha sohot hatapoa, Jises nahih hani kapi enepe tel akaik. I akeni minan ape tel akaik xahat.

<sup>26</sup> Menge waliko ti i ailele i sawat kakalini hatesol xux ti ien.

*Jises haewia hua seilon pulaxa*

*Mk 10:46-52; Lk 18:35-43*

<sup>27</sup> Jises nahih salili tesol ien. Ti i nanahiwa hua seilon pulaxa nahih usiusi i. Lalu tilol ukek, “Tahanema amili, tel kahi nati David!”

<sup>28</sup> Ti Jises soh haniwa leili ing, huhua seilon pulaxa nahih hani kapin. Ape i kamei lalu, “Amulu soh ka nga pon haewiamulu?”

Lalu ukek, “A se, tel masiwi.”

<sup>29</sup> Jises soti pulalalu ape i ukek, “I sohot hanowi ti xoxoi namilomulu.”

<sup>30</sup> Ape pulalalu ewi. Jises kakane lalu, “Kum kakaxi wanen hani tel na seilon.”

<sup>31</sup> Tuahe lalu nahih kaxi sawateni hani tesol tesol ti xux ien waliko ti Jises ailewen.

*Jises haewia tel seilon i kum kak uke*

*Lk 11:14-15*

<sup>32</sup> Ti lalu nahih saliliwa Jises, laha hakahita hani kapin tel seilon i kum kak uke nake spirit lialun kapiti hialalu i.

<sup>33</sup> Tuahe tataen Jises xaxaweniwa spirit lialun ape tel seilon kakak. Hatesol seilon laha ongake

hawane. Laha kak ausini, “Amite tai papaxai waliko tetenen ti Israel hatexux!”

<sup>34</sup> Tuae teka Parisi ukek, “Satan axi i poh ti xaxaweniai spirit lialun.”

### *Jises hina tatahan ti seilon*

<sup>35</sup> Jises nahih kakalini taon ma toan tewau tewau. I hanau teka seilon leili synagog. I kaxi meng solian ti Haeu neini seilon ma i aile haewia seilon ti hina nax tenen tenen.

<sup>36</sup> Ti i paxaiwa kilai seilon, i tahane hawane nake laha masin seilon tenen lioan. Laha namiloi hakila waliko tenen tenen ape laha masin sipsip tenen tap ngahatan.

<sup>37</sup> Ape i kakane tesol kahikahin ukek, “Tek a seilon ie masin kilai an he kin ti i apeasawen. Tu ahe seilon ti apuhiniai an, teteka ti neiniai seilon hani Haeu, laha pate palai.

<sup>38</sup> Kameiwa Haeu tel Tame kin lehe i talo palahi seilon ti apuhiniai an ti i apeasawen.”

## 10

### *Huopanim hua aposel*

*Mk 6:7; Lk 9:1*

<sup>1</sup> Jises tiloi apuhini tesol huopanim hua kahikahin ape i axi lato poh ti xaxaweniai spirit lialun ma haewiai seilon ti hina nax tenen tenen.

<sup>2</sup> Ie axe tetesol huopanim huhua aposel: imat Saimon (axan liai Pita) ma tel ukalan Andru, Jeims ma tel ukalan Jon, lalu nati Sebedi,

<sup>3</sup> Pilip ma Batolomiu, Tomas, Matiu, kemuk i tel waxiai moni, Jeims tel nati Alapeus, Tadeus,

<sup>4</sup> Saimon, kemuk i tel ti teka Ju laha hil pahoi teka Rom, ape Judas Iskariot, tetel seilon imuh i hangaini Jises.

*Puase tesol huopanim huhua kahikahi Jises*

*Mk 6:8-13; Lk 9:2-6*

<sup>5</sup> Jises talo tesol aposel ape i kakane lato ukek, “Amuto kum nahih hahani kapi teka kumahe Ju ma na tuahe tehu taon ti Samaria.

<sup>6</sup> Amuto nahih haniwa kapi teka seilon ti Israel, laha masin teka sipsip tap ngahatalaha.

<sup>7</sup> Nahiwa ape kaxi sawateniwa ka Haeu tel neiniakako ape i xohiwen.

<sup>8</sup> Haewiawa teka tinun, hamoiha aliakewa seilon maten, haewiawa teka seilon hina nax lialun he tinulaha ma ahuti xaxaweniwa spirit lialun ti leilolaha. Masin ti amuto tua uke tap kahun, tin amuto tua haniwa, kum kakamea kahi puasamuto.

<sup>9</sup> “Kum kakau moni.

<sup>10</sup> Kum kakau kak, sohia i sosomuto, axahe aemuto ma na teik kuaiamuto. Seilon ti ailei puase Haeu, laha kum tae ti lawe waliko.

<sup>11</sup> “Na amuto tahia haniwa taon ma na toan, pax ngahoa tel na i waxi auni amuto ape amuto toa kapin atengi tataen telao amuto salili i.

<sup>12</sup> Ti amuto soh haniwa tehu ing, amuto kak kewak, ‘Amuam ti Haeu hani amuto.’

<sup>13</sup> Na seilon ti leili ing waxi auni amuto, amuto axiwa laha amuam ti Haeu. Na laha kum waxi auni amuto, amuam ti Haeu i alia hani kapimuto.

<sup>14</sup> Na seilon watakai amuto ma na kum hong amuto, tapahi xaxaweniwa hepekeun he anele aemuto. Ien se kolakol ti laha kum waxi auni



seilon ti Haeu. Ape nahih saliliwa tehu taon ma na tewau toan ien.

<sup>15</sup> Nga hone amuto, tehu ngain ti hinitiai seilon, Haeu kolongeni ka laha pamu lialuan ti teka seilon lialun ti Sodom ma Gomora.

*Kawatan ti luluainima  
Mk 13:9-13; Lk 21:12-17*

<sup>16</sup> “Hongoa! Nga talo amuto hanowi tanih hani leili teka wako. Aile ape amuto hanowiwa anesoi uxi ma hanowiwa xu ka masop.

<sup>17</sup> Lepetawa hina seilon laha pohi xiote amuto ape sului amuto hani teka seilon ti hong paxaii kakain ape laha xai amuto leili synagog.

<sup>18</sup> Nake amuto kahikahik, laha ati lungei amuto hani teka masiwi tenen tenen. Ape amuto kaxi meng solian ti Haeu hani laha ma teka laha kum tioi i.

<sup>19</sup> Ti laha aka kongini amuto, kum hahakila namilomuto waliko tenen ti na amuto kak.

<sup>20</sup> Spirit ti Haeu hanamiloa amuto waliko tenen na amuto kak.

<sup>21</sup> “Hahutalin, tel i hangaini tel hani laha telei. Tin masin hahutaman, tel taman i hangaini tel natun hani laha telei. Tekaka laha watakai hawane tamalaha ma tinalaha ape laha hangaini lato hani seilon telei.

<sup>22</sup> Kilan wanen seilon laha watakai hawane amuto nake huak, tuahe na amuto tu xox kahikahik atengi amuto mat, Haeu waxi auni amuto lian tehue.

<sup>23</sup> Na teka seilon ti tewau toan aile halialu amuto, ox haniwa toan liai. Nga kakane amuto, nga, tel Nati Seilon, nga alia hani kapi tel Tamak Haeu imat ti amuto hatapo puasamuto leili Israel.

24 “Tap tel seilon i xoini tel hanauan, tap tel unau tel masiwi i xoini tel masiwi tetan.

25 Laha kum aile hani tel na seilon pamu soliaian ti laha aile hani tel hanauan. Ape laha kum aile hani tel unau tel masiwi pamu soliaian ti laha aile hani tel masiwi tetan. Na nga tel tame tehu ing laha axai Satan, pamu laha aile hialalu ahekewa teka hahitakak!

*Mamatawa mewenae Haeu*

*Lk 12:2-7*

26 “Kum maamata tuahe seilon. Waliko ti i atu-tuha ma na mumuna ao pe ie, imuh Haeu hatakei.

27 Waliko tenen ti nga kaxi mumuneni hani amuto, kaxi ahuti haniwa teka liai. Waliko ti mewenae amuto hongohong, kaxi ahuti haniwa lawe seilon.

28 Kum maamata teka laha tua telei tupuamuto, laha kum pon teleiai namilomuto ma hanawain ti Haeu haniwen amuto. Mamatawa mewenae Haeu nake i pon telei xoiniai tupuamuto ma hatesol waliko leilomuto hani tesol ti kauri kawatan tap tahi tapoan.

29 Moni kokol i pon kahuiwai huok piakus tuahe tap tok i mat halik na Haeu ukek i mat.

30 Amuto seilon, Haeu tioi hatapo mongohe uk he patumuto.

31 I namiloi ukek ka amuto pamu tuah ti piakus. Aile ape, kum maamata.

*Teka laha waheni a teka laha wataakai Jises*

*Lk 12:8-9*

32 “Na tel i namiloi waxi nga ma kakaiak ape i kaxi ahuti hani seilon ka i kahikahik, nga kaxi hani tel Tamak Haeu ka i tetak.

<sup>33</sup> Tuae na tel i puluhini ti puli seilon ka i kahikahik, nga hone tel Tamak Haeu ka tel seilon ien i kumahe tetak.

*Axiai wasole seilon*

*Lk 12:51-53*

<sup>34</sup> “Kum nanamiloi ka nga tahiamas hasoliai wasole seilon ti tehu pon ie. Kumahe, kakain nga kema ti Haeu, i axi wasole teka namilolaha xoxoan hani Haeu ma teka laha kum soh kakaian.

<sup>35</sup> Aile ape akaik wawan pahoi taman, akaik hehin pahoi tinan ape hehin pahoi ihan hehin.

<sup>36</sup> Tekas ti akikimuto wanen laha hilei amuto nake huak.

<sup>37</sup> “Na tel seilon pamu i waheni tel taman ma tel tinan i xoini ti i waheni nga, i kum pon kahikahik. Na tel seilon pamu i waheni tel natun i xoini ti i waheni nga, i kum pon kahikahik.

<sup>38</sup> Na tel seilon pahan kum is kaui kawatan masin ti nga kakau, i kum pon hawane kahikahik.

<sup>39</sup> Na tel seilon pahan kum is kahikahik nake pahan i akeni kongini totonan ti itan ie, i lioi totonan ti kapi Haeu. Tuae na tel seilon i to kahikahik kalak na masin i lioi totonan ti itan ie, i waxi totonan ti kapi Haeu.

*Haeu axi kahi teka laha ngahati teka unauan*

*Mk 9:41; Lk 10:16; Jn 13:20*

<sup>40</sup> “Na tel seilon auni amuke amuto tesol kahikahik, tin masin i auni amuke nga. Na tel seilon auni amuke nga, tin masin i amuke Haeu tel i taloma nga.

<sup>41</sup> Na tel seilon waxi auni tel kuluias kakai Haeu nake i tel unauis Haeu, i waxi kahun masin ti tel kuluias kakai Haeu. Na tel seilon waxi auni tel

seilon sawisawin nake i unau i Haeu, i waxi kahun masin ti tel seilon ien.

<sup>42</sup> Tioi kewak! Na tel seilon axi kalak tuahe na kaniup hani tel nake i kahikahik, i uke kahun ti Haeu.”

## 11

### *Jises ma Jon Baptis*

#### *Lk 7:18-35*

<sup>1</sup> Muhin ti Jises hanau kewa tesol huopanim hua kahikahin, i nahih salili tesol toan ien ape i nahih hani taon ti xohixohin. I hahanau ma kakaxi meng solian ti Haeu hani teka seilon.

<sup>2</sup> Ti Jon Baptis leili kalabus, i hong waliko ti Krai ailele. I talo tesol kahikahin hani kapin.

<sup>3</sup> Ape lato kamei i ukek, “Nakon o se Krai, tel amite to atetengi Haeu taloma, a amite atetengi tel seilon liai?”

<sup>4</sup> Jises pahoi lato ukek, “Amuto nahih aliawa, honewa Jon waliko ti amuto hongohong ma niningahi.

<sup>5</sup> Teka pulaxa, laha nahih hanima kapik ape laha paxapax, teka laha kum nanahih ape laha nahih uke, teka hina nax lialun he tinulaha, laha ewi, teka taxingalaha sutu ape laha hong uke kakain. Teka maten laha moih alia ape teka pahalaha wanen Haeu neini ma ngahati laha, laha hongohong meng solian ti Haeu.

<sup>6</sup> Ape kaxi haniwa Jon ka teka namilolaha xoxoan tutuen tetak, Haeu aile hasolia hani laha.”

<sup>7</sup> Ti teka kahikahi Jon nahih aliliawa, Jises kakane teka seilon kapin sale Jon, i ukek, “Ti amuto nahiwa hongoi kakai Jon ti he lohong,

amuto sokok amuto ningahi aita? Tel seilon namilon lawe i sohisohia?

<sup>8</sup> Amuto sokok ka amuto ningahi aita? Tel seilon tenen sosen pate solian? Kumahe, seilon kum sosoi maia solian he lohong.

<sup>9</sup> Amuto kaxi hanima nga, amuto sokok amuto ningahi aita? Tel kului ai kakai Haeu? Se, salan wanen, tuahe nga kakane amuto, Jon kumahe tuahe tel kului ai kakai Haeu.

<sup>10</sup> Jon tel seilon Haeu kakaxi leili pepaun. Haeu kakane tel Natun i ukek,

“Nga talo tel ahutiai kakai ak imat tetam

ti apeseniai seilon ti sohotuam.’ *(Mal 3:1)*

<sup>11</sup> Nga hone amuto, puase Jon ti Haeu kilami i ailean, se pamu tuah ti puase hatesol seilon liai. Tuahe kalak teka ti pate naun leili teka seilon Haeu neneini, anesoalaha sale nenein ti Haeu pamu lapan ti Jon.

<sup>12</sup> Lokon ti Jon kakaxi kakai Haeu hanima tataen ao pe ie, kilan seilon pahalaha wanen Haeu neini laha.

<sup>13</sup> Imat ti Jon, teka kului ai kakai Haeu ma nauna ti Moses, hatesol kak kilamiwen taun ti nenein ti Haeu.

<sup>14</sup> Ala amuto sohoa ka Jon se masin Elaija tel kului ai kakai Haeu, sohotuan Haeu kilamiwen.

<sup>15</sup> Na amuto hina taxing ti hongoi kakain, amuto hongoa!

<sup>16</sup> “Kaie nga kolongeni teka seilon ti ao pe ie ukek ia? Laha masin teka akaik laha toto ti tone halokoin. Laha tilol ausisini hani teka liai,

<sup>17</sup> “Amite pakui pak solian ti salasala hani amuto tuahe amuto kum amuam.  
Amite pakui pak ti tatahan

tuahe amuto kum tang.’

<sup>18</sup> Masin Jon Baptis ti i sohotuma, i kum ang halapa ma i kum un waen, ape teka seilon ukek, ‘Spirit lialun kapiti hialalu i.’

<sup>19</sup> Ape ti nga tel Nati Seilon sohotuma, nga ang ma un waen hanowi teka seilon liai, ape teka seilon ukek, ‘Paxaiwa tel seilon ien! Puhuan wawan ma weli unum. I tin lohi teka seilon ti waxiai moni hani teka masiwi ti Rom ma lohi teka seilon woulaha lialun.’ Tuahe nga kakane amuto, anesoi Haeu ti amili Jon hahanau seilon, i sohot xeu hawane ka salan, na auha paxai soliai puasamili, tataen ti kilan seilon ape laha aile usi hanauan ti amili.”

*Taon ti laha kum soh Jises*

*Lk 10:13-15*

<sup>20</sup> Teku seilon ti tesol taon ti kewi Jises hahapuasa poh ti ailei waliko lalap tenen tenen, laha kum towiahu ti lialui woulaha hani Haeu. Aile ape i kak hakawata hani laha. I ukek,

<sup>21</sup> “Teku seilon ti Korasin ma Betsaida, Haeu axi amuto kawatan. Na nga aile hanila teka Taia ma Saidon waliko tenen lalap nga aile haniwen amuto, teka Taia ma Saidon laha towiahu kueiniwen ti lialui woulaha!

<sup>22</sup> Aile ape, nga kakane amuto, tehu ngain ti hinitiai seilon, Haeu axi kawatan hani amuto i xoini kawatan ti i axi teka Taia ma Saidon.

<sup>23</sup> “Ape teka seilon ti Kapenaum, amuto namilo i ukek ka Haeu sameni amuto ape waxi amuto hani kapin. Tuahe Haeu towi xoini amuto hani tesol ti kaui kawatan ti tap tahi tapoan. Kalak amuto ningahiwen waliko tenen lalap nga ailele, amuto kum towiahu ti lialui woumuto hani Haeu. Na nga

aile haniwen teka Sodom waliko ti kui pohek nga aile hahani amuto, kaie Haeu tai halialu Sodom!

<sup>24</sup> Aile ape, tehu ngain ti hinitiai seilon, Haeu axi kawatan hani amuto i xoini kawatan ti i axi teka Sodom.”

*Jises ilowi teka seilon hani kapin*

*Lk 10:21-22*

<sup>25</sup> Ape Jises lotu hani Haeu ukek, “Tel Tamak Haeu, Masiwi ti lawe waliko ti patul ma tehu pon itan ie, nga kak kemulik hani o nake o mumuneni sale pohem ti teka laha sokok laha seilon aneso ape o haxewa hani teka seilon laha hana aliake laha hahitake ngahat tetam masin teka akaik.

<sup>26</sup> Nga kak kemulik hani o tel Tamak nake paham i sohok ukek ien.”

<sup>27</sup> Ape Jises hone teka seilon ukek, “Tel Tamak Haeu hani hatapoen nga pohen ma anesoan. Mewenae tel Tamak Haeu tioi hawane nga tel Natun ma mewenae nga tel Natun tioi hawane tel Tamak Haeu. Ape nga tel Natun nexi haxewa tel Tamak Haeu hani teka seilon ti nga kilami.

<sup>28</sup> “Teteka amuto kakau kawatan ma namilomuto kilan, kewa amuto kahikahik lehe nga hani amuto hanawain solian.

<sup>29</sup> Amuto puas elieliwa tetak ape hong usiwa kakaiak nake nga teheni hawane nga hani ailei puase Haeu. Na amuto aile ukek ien namilomuto heh.

<sup>30</sup> Pake puasain nga hani amuto se paupaun ape usiai kakaiak se solian.”

## 12

*Jises ma teka Parisi kak hapatapat sale Sabat*

*Mk 2:23-28; Lk 6:1-5*

<sup>1</sup> Tai kue, telao ngain Sabat, Jises nahih kokotiwa tesol kini kon. Tesol kahikahin hitol ape asahi ani huai kon.

<sup>2</sup> Ti tesol Parisi ningahiwa, lato hone Jises ukek, “Paxaiwa, tesol kahikahim ailele waliko tenen hahalin ti telao ngain Sabat!”

<sup>3</sup> Jises kak pahoi ukek, “Nakon amuto kum ttoi waliko ti tel masiwi David ma tesol seilon hahitakan aile lokon ti pate lato hitol?”

<sup>4</sup> I nahih haniwa leili Ingi Haeu ape i ma teka kapin lato ani bret ti laha haniwen Haeu, kalak hahalin. Mewenae teka masiwi ti hukuminiai Haeu ma seilon pon anian.

<sup>5</sup> Nakon amuto kum ttoi nauna ti Moses? Teka masiwi ti hukuminiai Haeu ma seilon laha puas telao ngain Sabat leili Ingi Haeu tuahe Haeu kum namilo i ukek laha talesiwen.

<sup>6</sup> Nga kakane amuto, nga pamu tuah ti Ingi Haeu ti Jerusalem.

<sup>7</sup> Kakai Haeu i ukek, ‘Pamu nga waheni amuto aile saun ti tatahan hani seilon i xoini na amuto kau hani nga manihuh.’ *(Hos 6:6)* Na amuto ttoi hawane puole teik kakain ie, ala amuto kum tieni halialu seilon ti laha tai aile saun lialun, hanowi tesol kahikahik.

<sup>8</sup> Pake nga tel Nati Seilon, nga se Masiwi ti Sabat. Nga tel sowini haniai seilon waliko tenen i pon ma na i kum pon laha aile telao ngain Sabat.”

*Tel seilon minan maten*

*Mk 3:1-6; Lk 6:6-11*



<sup>9</sup> Jises nahih salili tesol ien ape i nahih hani synagog.

<sup>10</sup> Ape ti ien, tel seilon minan maten. Hina seilon pahalaha sakaloi aweisal ti suluiwai Jises. Aile ape laha kamei hataehu i, “Ewi na haewia seilon telao Sabat?”

<sup>11</sup> Jises pahoi ukek, “Na tel ti amuto tok tupun manihuh put hani tewau wal tahuloun ti telao ngain Sabat, kaie i kum ahuti?”

<sup>12</sup> Seilon i pamu tuah ti tok na manihuh. Aile ape ewi ti hualiai seilon telao Sabat.”

<sup>13</sup> Jises hone tel seilon tepaun minan maten, “Hokahiwa minam!” Ti i hokahiwa, tepaun minan maten ewi hanowi tepaun liai.

<sup>14</sup> Ti tesol Parisi ningahiwa, lato aile ngah aweisal ti teleiai Jises.

*Jises se tel Haeu kilami*

*Mk 3:7-12*

<sup>15</sup> Ti Jises hongoa ka lato hina namil ti teleian, i nahih salili tesol ien. Kilan wanen seilon nahih kakahiti i.

<sup>16</sup> I aile haewia hatapo teka tinun ape i hone hatuoha lato kum kaakane tel na seilon waliko ti i ailele.

<sup>17</sup> Waliko ti Jises ailele i haponowi hawane teik kakai Haeu leili pepai Aisaia. I ukek,

<sup>18</sup> “Ie tel Natuk, i unauak, tel nga kilamiwen, nga waheni ma pate nga amuke hawane i.

Nga hani i Spirit tetak,

ape i kaxi ahuti hani lawe seilon  
aweisal ti nga neini hasawi laha.

<sup>19</sup> I kum kak lungelung,  
i kum tilol ma kak ausini sameniai kakaian  
mate seilon.

20 I tahane teka seilon tenen masin topiu ti i kekelel.

I huahi teka seilon namilolaha tetak masin kamai ah tenen lehe i peh.

I puas tatale atengi tataen teka seilon waheni nga neini laha.

21 Ape kilan seilon ti lawe xux hana hatapo laha hani he minan.” (Isa 42:1-4)

*Pohe Satan ma pohe Holi Spirit*

*Mk 3:20-30; Lk 11:14-23*

22 Tekā seilon hakahita hani Jises tel seilon puxa ma i kum kak uke nake spirit lialun kapiti halialu i. Jises aile haewia tel seilon ape i pon kak ma paxapax.

23 Tekā seilon paxai tataxini waliko ti Jises ailele. Laha he kamekam alia laha, “Nakon se i Kraiss, tel kahi nati tel masiwi David?”

24 Ti teka Parisi hongoa, laha ukek, “I xaxaweni spirit lialun nake Satan tel masiwi ti spirit lialun axi i poh ti usi xaxawenialaha.”

25 Jises tioi waliko ti lato nanamilo i ape i hone lato, “Na seilon ti xux texux laha tikela ape hil alia puki laha, texux xux ien i lialu tamus. Na tesol akikin lato hil alia puki lato, tesol akikin ien lato kum tu xox.

26 Na masin Satan hilei aliake Satan, nenein tetan tapo tamus.

27 Amuto ukek nga usi xaxaweni teka spirit lialun nake Satan hakui nga. Na masin ien, kaie Satan haniwen tesol kahikahimuto poh ti usi xaxaweniala spirit lialun? Puase tesol kahikahimuto kola ka kumahe salan nga hahapuasa pohe Satan.

<sup>28</sup> Spirit ti Haeu axi nga poh ti usi xaxaweniai spirit lialun. I kola ka Haeu tel neiniamuto ape i tahiawen.

<sup>29</sup> “Satan masin tel seilon kuin. Tap tel seilon soh uke hani ingi tel seilon kuin ape waxi waliko tetan leili ing, halik na i xioti konginimu tel seilon kuin. Mewenae na i pamu kuiaian, i pon xoiniai tel seilon kuin. Se tin masin nga xoini Satan ape nga xaxaweni spirit lialun tetan ti seilon.

<sup>30</sup> “Tel ti na i kumahe tepaun tetak, i pahoxai nga. Tel ti na i kum huali nga neiniai teka seilon hani Haeu, i neini hasele laha ti Haeu.

<sup>31</sup> Nga hone amuto, Haeu oxoxi seilon ti kawatan ti lawe saun lialun laha aile, tuahe na tel i kak halialu Holi Spirit, tap wanen Haeu oxoxi i ti kawatan ien.

<sup>32</sup> Tel na i kak halialu nga tel Nati Seilon, Haeu oxoxi i ti kawatan ti saun lialun ien, tuahe tel na i kak halialu Holi Spirit, Haeu kum oxoxi i ti kawatan ti saun lialun ien lian tehue.

### *Tea pata ma huan*

#### *Lk 6:43-45*

<sup>33</sup> “Pata amuto paxai tioi na amuto paxai huan. Pata tenen huan solian i pata solian. Pata tenen huan lialun i pata lialun. Tin masin ala amuto tioi seilon solian ma na lialun na amuto paxai ani pupuasan.

<sup>34</sup> Amuto masin noh! Amuto kak ukek ia kakain solian na amuto seilon lialun? Kakain ti seilon ahuti i ahutama ti namilon.

<sup>35</sup> Seilon solian hina namil solian ape i ahuti kakain solian. Seilon lialun hina namil lialun ape i ahuti kakain lialun.

<sup>36</sup> Amuto tiori kewak, telao ngain ti Haeu hiniti seilon, lawe seilon uke kahi kakain lialun ti laha kakawen.

<sup>37</sup> Puki kakaiamuto sului aliake amuto. I kola na amuto seilon solian ma na lialun.”

*Teka masiwi ti teka Ju kamei Jises kolai pohem*

*Mk 8:11-12; Lk 11:29-32*

<sup>38</sup> Teka hanau nauna ti Moses ma teka Parisi kak ukek, “Tel masiwi, kola hanima amite pohem lehe amite tiori ka salan Haeu taloma o.”

<sup>39</sup> Tuae Jises kak pahoi, “Teka seilon ti aoape ie laha wataakai hawane Haeu, laha kakamei nga ailei waliko tenen lalap. Tuae Haeu kola hani amuto tenenawe kolakol ie, waliko i sohot hani nga masin ti i sohot haniwen Jona, tel kuluiai kakai Haeu.

<sup>40</sup> Masin ti Jona to ngain toluhu leili tiai tok xixi lalap, nga tel Nati Seilon, nga tin ngain toluhu leili amal.

<sup>41</sup> Telao ngain ti Haeu hiniti seilon, Haeu namiloi ukek teka seilon ti Niniva pamu sawi-sawin ti amuto nake laha towiahu ti saun lialun hani Haeu ti Jona kaxi ahutiwa kakai Haeu hani laha. Tuae amuto kum towiahu ti lialui woumuto kalak nga kaxi ahuhuti kakai Haeu hani amuto. Nga kakane hawane amuto, nga pamu tuah ti Jona.

<sup>42</sup> Tel hehin masiwi ti Siba luama ti xuxun pate xauxaun hongoi soliai nauna ti tel masiwi Solomon. Telao ngain ti Haeu hiniti seilon, waliko ti i aile i sului amuto nake amuto kum hong kaka-iaak kalak nga pamu tuah ti Solomon.”

*Aliai spirit lialun*

*Lk 11:24-26*

<sup>43</sup> Jises kak ulea ukek, “Na masin tel spirit lialun ahuta ti tel seilon ape i nahih hani he lohong upiai tesol na i to. Tuahe i kum tunah.

<sup>44</sup> I kakane aliake i, ‘Nga alia hani leili tel seilon.’ I alia tunahi ka tel seilon aoape i masin tehu ing tenen malaian ma tap tel ingangai.

<sup>45</sup> I nahih waxi tepanim hua spirit lialun, pamu lialuan tetan ape lato soh hani leili tel seilon. Lato kapiti halialu akulai ti imat. Waliko ien tin i sohot hani teka seilon ti aoape laha watakai hawane Haeu.”

*Tinan ma ukalan wanen*

*Mk 3:31-35; Lk 8:19-21*

<sup>46</sup> Ti Jises kakak tutuen, tel tinan ma tesol ukalan tahiam. Pahalato kakak kapin.

<sup>47</sup> Ape tel ti teka seilon ien kakane i, “Paxaiwa, tel tinam ma tesol ukalam lato ie. Pahalato kakak kapin.”

<sup>48</sup> Jises ukek, “Aita wanen tel tinak? Aita wanen tesol ukalak?”

<sup>49</sup> I kola tesol kahikahin ape i ukek, “Paxaiwa! Teka seilon ie se tinak ma ukalak.

<sup>50</sup> Hatesol teka na laha aile usi waliko ti tel Tamak Haeu pahan, laha se ukalak, tuak ma tinak.”

## 13

*Meng ti hepekeun tenen tenen*

*Mk 4:1-9; Lk 8:4-8*

<sup>1</sup> Ngain tin tetehu Jises nahih salili tehu ing ape i nahih to hani pape kanitax Galili ti hanau teka seilon.

<sup>2</sup> Kilan kasia seilon apuha kakalini i, aile ape i ku to hani he tea koap. Teka seilon tutu peixux hongoi kakaian.

<sup>3</sup> I kaxi kilan meng ti hanaualah.

I ukek, “Telao tel seilon seini waki maia.

<sup>4</sup> Ti i totowi waki maia, hina i put hani he aweisal ape manixux ngong ani.

<sup>5</sup> Hina i put hani he kalamael. Waki maia i xex, tuahe hepekeun pate pakepaken.

<sup>6</sup> Ti alon kekelih, i mani telei supuli maia nake i tai wahai aluini.

<sup>7</sup> Hina waki maia i put hani leili au. Ti i xexele, au talini ape i kum hua.

<sup>8</sup> Tuahe waki maia liai i put hani hepekeun solian. I xex ape hua palahi 30, hina palahi 60 ma teka palahi 100 akulaiwen ti tel seilon seini.”

<sup>9</sup> Ape Jises tili kakaian ukek, “Na amuto hina taxing ti hongoi kakain, hongoa!”

*Jises kaxi haxewa salangawan ti i uke meng hanau seilon*

*Mk 4:10-12; Lk 8:9-10*

<sup>10</sup> Muhin tesol kahikahi Jises nahih hani kapin ape lato kamei i, “Nake lahan o uke meng ti na o hanau seilon?”

<sup>11</sup> Jises pahoi ukek, “Haeu haxewa hani amuto sale nenein tetan tuahe kumahe laha.

<sup>12</sup> Na tel seilon hong usi kakai Haeu, Haeu axi aheke anesoan tuahe na tel seilon kum hong usi kakaian, anesoan Haeu waxi aliake.

<sup>13</sup> Nga kaxi meng hani laha nake laha papaxai waliko ti nga ailele tuahe laha kum ningahi, laha hongohong waliko ti nga kakak tuahe laha kum xeu.

14 Tenen ien i hapoponowi hawane waliko ti Aisaia kak kilamiwen. I ukek,  
 “Teka seilon laha hongohong kakai Haeu  
 tuahe laha kum xeu,  
 laha papaxai waliko ti Haeu ailele  
 tuahe laha kum ningahi.

15 Nake patulaha pate ailan,  
 taxingalaha kilakilan  
 a pulalaha masin pulaxa.

Kaie ala laha ningahiwen ma hong xewawen  
 ma towiahuen ti lialui woulaha  
 ape nga aile haewiawen laha.’ ” *(Isa 6:9-10)*

16 Ape Jises kakane tesol kahikahin ukek, “Tanusik  
 ka amuto hong xeu kakaiak ape amuto paxai tioi  
 waliko ti nga ailele.

17 Nga kakane hawane amuto, kilan teka kuluiai  
 kakai Haeu ma teka seilon sawisawin, pahalaha  
 wanen ningahiai waliko ti amuto niningahi tuahe  
 laha tai ningahi. Ape pahalaha hongoi waliko ti  
 amuto hongohong tuahe laha tai hong.”

*Jises kaxi haxewa meng ti hepekeun tenen tenen  
 Mk 4:13-20; Lk 8:11-15*

18 “Amuto hongoa! Nga kaxi haxewa hani  
 amuto tenen meng ti seiniai waki maia.

19 Teka laha hong kakain ti Haeu neini seilon a  
 laha kum xeu, laha masin aweisal ti waki maia put  
 to. Laha hong kakai Haeu tuahe malimun wanen  
 na Satan xaxaweni kakai Haeu ti leilolaha.

20 Kalamael ti waki maia put to, i kikilami teka  
 seilon laha hongoa kakai Haeu ape pate laha  
 amuke.

21 Tuahe masin tesol waki maia i tai wahai  
 aluini, teka seilon ien tap namil xoxoan ti Haeu.

Laha soh kakai Haeu teik kukunun. Taen kawatan ma totohong tunahiwa laha ti usiai kakai Haeu, xoxoi namilolaha ti Haeu pate i put kosea.

<sup>22</sup> Hepekeun ti hina au ti waki maia put to, i kikilami teka seilon laha hong kakai Haeu, tuahe laha namilo kasini waliko ti itan ie. Pahalaha soxialaha kilan. Namil tenen ien kokongini kakai Haeu ape laha kum hua.

<sup>23</sup> Tuahe hepekeun solian kikilami teka seilon laha hong auni kakai Haeu ape laha hua. Teka laha hua 30, teka 60 ma teka liai 100 akulaiwen ti uli seinian.”

### *Menge peteta ma kango*

<sup>24</sup> Jises kakane laha tenen meng i ukek, “Aweisal ti Haeu neini seilon masin tel seilon i seini peteta he tesol kinen.

<sup>25</sup> Ipong tehu ti hatesol seilon mamatih, tel seilon lialun nahih seini kango hani he tesol kin ape i nahih salili.

<sup>26</sup> Tataen ti peteta xexele i xex hetekiele kango.

<sup>27</sup> “Tek a unau tel tame tesol kin nahih hani kapin ape lato ukek, ‘Amite sokok o seseini peteta. Alahan ka hina kango leili tesol kinem?’

<sup>28</sup> “I ukek, ‘Tel seilon i watakai hawane nga i seini kango.’

“Lato kamei i, ‘Paham amite nahih sohuti hat-apo kango?’

<sup>29</sup> “Tuahe i ukek, ‘Kumahe, uke na amuto sohuti kango, amuto sohuti hetekie tunahi peteta.

<sup>30</sup> Tiliwen lato xex hetekie atengi tataen ti tahi-wiai ane peteta. Ape nga talo teka unauak sohuti apuhini luimu kango. Imuh lato apuhini peteta hani tehu ing ti tone an.’ ”



*Menge waki lilieu**Mk 4:30-32; Lk 13:18-19*

<sup>31</sup> Jises kaxi ulea tenen meng i ukek, “Aweisal ti Haeu neini seilon tin masin tel seilon i waxi tehu waki lilieu ape i seini.

<sup>32</sup> I pate kokol ti lawe waki pata tuahe ti i xexewa i pamu lapan ti lawe pata ape teka manixux atai ingalaha he ngaxon.”

*Menge ist**Lk 13:20-21*

<sup>33</sup> Jises kaxi ulea tenen, “Aweisal ti Haeu neini seilon tin masin ie. Tel hehin i waxi teik kokole ist ape i talini hani he palawa. Kalak teik ist kokol, i haxiwa palawa hatehu.”

*Jises kaxi haxewa menge peteta ma kango*

<sup>34</sup> Jises lawe kaxi meng ti hanau teka seilon sale nenein ti Haeu. Ti lawe i kakane laha i hapuasa meng.

<sup>35</sup> I aile ukek lehe i hapoponowi hawane waliko ti tel kuluiwai kakai Haeu kakawen. I ukek, “Nga kaxi meng na nga kakane laha.

Nga kakane laha waliko ti laha tai tioi hutuima ti Haeu tanomi lawe waliko.” (Ps 78:2)

<sup>36</sup> Ti Jises saliliwa teka laha apupuha, i soh hani leili ing ape tesol kahikahin kamei i, “Kaxi hanima amite salangawe menge kango ti leili tesol kin.”

<sup>37</sup> Jises pahoi lato, “Tel seilon seiniai peteta i tu kikilami nga tel Nati Seilon.

<sup>38</sup> Tesol kin se lawe xux itan ie. Peteta se teka unauai Haeu a kango se teka unauai Satan.

<sup>39</sup> Tel seilon i seini kango ien se Satan. Ngain ti tahiwiwai ane peteta i kikilami tapoi lawe xux itan

ie. Tekā unāui tel tame kin se teka engel, spirit solian ti Haeu.

<sup>40</sup> “Ti teka seilon sohuti lui kango se masin wānen nā laha aile ti tapoi lawe xux itan ie.

<sup>41</sup> Nga tel Nati Seilon, nga talo teka unauak engel apuhiniaī teka seilon laha aile haputa teka liai mā teka laha aile saun lialun.

<sup>42</sup> Ape lato towi laha hani tehot ah lalap. Tesol ien laha tang lialu ape atalahi nisulaha nake pate moloan.

<sup>43</sup> Ape teka seilon ti Haeu laha kamakam hanowī alon he tesol tone Haeu. Nā amuto hina taxing ti hongoi kakain, hongoa!

### *Menge waliko tenen pate tuah wānen*

<sup>44</sup> “Aweisal ti Haeu neini seilon tin masin tel seilon tihini muneni waliko pate tuah leili hep-  
ekeun. Ape tel liai tahiwi tunahi. Pate i amuam hawane ape i tihini aliake. I nahih hangaini hatapo soxian ape i kahui teik hepekeun ien.

<sup>45</sup> “Aweisal ti Haeu neini seilon tin masin tel seilon i upia teik waliko pate tuah.

<sup>46</sup> Tataen ti i tunahiwa, i nahih hangaini hatapo soxian ape i kahui teik waliko ien.

### *Menge tehu ka*

<sup>47</sup> “Aweisal ti Haeu neini seilon masin teka seilon towi tehu ka hani itax ape lato tike kilan xixi tenen tenen.

<sup>48</sup> Lato itini hani peixux ape hiniti, xixi solian hani leili po ape xixi lialun lato xoini.

<sup>49</sup> Tin masin wānen taun ti tapoi lawe xux itan ie, teka engel ti Haeu hiniti seilon.

<sup>50</sup> Ape laha towi seilon lialun hani tehot ah lalap. Tesol ien laha tang lialu ma atalahi nisulaha nake pate moloan.”

*Nauna haun ma wasan*

<sup>51</sup> Jises kamei tesol kahikahin, “Amuto xewan waliko ti nga kakak?”

Lato ukek, “Se, amite xewawen.”

<sup>52</sup> Ape i ukek, “Teteka hanau nauna ti Moses lato hong usi ma hanau nauna ti Haeu ti imat ma aope, lato masin tame tehu ing. I pon hapuasai waliko haun ma wasan he tesol tone auniai soxi.”

*Teka Nasaret watakai hongoi kakai Jises*

*Mk 6:1-6; Lk 4:16-30*

<sup>53</sup> Ti Jises kaxi kewa meng hani lato i nahih salili tesol ien.

<sup>54</sup> I alia hani tesol puki tonan ti Nasaret. I nahih soh hani synagog ape i hanau teka seilon. Teka laha hongohong laha ongake hawane waliko ti i kakak ape laha ukek, “I kekema anesoan ia? Alahan i pon aile hasohotui waliko tenen poh ti seilon kum pon ailean?”

<sup>55</sup> I tuahe nati tel atai ai ing. I tel nati Mary ma ukale Jeims, Josep, Saimon ma Judas.

<sup>56</sup> Nakon tesol tuan kumahe tin lato toto ie? Lawe waliko ien i kema ia?”

<sup>57</sup> Aile ape laha watakai hongoi kakaian.

Jises hone laha, “Nga masin tel kuluiai kakai Haeu. Ti toan liai seilon sameni i tuahe ti puki tonan wanen laha watakai hongoi kakaian.”

<sup>58</sup> Ape Jises kum aile hakila puasain ti poh hani laha nake laha tap namil xoxoan hani i.

# 14

## *Matei Jon Baptis*

*Mk 6:14-29; Lk 9:7-9*

<sup>1</sup> Lokon ien, Herod tel masiwi ti Galili hong tunahi menge Jises.

<sup>2</sup> I kakane teka masiwi laha pupuas hahitakan, “Ie se Jon Baptis i moih aliawen. Aile ape i hina poh ti ailei waliko tenen lalap ti seilon kum pon.”

<sup>3</sup> Ti imat, Herod talo teka unauan xinoti kalabusiai Jon. Herod tel i xuina Herodias, axoi tel ukalan Pilip.

<sup>4</sup> Aile ape Jon Baptis lawe i to kaakane Herod, “Kumahe wanen sawisawin o uke axoam Herodias!”

<sup>5</sup> Herod pahan i telei Jon, tuahe i mamata teka Ju nake laha ukek Jon i tel kuluiai kakai Haeu.

<sup>6</sup> Tehu ngain ti nameniai telao Herod takah, tel nati Herodias hehin denis hani teka seilon laha apupuha ti angiaian. I hamuamua hawane Herod.

<sup>7</sup> Aile ape Herod kak tuoha hani i, “Waliko tenen na paham, nga hani o!”

<sup>8</sup> Ape i usi namili tel tinan i ukek, “Hanima nga pati Jon Baptis. Lohi hanima he tehu kapi!”

<sup>9</sup> Namili Herod sihikuk hawane tuahe i kak tuoha haniwen tel hehin ti puli lawe seilon ka i hani i waliko tenen na pahan.

<sup>10</sup> I talo tel unauan nahih hani ingi kalabus ti koti xaxaweniai kinawe Jon Baptis.

<sup>11</sup> I hana pati Jon leili tehu kapi, i kau hani tel hehin ape i hani tel tinan.

<sup>12</sup> Imuh tesol kahikahi Jon nahima. Lato waxi mewenae tupuan ape tihini auni. Muhin lato nahih hone Jises.

*Jises axi ani 5,000 seilon**Mk 6:30-44; Lk 9:10-17; Jn 6:1-15*

<sup>13</sup> Tataen ti Jises hong tunahiwa waliko ti i sohot hani Jon, i ku he tea koap ape i salili tesol ien hani tesol tahain. Teka seilon leili taon hongoa, laha nahih usi i.

<sup>14</sup> Ti Jises mosua he tea koap, i ningahi kilan wanen seilon. I tahane hawane laha ape i haewia teka tinun.

<sup>15</sup> Ti ape alohah, tesol kahikahi Jises nahih hani kapin, lato hone i, “Pate ape alohah a tap toan ie. Taloa teka seilon hani toan lehe laha kahui analaha.”

<sup>16</sup> Jises hone lato, “Kumahe, laha kum nahih salili kako. Amuto axiwa analaha.”

<sup>17</sup> Lato hone i, “I kum pon! Toi amite tepanimawe Bret ma huok xixi.”

<sup>18</sup> Jises ukek, “Kau hanima nga.”

<sup>19</sup> I hone teka seilon to haniai he pahoah. I waxi tepanim Bret ma huok xixi. I pax hani patul, i kak kemulik hani Haeu ape i wiki. I hani tesol kahikahin ape lato sei hani teka seilon.

<sup>20</sup> Laha hatesol ang ahoi hawane. Ape huopanim huohu po moxe an tutuen ti tesol kahikahi Jises apuhiniwa.

<sup>21</sup> Mongohe seilon laha angiang sai 5,000, tai wexe teka hehin ma akaik.

*Jises nanahih patul he kanitax**Mk 6:45-52; Jn 6:16-21*

<sup>22</sup> Muhin Jises hone tesol kahikahin langai imat tetan hani liai tepaun ti kanitax Galili he koap. Ape i talo aliake teka kilai seilon.

<sup>23</sup> Mewenae i nahih hani patul he tehu maunten ape i lotu. Ti ape alohah, Jises mewenae i tutuen.

<sup>24</sup> Lokon ien tea koap ape i xauwen. Laman hapa ahuhahu tea koap nake aupol ah suei i.

<sup>25</sup> Sikole letu ti teik tilokoan tutuen, Jises nahiwa patul he kanitax hani kapi tesol kahikahin.

<sup>26</sup> Ti tesol kahikahin ningahiwa i nanahih patul he kanitax, lato mamata hawane ape lato tilol ausisini, “Tel manu!”

<sup>27</sup> Jises hone hamatua lato, “Haxoxoa namilomuto! Se nga. Kum maamata!”

<sup>28</sup> Pita hone i, “Tel masiwi, na salan wanen o, honema nga nahih patul he kanitax hani kapim.”

<sup>29</sup> Jises ukek, “Nahima!”

Pita mos he tea koap ape i hutui nahih patul he kanitax hani kapi Jises.

<sup>30</sup> Tuahe ti i ilameniwa kuiai aupol, i mamata ape lehe i taxix. I tilol ausini, “Tel masiwi, hualima nga!”

<sup>31</sup> Kiliwan wanen Jises tuliniwa minan, i akeni Pita ape i ukek, “Nake lahan namilom wakul alia tetak?”

<sup>32</sup> Ti lalu ku haniwa he tea koap, aupol mat.

<sup>33</sup> Tesol kahikahin he tea koap lokuha hani Jises. Lato ukek, “Salan wanen o tel Nati Haeu!”

*Jises haewia teka tinun ti texux xux Genesaret  
Mk 6:53-56*

<sup>34</sup> Ti lato meiwa liai tepaun ti kanitax Galili, lato mos he tea koap hani Genesaret.

<sup>35</sup> Ti teka seilon ti tesol ien paxai tioiwa Jises, laha sawateni kakain hani teka seilon leili lawe toan. Kilan seilon hakahita teka tinun hani kapin.

<sup>36</sup> Laha kamei eliel i na ewi teka tinun tua soti ngixi puxuaun. Ape teka laha soti, laha ewi.

## 15

*Jises hahanau sale usiai nauna ti Haeu*

*Mk 7:1-13*

<sup>1</sup> Lokon ien teka Parisi ma teka hanau nauna ti Moses laha nahima Jerusalem hani kapi Jises. Laha kamei i,

<sup>2</sup> “Alahan tesol kahikahim kum aile usi nauna ti teka matahaun? Ti lato ang, lato tai nuhi mi-nalato.”

<sup>3</sup> Jises hone lato ukek, “A alahan amuto kum hong usi nauna ti Haeu ape amuto usi puki saun ti amuto?”

<sup>4</sup> Haeu ukek, ‘Hong tamaniwa kakai tamam ma tinam ape aile hasolia haniwa lalu. Na o kak halialu tamam ma tinam, o laha telei.’ *(Exod 20:12, 21:17)*

<sup>5</sup> Tuahe amuto ukek se ewi na seilon kum huali tamalaha ma tinalaha na teik huhual ti hualialalu laha haniwen Haeu.

<sup>6</sup> Amuto hanau ukek ien ape seilon kum huali tamalaha ma tinalaha. Ti amuto aile ukek ien, kumahe amuto usi kakai Haeu, amuto hak-outama saun tenen puki ti amuto.

<sup>7</sup> Amuto seilon tenen lehomuto huoka! Aisaia tel kului ai kakai Haeu, kakai an sawisawin ti i kakak amuto. I ukek,

<sup>8</sup> “Teka seilon sameni nga ti tuahe awalaha a namilolaha pate xauxaun tetak.

<sup>9</sup> Kumahe salan laha lolotui nga.

Laha hanau waliko ti puki seilon namiloi tanomi.’ ” *(Isa 29:13)*

*Waliko tenen i haloloa seilon**Mk 7:14-23*

<sup>10</sup> Ape Jises tiloi apuhini teka kilai seilon. I kakane laha ukek, “Amuto hongoa lehe amuto xeu.

<sup>11</sup> Waliko ti i soh nonoa he awamoto, i kum haloloa amuto. Mewenae waliko tenen na i ahutama he awamoto, i haloloa amuto.”

<sup>12</sup> Imuh tesol kahikahin nahih hani kapin. Lato kakane i ukek, “O tiori ka waliko ti o kakak i hakawata tiai teka Parisi?”

<sup>13</sup> Jises hone lato ukek, “Lawe pata ma pahoah ti kumahe tel Tamak Haeu seini, i sohuti xaxaweni.

<sup>14</sup> Aile ape maluhewa lato! Lato masin seilon tenen pulaxa neinia i teka pulaxa. Na masin tel pulaxa neini tel pulaxa liai, ati lalu put hani leili wal.”

<sup>15</sup> Ape Pita ukek, “Nexi haxewa hanima amite salangawe teik kakain ti o kakak.”

<sup>16</sup> Jises ukek, “Tin amuto tai xeu tutuen?”

<sup>17</sup> Nakon amuto kum tiori ka waliko tenen i soh nonoa he awamoto i tamus hani he puhuamoto? Imuh ape i ahuta hani melal.

<sup>18</sup> Tuahe lawe waliko i ahutama he awamoto i ahuma he atemuto. Ape tesol waliko ien i haloloa amuto.

<sup>19</sup> Waliko lialun ti i ahutama leilomuto se tetesol: namil lialun, na ulini ape telei seilon, xuina i axoi seilon liai, saun lialun ti wawan hehin, xuxuina, puputa ma kak halialui seilon liai.

<sup>20</sup> Tesol waliko ien lawe i haloloa seilon. Tuahe na seilon kum nuhi min ape i ang, Haeu kum namiloi ukek ka tenen ien i haloloa seilon.”

*Jises huali tel hehin kumahe Ju**Mk 7:24-30*



<sup>21</sup> Jises nahih salili ien ape i nahih hani tesol toan xohixohin Taia ma Saidon.

<sup>22</sup> Tel hehin i kumahe Ju toto ien. I nahih hani kapi Jises ape i kamei eliel ukek, “Tel Masiwi kahi nati David, tahanema nga! Spirit lialun kapiti halialuen tel natuk hehin.”

<sup>23</sup> Tuahe Jises tai kak pahoi i na tenen. Ape tesol kahikahin kamei i ukek, “Talo aliakewa tel hehin nake i kak hakatole kako.”

<sup>24</sup> Jises hone tel hehin ukek, “Tel Tamak Haeu taloma nga ti hualiai teka Ju nake laha masin teka sipsip tap ngahatalaha, a o kumahe Ju.”

<sup>25</sup> Tel hehin lokuha hani kapi aen ape i ukek, “Tel masiwi, hualima nga!”

<sup>26</sup> Tuahe i kakane tel hehin ukek, “Kumahe so-lian na tel i waxi ani natun ape towi hani ani sinen.”

<sup>27</sup> A tel hehin ukek, “Salan wanen, tel masiwi. Tuahe sinen ani peni tamalaha na i put hani itan.”

<sup>28</sup> Jises kakane tel hehin ukek, “Namilom salan xoxoan wanen tetak! Nga aile usi waliko tenen paham.” Ape tel natun i ewi huluta tataen ien.

### *Jises haewia kilan seilon*

#### *Mk 7:31-37*

<sup>29</sup> Jises nahih salili tewau toan ien ape i nahih xohi hani kanitax Galili. I nahih hani patul he tehu maunten ape i to ien.

<sup>30</sup> Kilan wanen seilon hakahita hani kapin teka laha nahih tawen, teka pulaxa, teka waxosi, teka laha wix tawen ma kilan teka liai. Laha hana teka tinun hani kapi ae Jises ape i haewia laha.

<sup>31</sup> Teka seilon ongake hawane ti laha ningahiwa teka laha wix tawen ape laha kak uke, teka waxosi

laha ewi, teka laha nahih tawen laha nahih uke ape teka pulaxa laha paxapax. Ape laha sameni Haeu ti Israel.

*Jises axi ani seilon laha akulai 4,000*

*Mk 8:1-10*

<sup>32</sup> Jises tiloi tesol kahikahin ape i ukek, “Nga tahane hawane teka seilon ie nake laha kapik kewen ngain toluhu a laha tap an. Nga kum talo aliake laha hetekie hitolo, uke laha akimatu he aweisal.”

<sup>33</sup> Tesol kahikahin kamei i, “Ti he lohong ie, kako kema an ia ti axiai ani teka lawalawai seilon?”

<sup>34</sup> Ape Jises kamei lato, “Hil bret toi amuto?”

Lato ukek, “Tepanim huaik ma tok palai xixi kokol.”

<sup>35</sup> Jises hone hatesol seilon ka to haniwa itan.

<sup>36</sup> I waxi tesol tepanim huaik bret ma tok palai xixi ape i kak kemulik hani Haeu. I wiki, i hani tesol kahikahin ape lato hani tesol kilai seilon.

<sup>37</sup> Laha hatesol ang ahoi hawane. Muhin, ti tesol kahikahi Jises apuhiniwa moxe an, i sohotua po tepanim huohu.

<sup>38</sup> Mongohe teka seilon laha angiang sai 4,000, tai wexe teka hehin ma akaik.

<sup>39</sup> Muhin ien Jises talo aliake teka kilai seilon. Ape i ku he tea koap hani texux xux Magadan.

## 16

*Tesol Parisi ma Sadusi kamea kolakol*

*Mk 8:11-13; Lk 12:54-56*

<sup>1</sup> Teka Parisi ma teka Sadusi nahih hani kapi Jises ape pahalaha hauhe i. Laha ukek, “Kola han-ima amite pohem lehe amite tioi ka Haeu taloma o.”

<sup>2</sup> Tuaehe Jises pahoi lato ukek, “Na amuto paxai loloi al maun kakan, amuto ukek letu se hunawi ape salan.

<sup>3</sup> Ape na amuto paxai maun kakan ma polun ti pate letu, amuto ukek tetelao hunaxa. Salan amuto tioi hunan na amuto paxai maun tuahe amuto kum tioi salangawe waliko ti i sosohot aoape, waliko ti nga ailele.

<sup>4</sup> Teka seilon ti aoape ie pate lialun ma xauxaun ti Haeu. Nga kum kola hani amuto kolakol ti poh. Mewenae kolakol ti Haeu kola hani amuto se waliko ti i sohot haniwen Jona tel kuluiwai kakai Haeu!” Ape Jises nahih salili laha.

### *Ist ti Parisi ma Sadusi*

#### *Mk 8:14-21*

<sup>5</sup> Tataen tesol kahikahi Jises lang haniwa liai tepaun ti kanitax Galili, lato upia tunahi ka lato maluhewen analato bret.

<sup>6</sup> Jises hone lato, “Kanipetiwa! Lepeta hawanewa ist ti teka Parisi ma teka Sadusi.”

<sup>7</sup> Tesol kahikahin kakak alia wasolalato ukek, “I kak ukek nake kako maluhe anakako bret.”

<sup>8</sup> Jises tioi waliko ti lato kakak, aile ape i kamei lato, “Alahan amuto kakak ka tap anamoto bret? Namilomuto kumahe xoxoan tetak.

<sup>9</sup> Tin amuto tai xeu? Amuto kum nameni ti nga waxi tepanim bret hani ani teka seilon laha akulai 5,000? Amuto kum nameni hil po moxe an ti amuto apuhini?

<sup>10</sup> Ape ti tepanim huaik bret ti nga hani ani teka seilon laha akulai 4,000? Amuto kum nameni hil po moxe an ti amuto apuhini?

<sup>11</sup> Ala amuto tioiwa kumahe nga kakak sale bret. Kakaiak nga ukek amuto lepeta hawanewa ist ti teka Parisi ma teka Sadusi.”

<sup>12</sup> Tataen ien tesol kahikahin tioi ka kumahe i kakak kanipetiai ist ti ailei bret, tuahe i kakak lato kanipetiwa teka Parisi ma Sadusi nake laha hanau puluti seilon.

*Pita tioi ka Jises i Krai*

*Mk 8:27-30; Lk 9:18-21*

<sup>13</sup> Jises nahih hani toan leili Sisaria Pilipai ape i kamei tesol kahikahin, “Tek a seilon laha ukek nga tel Nati Seilon, aita wanen?”

<sup>14</sup> Lato ukek, “Tek a laha ukek o Jon Baptis. Tek a liai ukek o Elaija ape teka liai ulea ukek o Jeremaia ma na tel liai ti teka kuluiai kakai Haeu.”

<sup>15</sup> I kamei lato, “A puki amuto ukek nga aita?”

<sup>16</sup> Saimon Pita ukek, “O Krai, tel Nati Haeu. Haeu tel tap tahi matean!”

<sup>17</sup> Jises ukek, “Saimon tel nati Jona, tanusik o nake tap tel seilon kakane o nga aita. Tel Tamak Haeu hani o teik namil ien.

<sup>18</sup> Pita, o masin teik hepekeun ailan. Masin ti tel seilon atai ingan patul he hepekeun ailan, het-ekie huhual tetam nga aile hasohotu teka seilon kahikahik hahitake axak. Ape tap tenen waliko i xoini laha, kalak pohe Satan.

<sup>19</sup> Nga hana o tel neinia i teka seilon hani Haeu lehe laha sohot kahikahik. Waliko tenen o halini ti itan ie, Haeu tin i halini. Waliko tenen o waheni teka kahikahik aile ti itan ie, Haeu tin i waheni.”

<sup>20</sup> Ape Jises hone tesol kahikahin kum kaakane teka seilon liai ka i Kraiss, tel Haeu taloma.

*Jises kak kilami matean*

*Mk 8:31-9:1; Lk 9:22-27*

<sup>21</sup> Lokon ien Jises hutui kakane tesol kahikahin ukek, “Nga nahih hani Jerusalem. Ti ien teka masiwi ti teka Ju, teka masiwi tuah ti hukuminiai Haeu ma seilon, ma teka hanau nauna ti Moses, laha axi nga kawatan ma moloan lalap. Laha telei nga tuahe muhi ngain toluhu nga xahat alia.”

<sup>22</sup> Pita waxi siaini Jises ape kahiloloi i. I ukek, “O kum kak ukekek ien. Waliko ien kum sosohot wanen hani o!”

<sup>23</sup> Jises tohea paxai tesol kahikahin ape i kak kahiloloi Pita, “Tahawa! O kak hanowi Satan! O tiehi aweisaluk. Namilom kumahe i ahuma ti Haeu, i ahuma ti seilon.”

<sup>24</sup> Ape Jises hone tesol kahikahin, “Na seilon pahan sohot kahikahik, laha kum namilo wawaxi mewenae laha. Laha kua kawatan masin ti nga kakau. Ien i kola ka laha kahikahik wanen.

<sup>25</sup> Seilon teka namilolaha mewenae hasoliai tonalaha ti itan ie, laha kum tunahi tonain kapi Haeu. Tuahe teka na laha hana tonalaha hahitake nenein ti Haeu nake nga, laha tunahi tonain kapi Haeu ti tap tahi tapoan.

<sup>26</sup> Na tel seilon hapono hatapo i waliko ti itan ie tuahe i lioi tonain kapi Haeu, solian la i uke? Tap. Tap tenen waliko kahui uke tonain kapi Haeu.

<sup>27</sup> Nga kakane amuto tetenen nake nga tel Nati Seilon alia hetekiema poh ma xewai tel Tamak Haeu ma teka engel, spirit solian tetan. Tataen ien nga kahui hapoponowi hani teka seilon tenen tenen ti laha ailewen.

28 Nga kakane hawane amuto, teka ti amuto ie, amuto kum matemu atengi tataen amuto ningahi nga tel Nati Seilon neini teka seilon.”

## 17

*Tanome Jises sohia hawane*

*Mk 9:2-13; Lk 9:28-36*

1 Muhi ngain tepanim tehu tamusua, Jises hakahita tolu kahikahin Pita ma hahutalin Jeims ma Jon hani he tehu maunten patul ti mewenae lato.

2 Ti lato ien, tanome Jises i sohia. Kawan kama-kam hawane hanowi alon a puxuaun paxaxu talepalep hawane.

3 Hahutuia hawane Moses ma Elaija take hani kapi lato ape lalu kakak kapi Jises.

4 Ape Pita hone Jises ukek, “Tel masiwi, pate ewi ti kako ie! Na o waheni, nga atai toluhu houha, tehu tetam, tehu ti Moses ma tehu ti Elaija.”

5 Ti Pita kakak, teik maun tenen xewan wanen man atuhi lato. Ape kakai Haeu i ahuma he maun ien, i ukek, “Tel seilon ie se Natuk pate nga waheni. Nga amuke hawane i. Hong usiwa kakaian!”

6 Ti tolu kahikahi Jises hongoa, lato mamata hawane ape lato eng kalunga muneni kawalato.

7 Jises nahih hani kapi lato. I aka soti lato ape i ukek, “Xahatale! Kum maamata!”

8 Ti lato xeisale, tap seilon kapi Jises, se ape mewenae i.

9 Ti lato momosua he tehu maunten, Jises kakane eliel lato i ukek, “Kum kakaxi hani tel na seilon waliko ti amuto ningahiwen atengi tataen nga tel Nati Seilon xahat alia ti mateak.”

<sup>10</sup> Tesol kahikahin kamei i ukek, “Nake lahan teka hanau nauna ti Moses ukek ka Elaija i sohotumu imat ti Kraiss?”

<sup>11</sup> Jises ukek, “Salan wanen, tel masin Elaija i sohotumu apeseniai teka seilon imat ti Kraiss sohot.

<sup>12</sup> Tuahe nga hone amuto, tel masin Elaija i sohotuen, tuahe teka seilon kum paxai tioi. Laha aile haliulu i. Tin masin kawatan ma moloan ti na laha aile hani nga tel Nati Seilon.”

<sup>13</sup> Tataen ien tesol kahikahin hong tioi ka i kakak Jon Baptis, tel i sohotuma imat ti Kraiss.

*Jises haewia tel akaik wawan spirit lialun kapiti hahaliulu*

*Mk 9:14-29; Lk 9:37-43*

<sup>14</sup> Ti lato tahia haniwa itan, kilan seilon apupuha ien. Tel seilon nahih hani kapi Jises ape i lokuha hani kapi aen.

<sup>15</sup> I ukek, “Tel masiwi, tahanema tel natuk! Pate i lamani moloan ape i taxitaxia. Hina lawe i put hani leili kan ma he ah.

<sup>16</sup> Nga hakahitawen i hani kapi tesol kahikahim tuahe lato kum haewia uke i.”

<sup>17</sup> Jises ukek, “Amuto teka seilon ti aoape ie tap namil xoxoan ti Haeu ma saun ti amuto pate lialun. Nga to kapimuto ma hanau kueiniwen amuto. Kaie kuehuan ia pahamuto nga to kapimuto lehe namilomuto xox tetak? Ati hanima nga tel akaik!”

<sup>18</sup> Ape Jises tumei xaxaweni spirit lialun ti i aile hahaliulu tel akaik. Tataen ien wanen i ewi.

<sup>19</sup> Muhin ien tesol kahikahi Jises nahih hani kapin ti tesol mewenae i ape lato kamei, “Nake

lahan amite kum xaxaweni uke spirit lialun ti tel akaik?”

<sup>20</sup> Jises pahoi lato ukek, “Nake amuto tap namil xoxoan ti Haeu. Nga kakane hawane amuto, kalak na xoxoi namilomuto ti Haeu lapan waki lilieu, amuto pon kak naxiai tehu maunten ie ape i naxia. I pon amuto aile lawe waliko!”

<sup>21</sup> Ape Jises tili kakaian, “Spirit lialun tenen ien mewenae na amuto halini an hualiai lotu i pon xaxawenian.”

*Jises kak ulea sale matean*

*Mk 9:30-32; Lk 9:44-45*

<sup>22</sup> Ti tesol kahikahi Jises apuha haniwa Galili, Jises hone lato, “Nga tel Nati Seilon, imuh laha hana hani mini teka seilon laha watakai hawane nga.

<sup>23</sup> Laha telei nga ape muhi ngain toluhu nga xahat alia.” Tesol kahikahin lolato tel hawane.

*Towiai moni hani Ingi Haeu*

<sup>24</sup> Ti Jises ma tesol kahikahin nahih haniwa Kapenaum, teka waxiai moni ti ailei puasain leili Ingi Haeu, laha nahih hani kapi Pita ape kamei i, “Jises, tel masiwi ti amuto, i totowi moni hani Ingi Haeu?”

<sup>25</sup> Pita pahoi lato “Se, i axiaki.” Ape i nahih hani leili tehu ing Jises toto.

Jises kak suei non i, “Saimon o namilo i ukek ia? Ti teka masiwi waxi moni, laha waxi ti teka akikilaha ka ti teka liai?”

<sup>26</sup> Pita pahoi i ukek, “Teka seilon liai.”

Ape Jises ukek, “Na masin ien, teka akikilaha kum towi moni.



<sup>27</sup> Tuae kumahe pahakalu aile halengealaha. Nahih haniwa peixux ape towiwa tehu kapetum haniwa itax. Tok xixi uli o ahetiwa, heiwa awan ape o tunahi tehu moni. Waxiwa ape kau haniwa Ingi Haeu, ati ti kalu.”

## 18

### *Aita tel pate tuah?*

*Mk 9:33-37; Lk 9:46-48*

<sup>1</sup> Ti lokon ien tesol kahikahi Jises kamei i, “Aita tel pamu tuah leili teka seilon ti Haeu neneini?”

<sup>2</sup> Jises tiloi hatuhi tel akaik matalato.

<sup>3</sup> Ape i ukek, “Nga kakane hawane amuto, na amuto kum towiahu ti lialui woumuto ape sohot hanowi akaik kokol, amuto kum tuai uke teka seilon ti Haeu neneini.

<sup>4</sup> Aile ape na tel seilon i teheni i hanowi tel akaik ie, i tel pate tuah leili teka seilon ti Haeu neneini.

<sup>5</sup> “Na tel i waxi auni akaik masin ie nake nga, se i aunini nga.

<sup>6</sup> Tuae na tel i aile haputa tel seilon kalak i seilon naun ma namilon kumahe xoxoan tetak, pamu ewian na laha xinoti tehu mes lalap he kinawen ape hataxixi hani ilam.

<sup>7</sup> “Pate lialun wanen ti teka seilon, nake kilan waliko lialun i tohongi haputa laha. Tesol waliko ien liai i sohot, tuahe pamu lialuan ti teka seilon laha aile haputa seilon liai.

<sup>8</sup> Na amuto hapuasa tepaun minamuto ma na aemuto ailei saun lialun, koti xaxaweniwa. Pamu ewian na amuto uke tonain kapi Haeu ti tap tahi tapoan ti minamuto ma na aemuto tepaunue. I se pamu ewian ti na Haeu towi amuto hetekie

minamoto ma na amuto hupaun hani tesol ti tehot ah xekean tap tahi pehoan.

<sup>9</sup> Na amuto hapuasa tepaun pulamoto ailei saun lialun, axixi xaxaweniwa. Pamu ewian na amuto uke tonain kapi Haeu ti tap tahi tapoan ti pulamoto tepaunue. Ien se pamu ewian ti na Haeu towi amuto hetekie pulamoto hupaun hani leili tehot ah, tetesol ti kawatan tap tahi tapoan.

<sup>10</sup> “Amuto kum paxai wawasi seilon tenen teka liai ukek laha kaliap. Nga hone amuto, teka engel ngahatialaha pon kaxialaha hani tel Tamak Haeu, tuahe na telao.”

*Menge tok sipsip i nahih mitaxia*

*Lk 15:3-7*

<sup>11</sup> Jises kakane tesol kahikahin, “Nga tel Nati Seilon sohotuma neinia i teka seilon hani Haeu, teteka laha xauxaun tetan nake ti lialui woulaha.

<sup>12</sup> Amuto namiloi ukek ia? Na masin tel seilon i hina 100 sipsip ape tok i nahih mitaxia, hoi liai i nahih salili tesol 99 ape i nahih upia tok i mitaxiawen.

<sup>13</sup> Na masin i tunahiwa, nga kakane hawane amuto, i amuke hawane i akulai amukei tesol 99 lato tai mitaxia.

<sup>14</sup> Tin masin tel Tamak Haeu wataakai wanen kalak tel seilon naun ti teka seilon tetan nahih mitaxia ape i selaia tetan.”

*Na tel i aile saun lialun*

<sup>15</sup> Jises kak ulea ukek, “Na tel kahikahik aile saun lialun hani tel ti amuto, nahih haniwa kapin ti mewenae amulu ape kak nexi haniwa i saun lialun ti i aile. Na masin i hong waheni kakaiaam, o aile hasoliawen wasolamulu.

<sup>16</sup> Tuae na i hong watakai kakaiaam, waxiwa tel ma na hua seilon liai lehe tel ma na hua hong paxai kakaiaamulu.

<sup>17</sup> Ape na i kum hong, kakanewa teka kahikahik liai. Na tin i kum hong teka kahikahik liai, ien, paxai tioiwa ka i masin tel i kum soh ti Haeu ma tel ti woun lialun wanen.

<sup>18</sup> “Nga kakane hawane amuto tesol kahikahik, waliko tenen amuto halini ti itan ie, Haeu tin i halini. Waliko tenen amuto waheni seilon aile ti itan ie, Haeu tin i waheni.

<sup>19</sup> “Ape nga kakane aheke amuto, na masin hua ti amuto kamei Haeu tenen na waliko hetekie namil teikawe, tel Tamak Haeu i aile hani amulu.

<sup>20</sup> Ape na hua ma na tolu lato apuha hetekie nake lato kahikahik, nga kapi lato.”

*Saun ti oxoxiai seilon ti kawatan ti waliko lialun laha aile*

<sup>21</sup> Imuh Pita nahih kamei Jises, “Tel masiwi, na tel seilon aile saun lialun hani nga, mongohun ia nga oxoxi i ti kawatan ti lialui woun? Tepanim huohu?”

<sup>22</sup> Jises pahoi i ukek, “Kumahe tepanim huohu, tap tahi tilian!

<sup>23</sup> “Nga kaxi tenen meng haxewaiam. Aweisal ti Haeu neini seilon masin tel masiwi ti pahan waxi aliakei moniun ti teka unauan.

<sup>24</sup> Imat wanen laha ati hani i tel seilon i tua kemu moniun lalap wanen, i pon kahi tel seilon na i pupuas ti ahang kilan.

<sup>25</sup> Tuae i tap moni ti hamatean. Aile ape tel masiwi hone teka unauan, ‘Hangainiwa tel seilon ien, tel axoan ma tesol natun hetekie hatesol soxian lehe nga uke aliake moniuk.’

26 “Tel unauan lokuha hani kapi aen ape kamei elieli, ‘Tahanema nga! Atengiwa pake nga hamate hatapo monium.’

27 “Tel masiwi tahane i ape hone i ukek, ‘Nga oxoxi o ti kawatan tetam. Kum hahamate moniuk.’

28 “Ape tel seilon ien nahih. I tunahi tel puas akatan, tel i tua kemu moniun pate kokol. Kakanua i pohi isihi kinawe tel puas akatan ape lungei i ukek, ‘Hamate hatapoa moniuk!’

29 “Tel puas akatan lokuha hani kapi aen ape kamei eliel i, ‘Tahanema nga! Atengiwa pake nga hamate hatapo monium.’

30 Tuaehe i watakai. Kakanua i hana tel puas akatan hani he kalabus atengi tataen na i hamate hatapo moniun.

31 “Ti teka puas akatan liai hongoa, lolaha lialu. Ape laha nahih hone tel masiwi waliko tenen i sohotuen.

32 Tel masiwi hongoa, i tiloi tel unauan kemuk i oxoxi ti kawatan tetan. I hone i, ‘O pate seilon lialun wanen! Nga oxoxiwen o ti kawatan tetam ape nga honewen o ka kum hahamate moniuk nake o kamei eliel nga.

33 Alahan o kum tahane tel puas akatam masin ti nga tahane o?’

34 Tel masiwi lon lialu hawane ape i hana tel seilon ien hani he kalabus atengi tataen i hamate hatapo moni ti i kewen.”

35 Ape Jises ukek, “Tel Tamak Haeu tin i aile hani amuto ukek ien na amuto kum oxoxi teka seilon liai ti kawatan ti waliko lialun laha aile hani amuto. Haeu pahan amuto aile hawanewa ti leili atemuto.”

# 19

## *Nakon ewi na seilon lioi axoan?*

*Mk 10:1-12*

<sup>1</sup> Jises kak hatapoa ape i nahih salili Galili hani toan ti sai Judia, liai tepaun ti kan Jodan.

<sup>2</sup> Kilan wanen seilon nahih kakahiti i ape i haewia teka tinun.

<sup>3</sup> Teka Parisi nahih kamei tohongi Jises, “Nakon ewi na tel wawan i lioi tel axoan ti tuahe na tenen?”

<sup>4</sup> Ape Jises pahoi lato ukek, “Nakon amuto kum tioi kakain leili pepai Haeu ka ti hutuan wanen Haeu tanomi wawan hetekie hehin?”

<sup>5</sup> Haeu ukek, ‘Aile ape tel wawan i salili tel taman ma tel tinan ape i hukuma hani kapi tel axoan. Ape lalu sohot hanowi seilon tel.’ (*Gen 2:24*)

<sup>6</sup> Lalu ape kumahe hua, lalu masin seilon telawe. Waliko ti na Haeu hukumini, seilon kum seselai.”

<sup>7</sup> Ape teka Parisi kamei i, “A alahan Moses kakawen ka ewi na tel wawan tai teik kakain ti sale lioiai tel axoan?”

<sup>8</sup> I kakane lato, “Moses sowini hani amuto sale lioiai axoamuto hehin nake hanauamuto pate ailan. Tuahe ti hutuan wanen Haeu hahalini.

<sup>9</sup> Nga kakane amuto, na tel wawan lioi tel axoan ti tel axoan tai aile saun lialun ti wawan hehin ape i waxi axoan tel hehin liai, tel wawan ien i ailewen saun lialun ti wawan hehin.”

<sup>10</sup> Tesol kahikahin hone i, “Na sale tone hahunatun pate ailan masin ien, pamu ewian kaha kum sal!”

<sup>11</sup> Jises ukek, “Kumahe hatesol seilon laha pon na laha kum sal, mewenae teka na Haeu huali laha.

<sup>12</sup> Salangawan tenen tenen teka na laha kum sal. Hina seilon laha kum sal nake soxi tinulaha ti tanomiaia akaik lialun ti laha takahama. Tekala laha kum sal nake seilon liai aile halialu soxi tinulaha ti tanomiaia akaik. Ape teka liai laha kum sal nake laha hani hatapo laha ailei puase Haeu. Tel na i hong xeu teik kakaiak, i hong waheni.”

*Jises lotu huali akaik kokol*

*Mk 10:13-16; Lk 18:15-17*

<sup>13</sup> Lokon ien teka seilon hakahita teka akaik kokol hani Jises. Pahalaha i hanawa minan he teka akaik ti lotu hualialato. Tuae tesol kahikahin kahiloloi teka seilon.

<sup>14</sup> Ape Jises ukek, “Tiliwen teka akaik nahih hani kapik, kum talo xaaxaweni lato. Seilon teka laha sohot hanowi teka akaik ie, Haeu neini aweisalulaha ape laha natun wanen.”

<sup>15</sup> Jises hana minan he teka akaik ti lotu hualialato ape i nahih salili tesol ien.

*Tel seilon uluha kilan soxi*

*Mk 10:17-31; Lk 18:18-30*

<sup>16</sup> Tel seilon nahih hani kapi Jises ape i ukek, “Tel masiwi, nga aile waliko la tenen solian lehe nga uke tonain kapi Haeu ti tap tahi tapoan?”

<sup>17</sup> Ape Jises kamei i ukek, “Nake lahan o kamei nga sale saun tenen solian? Na masin o kamei nga, namiloi paxaiwa nake mewenae Haeu solian ma i tioi waliko tenen solian. Na paham o uke tonain kapi Haeu ti tap tahi tapoan, hong usiwa nauna tetan.”

<sup>18</sup> I kamea, “Nauna la?”

Jises pahoi i, “Haeu ukek, ‘Kum tetelei seilon, kum ailele saun lialun ti wawan hehin, kum xuxuina, kum kau puputini kakain.

<sup>19</sup> Hongoa kakai tamam tinam ma aile hasolia haniwa lalu ma waheniwa seilon liai hanowi ti o waheni aliake o.’ ” *(Exod 20:12-16; Lev 19:18)*

<sup>20</sup> Tel seilon uluha ukek, “Nga usi hahatapo tesol nauna ien. Ape nga aile ulea waliko la?”

<sup>21</sup> Jises hone i, “Na paham Haeu namilo i ukek o seilon sawisawin wanen, nahih hangaini hatapoa soxiam ape moni haniwa teka seilon tap soxi lehe imuh o uke kahum ti tone Haeu. Ape nahih kahitima nga lehe o sohot kahikahik.”

<sup>22</sup> Tel seilon uluha hongoa, i nahih alia hetekie tatahan, nake soxian pate kilan ape i watakai na i hangaini.

<sup>23</sup> Jises hone tesol kahikahin, “Nga kakane hawane amuto, seilon tenen kilan soxi, pate ailan wanen ti usiai aweisal ti Haeu neneini.

<sup>24</sup> Nga kakane ulei amuto, ailan wanen ti tok kamel na i soh non he tewau aweing laha axai nil ti sawitiai maia tuahe pamu ailaiian ti seilon tenen kilan soxi ti usiai aweisal ti Haeu neneini.”

<sup>25</sup> Ti tesol kahikahin hongoa, lato ongake hawane, lato ukek, “Lehe ape aita pon usiai aweisal ti Haeu neneini?”

<sup>26</sup> Jises paxai lato ape i ukek, “Ti mewenae kui seilon i kum pon. Tuahe hetekie huhual ti Haeu, seilon pon.”

<sup>27</sup> Pita ukek, “Paxaiwa, amite tesol kahikahim salili hatapoen waliko ti amite ape amite kakahiti o. Kaie amite uke waliko la?”

<sup>28</sup> Jises kakane lato i ukek, “Nga kaxi haxewa hani amuto, taen ti Haeu aile sohi hasolia hatapo

lawe waliko, nga tel Nati Seilon nga uke tesol tonain ti neinia seilon hetekie poh ma xewai Haeu. Ape amuto tesol kahikahik, amuto uke tesol tonain ti kolongenai saun ti teka seilon ti Haeu.

<sup>29</sup> Ape hatesol teka laha salili tonalaha, ukalalaha, tualaha, tamalaha, tinalaha, natulaha ma na kinelaha nake laha kahikahik, laha uke pamu mongohuan, hetekie tonain kapi Haeu ti tap tahi tapoan.

<sup>30</sup> Tuaehe kilan teka axalaha lalap ti aoape ie, Haeu paxai ukek laha seilon tenen tap axalaha ape seilon ti tap axalaha ti aoape ie, Haeu paxai ukek laha seilon tenen axalaha lalap.”

## 20

### *Menge teka puasakei kin*

<sup>1</sup> “Aweisal ti Haeu neini seilon masin ie. Letuan tehu tel seilon nahih ngah seilon na laha puas he kinen.

<sup>2</sup> Ti i tunahawa, i hone laha ka i hani laha moni kahi puasain ti ngain tehu. Ape i talo laha puas he kin.

<sup>3</sup> “Sai letu tutuen i nahih hani tone apuhain ape i ningahi teka seilon tua tutu, tap puasalaha.

<sup>4</sup> I hone lato, ‘Amuto tin nahih puas haniwa he kinek. Ape nga hani amuto moni kahi puasain ti na amuto aile.’

<sup>5</sup> Ape laha nahih puas. I nahih ulea ti lape ngain ape tehu ti al paihua teik, i aile waliko tin tetenen.

<sup>6</sup> “Ti sai alohah i nahih ulea hani tone apuhain ape i ningahi hina seilon tua tutu ien. I kamei laha, ‘Alahan amuto tua tutu ie ngain hatehu, tap tenen waliko na amuto aile?’



7 “Laha ukek, ‘Tap tel seilon axiwen amite puasain.’

“Ape i hone laha, ‘Na masin ien, amuto nahih puas haniwa he kinek.’

8 “Ti pate alohah, tel tame tesol kin hone tel unauan, ‘Tiloima teka laha pupuas ape haniwa laha kahi puasalaha. Hutuiwa teteka nga hapuasa laha tapeinan.’

9 “Tekala laha hutui puasain ti sai alohah nahima ape i hani laha kahi puasain ti ngain tehu.

10 Tekala laha hutui puasain imat nahima. Laha sokok kahulaha pamu lapan ti teka liai tuahe tin i hani laha kahi puasain ti ngain tehu.

11 Laha waxiwa kahulaha ape laha lengeini tel tame tesol kin. Laha ukek,

12 “Tekala laha nahima puas tapeinan laha puasawen teik kukunan. Amite puas eliel ngain hatehu he kekei alon tuahe kahumite tekewe.’

13 “Tel tame tesol kin kak pahoi laha, ‘Oie, kumahe nga aile puluti amuto. Puki amuto wahreni nga hani amuto kahi puasain ti ngain tehu.

14 Ie, waxiwa kahumuto ape nahih alia haniwa tonamuto. Tekala nga hapuasa tapeinan nga hani laha moni mongohun tekewe masin ti nga hani amuto nake pahak nga aile ukek ien.

15 Nakon lialun na nga hapuasa moniuk usi tenen ti pahak? Nakon amuto lengeini nga nake nga ongawi hani teka seilon liai ape nga hani laha pamu i akulai lapan ti namilomuto?’ ”

16 Ape Jises ukek, “Kilan teka laha namilo ukek laha seilon pate tuah ti aoape ie, Haeu namilo ukek laha seilon pate naun. Ape teka laha namilo ukek

laha seilon pate naun, Haeu namilo i ukek laha seilon pate tuah.”

*Jises kak ulea sale matean*

*Mk 10:32-34; Lk 18:31-34*

<sup>17</sup> Ti Jises nahih hahaniwa Jerusalem, i kaxi hani tesol huopanim hua kahikahin waliko ti na i sohot hani i ien. I ukek,

<sup>18</sup> “Hongoa! Ti na ape kako Jerusalem laha hana nga tel Nati Seilon hani mini teka masiwi tuah ti hukuminiai Haeu ma seilon, ma teka hanau nauna ti Moses. Lato noseni teleiak.

<sup>19</sup> Lato hangaini nga hani mini teka seilon ti Rom. Laha soxeni nga, heti nga ma tahi hakea nga hani he kros ape nga mat. Tuae muhi ngain toluhu nga xahat alia.”

*Katekate ti tel tini Jeims ma Jon*

*Mk 10:35-45*

<sup>20</sup> Tel axoi Sebedi nahih hani kapi Jises hetekie hua natun wawan. I lokuha hani mateiwaun lehe i katei i tenen.

<sup>21</sup> Jises kamei i, “Paham waliko la?”

Tel hehin ukek, “Tataen o sohotua tel Masiwi ti neiniai hatesol seilon, pahak o hanawa huhua natuk ie kapim, tel tepaun manau, tel tepaun kalamau lehe lalu sohot masiwi ti neiniai seilon.”

<sup>22</sup> Jises hone hua natun, “Amulu kum tioi waliko tenen amulu kakamei. Nakon amulu lang pahoi uke laman ti ape nga lang pahoi?”

Lalu ukek, “Amili pon.”

<sup>23</sup> Jises hone lalu, “Salan imuh amulu lang pahoi laman ti nga lang pahoi. Tuae kumahe nga tel kilamiai seilon ti tone minak manau ma na

kalamau ti neinia i seilon. Tonain ien Haeu tel Tamak hani teka i kilamiwen.”

<sup>24</sup> Ti tesol huopanim kahikahin hongoa, lolato lialu hawane ti hahutalin.

<sup>25</sup> Jises tiloi apuhini lato hatesol ape i ukek, “Amuto tioi ka kewi teka masiwi ti he tehu pon ie, lato neini halialu teka seilon hahitakalato ape lato lungei laha ka tua hongoa lato.

<sup>26</sup> Tuahe saun tenen ien kewak i kum sosohot leilomuto. Na tel ti amuto pahan ax lalap, i sohot hawanewa tel ti hualiai seilon.

<sup>27</sup> Ape na tel ti amuto pahan i sohot seilon tuah, i kewa unauamuto hatesol.

<sup>28</sup> Tataen nga tel Nati Seilon, kumahe nga toma lehe seilon to unauak, nga toma unai seilon. Ape nga mat ti ukei kahi lialui woi seilon.”

*Jises haewia hua pulaxa*

*Mk 10:46-52; Lk 18:35-43*

<sup>29</sup> Ti Jises ma tesol kahikahin nahih saliliwa Jeriko, kilan wanen seilon kakahiti lato.

<sup>30</sup> Lokon ien, hua seilon pulaxa toto pape aweisal. Lalu hong ka Jises nanahima ape lalu tilol eliel, “Tel Masiwi, tel kahi nati David, tahanema amili!”

<sup>31</sup> Teka seilon tumei hapangisu lalu. Tuahe lalu tilol eliel ahe, “Tel Masiwi, tel kahi nati David, tahanema amili!”

<sup>32</sup> Jises tu hamalum ape i kamei lalu, “Pahamulu nga aile waliko la hani amulu?”

<sup>33</sup> Lalu ukek, “Pahamili amili paxapax.”

<sup>34</sup> Jises tahane hawane lalu ape i akeni soti pulalalu. Tataen ien wanen pulalalu ewi ape lalu nahih kahiti i.

## 21

*Jises soh hani Jerusalem*

*Mk 11:1-11; Lk 19:28-44; Jn 12:12-19*

<sup>1</sup> Ti Jises ma tesol kahikahin nahih xohi haniwa Betfage, pape tehu Maunt Oliv, ti kane Jerusalem, i talo hua kahikahin imat tetan.

<sup>2</sup> Ape i hone lalu, “Amulu nahih haniwa tewau toan mateiwaukako. Amulu ningahi tok donki hehin hetekie tok natun ien, xinotan. Amulu upatiwa ape hakahitama.

<sup>3</sup> Na tel seilon kamei amulu kalahai amulu upati, honewa i ka tel Masiwi pahan pake i atoheni aliake koseni.”

<sup>4</sup> Waliko ien i sohot hapoponowi hawane waliko ti tel kuluiwai kakai Haeu kakawen. I ukek,

<sup>5</sup> “Honewa teka seilon ti Jerusalem,  
‘Paxaiwa, tel Masiwi ti amuto i luluainima kumahe masin seilon ti hile,  
i toto patul he tok donki, tok donki uluha.’ ”  
*(Zech 9:9)*

<sup>6</sup> Huhua kahikahin nahih aile waliko ti Jises kakak.

<sup>7</sup> Lalu hakahita tok donki hetekie tok natun. Lalu axaheni puxuaulalu he tehiti tok donki uluha ape Jises to.

<sup>8</sup> Kilan wanen seilon axaheni puxuaulaha ma kai hatoh he aweisal mateiwa Jises.

<sup>9</sup> Teku seilon nanahiwa mateiwaun ma teka nanahima muhin, hatesol tilol ausini eliel ukek, “Kako sameniwa ma amukewa tel kahi nati David, tel i nahih hehetekiema poh ma solian ti Haeu!

Kako sameniwa Haeu tel pohen tapein!” *(Ps 118:25-26, 148:1)*

<sup>10</sup> Ti Jises tahiawa Jerusalem, hatesol seilon laha wiliwilia ape laha he kamekam, “Aita tel seilon ie?”

<sup>11</sup> Teka seilon kakahiti Jises laha ukek, “Ie se Jises, tel kuluiiai kakai Haeu. I ti Nasaret leili Galili.”

*Jises usi xaxaweni teka laha hangaini soxi mate Ingi Haeu*

*Mk 11:12-19; Lk 19:45-48*

<sup>12</sup> Muhin Jises nahih hani mate Ingi Haeu. Kilan seilon hahangaini soxi ma manihuh ien. Hangainiai waliko ti laha pate lialun. Ti Jises ningahiwa, i usi xaxaweni laha. I aka suoteni tesol sau ti sohiai moni ma tesol sau ti teka seilon hahangaini pux.

<sup>13</sup> Ape i kakane nau laha, “Kakai Haeu ukek, ‘Tehu ingak ing ti lotu.’ ” *(Isa 56:7)*

Jises kak tatale, “Tuahe amuto aile hanowi ka ing ti tone munai teka xuxuina!” *(Jer 7:11)*

<sup>14</sup> Tataen ien, teka pulaxa ma teka suxuxu nahih hani kapi Jises ape i haewia laha.

<sup>15</sup> Tuahe teka masiwi tuah ti hukuminiai Haeu ma seilon, ma teka hanau nauna ti Moses leng hawane ti laha ningahiwa waliko tenen i aile ti kui poh ma ti laha hongoa teka akaik tilol eliel hawane mate Ingi Haeu, “Kako sameni ma amuke tel kahi nati David!”

<sup>16</sup> Teka masiwi kamei Jises, “O hongohong waliko ti tesol akaik titilol?”

Jises ukek, “Nga hongohong. Nakon amuto kum tioi waliko ti Haeu kaakane tel Natun? I ukek, ‘Taen teka akaik ma teteka pate kokol laha sameni o.’ ” *(Ps 8:2)*

17 Ape Jises nahih salili laha ti Jerusalem. I nahih hani Betani ape i to ipong tehu ien.

*Tea pata axan fig tap huan*

*Mk 11:12-14, 20-26*

18 Pate letu ti ngain liai telao, ti Jises ma tesol kahikahin nahih alia hahaniwa Jerusalem, i hitol.

19 Ape i ningahi tea pata axan fig pape aweisal. I nahih paxai na masin hina huan, tuahe tap. Mewenae kaun. Kakanua i hone tea pata, “O kum hua lian tehue!” Tataen ien wanen tea pata mat.

20 Tesol kahikahin paxaiwa, pate lato ongake hawane. Lato kamei i, “Tea pata mat kosea ukek ia?”

21 Jises ukek, “Nga kakane hawane amuto, na namilomuto xox hawane ti Haeu, tap kakapax, amuto pon ailei waliko masin ti nga aile haniwen tea pata ie. Kumahe mewenae tenen ien, tin amuto pon kakanei tehu maunten ie, ‘Hutawa tesol ien towia haniwa itax,’ ape i sohot ukek ien.

22 Na amuto soh hawane ti Haeu, waliko tenen tenen na amuto kamei i, i aile hani amuto.”

*Aita sowini hani Jises puasain ti i aile?*

*Mk 11:27-33; Lk 20:1-8*

23 Ti Jises hahanau teka seilon mate Ingi Haeu, teka masiwi tuah ti hukuminiai Haeu ma seilon, ma teka masiwi liai nahih hani kapin ape kamei i, “Aita hone o ailei waliko ti o ailele? Aita sowini hani o?”

24 Jises ukek, “Nga kameimu amuto tenen kamekame. Na amuto pahoi hani nga, nga kaxi hani amuto tetel i sowini hani nga.

25 Kaxi hanima nga, aita sowini hani Jon bap-taisiai seilon, Haeu ka seilon?”

Ape lato kakak wasolalato, “Kaie kako kak ukek ia? Na kako ukek Haeu sowini hani Jon, i kamei kako, ‘Na masin ien, alahan amuto kum soh Jon?’

<sup>26</sup> Tuahe na kako ukek seilon sowini hani i, kaie waliko la i sohot? Kako lepetawa nake kilan seilon ukek Jon se tel kuluiai kakai Haeu.”

<sup>27</sup> Aile ape lato hone Jises, “Amite kum tioi aita sowini hani Jon.”

Jises kakane lato ukek, “Nga tin nga kum kaxi hani amuto aita hone nga ailei waliko ti nga ailele.”

### *Menge hatotaman*

<sup>28</sup> Jises hone teka masiwi ti teka Ju ukek, “Hongoa, nga kaxi hani amuto tenen meng. Tel seilon ma hua natun wawan. Tel tamalalu hone tel natun pamu i ukek, ‘O nahih puas haniwa he kin tetelao!’

<sup>29</sup> Tel natun watakai tuahe imuh i towiahu namilon ape i nahih puas.

<sup>30</sup> “Tel tamalalu hone ulea tel natun liai waliko tin tetenen. Tel natun ukek, ‘Ewi, nga nahih puas.’ Tuahe i tai nahih.”

<sup>31</sup> Ape Jises kamei lato, “Aita tel ti lalu i hong usi kakai tel taman?”

Lato ukek, “Tel pamu.”

Jises ukek, “Nga kakane hawane amuto, teka seilon ti saun lialun masin teka waxiai moni hani tel masiwi ti Rom ma teka hehin laha eng akati wawan ukei moni, laha hong usi Haeu i xoini amuto.

<sup>32</sup> Ti Jon Baptis kola hahani amuto aweisal sawisawin, amuto kum soh kakaian. Tuahe teka waxiai moni ma teka hehin ailei saun lialun, laha soh. Kalak amuto ningahi laha hong usi kakaian,

amuto kum towiahu ti lialui woumuto hani Haeu ma amuto kum soh tetan.”

*Menge teka ngahataiai tesol kin*

*Mk 12:1-12; Lk 20:9-19*

<sup>33</sup> Jises ukek, “Nga kaxi ulei tenen meng liai. Tel seilon seini tesol lalape kin ape i tiehi kalini. I tahiwi tewau wal, tone pisihi waxiai kani huai pata ape i atai tehu kokole ing patul totone teka peteniai tesol kin. Ape i hani teka seilon puas ngahati tesol kin lehe tin i uke aliake hina huai pata. Ape i ku hani texux xux xauxaun.

<sup>34</sup> Ti huai pata pamua, i talo teka unauan hani he kin waxiai ti tetan.

<sup>35</sup> Tuahe teka ngahataiai tesol kin pohi teka unauan. Tel lato xai, tel lato telei ape tel lato hokai pot.

<sup>36</sup> Tel tame tesol kin talo hakila aheke teka unauan tuahe teka ngahataiai kin aile waliko tin tetenen.

<sup>37</sup> “Tapeinan i talo tel natun wanen. Namilon i ukek, ‘Tel ie natuk wanen ma lato aile aluini.’

<sup>38</sup> “Ti teka ngahataiai kin ningahiwa tel natun, lato kakak alia puki lato, ‘Tel natun wanen nanahima. Kako telei i lehe tesol kin ape ti kako.’

<sup>39</sup> Lato pohi towi xoini i hani melal ti tesol kin ape lato telei.”

<sup>40</sup> Ape Jises kamei teka laha hongohong tenen mengon, “Ti tel tame kin aliawa, i aile waliko la hani teka ngahataiai kin? Amuto ukek i aile la?”

<sup>41</sup> Teka masiwi ti teka Ju ukek, “I telei tesol seilon lialun ien ape tesol kin i hani he mini teka seilon ti laha axi aliake i hina huai pata.”

<sup>42</sup> Jises hone lato, “Ala amuto tioi teik kakain ie:



“Tehu kuku teka atai ai ing hilisa,  
Haeu aile ape i sohot kuku  
tehu pamu tuah ti kuku liai.

Haeu aile ape kako amuam hawane.’ (Ps  
118:22-23)

<sup>43</sup> “Nga kakane hawane amuto, Haeu kum neini  
amuto nake amuto kum hong usi kakai an. Haeu  
neini teka seilon laha hong kakai an ape laha aile  
waliko tenen pahan.

<sup>44</sup> Teka seilon laha hong wata kai kakai ak, laha  
tunahi kawatan ma moloan lalap.”

<sup>45</sup> Teka masiwi tuah ti hukuminiai Haeu ma  
seilon, ma teka Parisi ti lato hongoa kakai Jises,  
lato tioi i kak nanami lato.

<sup>46</sup> Lato upiup tewau aweisal ti xotian tuahe lato  
mamata nake kilan seilon ukek Jises se tel kului ai  
kakai Haeu.

## 22

### *Menge tehu angian lalap*

#### *Lk 14:15-24*

<sup>1</sup> Jises uke ulei tenen meng ti i kakane teka  
seilon. I ukek,

<sup>2</sup> “Aweisal ti Haeu neini seilon masin na tel  
masiwi hone teka unauan apeseniai tehu angian  
lalap ti salai tel natun wawan.

<sup>3</sup> I talo tesol unauan nahih honei teka seilon  
i ilowiwen ti nahih haniai tehu angian ti sala.  
Tuahe laha wata kai.

<sup>4</sup> “Ape i talo ulei tesol unauan liai hetekie kaka-  
ian. Lato ukek, ‘An ti sala i apeasawen. Laha  
teleiwen hina bulmakau tenen xuxu solian ma  
lawe waliko i apeasawen. Nahih hanima tehu  
angian lalap.’

<sup>5</sup> “Tuahe teka seilon ti tel masiwi ilowiwen, laha kum hong waxi kakaialato. Laha aile waliko ti pahalaha. Teka laha nahih hani he kinelaha, teka liai nahih hani puasalaha ti hangainiai soxi.

<sup>6</sup> Ape teka liai akeni pahi tesol unau tel masiwi. Laha aile halialu hawane lato ape teka laha telei.

<sup>7</sup> Tel masiwi leng hawane. I talo tesol unauan ti hile teleiai teka seilon laha telei tesol unauan ape i hone lato luai tehu taon ti laha.

<sup>8</sup> “I tiloi tesol unauan liai ape i hone lato, ‘Angiain ti sala i apeasawen, tuahe teka seilon ti nga ilolowi, laha kumahe solian ti i tapai laha to ti tehu angiain ti sala.

<sup>9</sup> Amuto nahih haniwa aweisal ti tehu taon ie ape ilowi hatapoma teka ti na amuto tunahi.’

<sup>10</sup> Tesol unauan nahih hani he aweisal ape lato ilowi hatapo seilon ti lato tunahi, teka seilon sawi-sawin ma teka seilon lialun. Lato hakahita hatesol hani leili ing ti sala ape tehu ing xuh hawane.

<sup>11</sup> “Ti tel masiwi nahih soh paxai teka seilon lato hakahitama, i ningahi tunahi tel seilon kumahe i sosoi maia tenen ti angiain ti sala.

<sup>12</sup> Ape i hone i, ‘Oie, o ala kumahe ie. O tap maia tenen ti angiain ti sala.’ Tuahe tel seilon kum tunah pahoan.

<sup>13</sup> “Tel masiwi hone tesol unauan, ‘Xiotiwa minan ma aen ape towi xoini haniwa i melal he tilokoan, tetesol tonain laha kau kawatan ma tangike moloan.’ ”

<sup>14</sup> Jises kak tili kakaian, “Haeu ilowi kilan seilon lehe i neini laha tuahe teka palai Haeu kilami.”

*Moni hani Sisa tel masiwi tapein ti Rom  
Mk 12:13-17; Lk 20:20-26*

15 Teka Parisi apuha ape laha sakal aweisal lehe Jises kak tunahi waliko tenen na i sului aliake i.

16 Lato talo hani kapin teka kahikahi lato ma teka tepaun ti Herod. Lato ukek, “Tel masiwi, amite tioi o seilon sawisawin. Ti o hanau seilon saun ti Haeu, kakain tenen salan. Woum o aile hani teka masiwi ma teka seilon naun lawe tekewe.

17 O namiloj ukek ia? Ewi na kako hani Sisa moni ti pahan?”

18 Jises tioi ka lato pisi totohongi i ape i hone lato, “Lehomuto huoka. Alahan amuto kamei pisi nga?

19 Kola hanima nga tehu ti tesol puli moni lawe amuto hahani Sisa.” Lato hani i tehu.

20 I kamei lato, “Kawe aita ma axe aita he tehu puli moni?”

21 Lato ukek, “Ti Sisa.”

Ape Jises hone lato, “Ien, waliko ti Sisa haniwa Sisa, waliko ti Haeu haniwa Haeu.”

22 Ti lato hongoa pahoan tetan, lato ong hawane ape lato nahih salili i.

### *Na seilon mat nakon i xahat alia?*

*Mk 12:18-27; Lk 20:27-40*

23 Ngain tin tetehu teka Sadusi nahih hani kapi Jises. Lato soh ka seilon maten kum moih alia.

24 Lato ukek, “Tel masiwi, Moses tai hanawen na masin tel wawan i mat a i tap natun, tel ukalan kewa axoan tel hehin ien lehe lalu tan natulalu ape tesol akaik nati tel i matewen.

25 Hongoa mengomite. Telao hatotalin lato tepanim hua. Tel pamu i sal ape i mat, tap natun. Tel ukalan usian waxi axoan tel hehin.

<sup>26</sup> Tel usiai tel pamu tin i mat tap natulalu ape tel usialalu uke axoan tel hehin. Waliko tin tetenen sohot hani lato hatesol.

<sup>27</sup> Tapeinan ape tel hehin mat.

<sup>28</sup> Taen Haeu xahatani hatapo seilon maten, tel hehin ape axoi aita? Nake ati lato ukewen tel hehin ien.”

<sup>29</sup> Jises kak pahoi lato, “Namilomuto kumahe salan ka seilon maten kum moih alia nake amuto kum tioi kakai Haeu ma pohe Haeu.

<sup>30</sup> Taen teka maten moih alia, ape tapein tenen hahunatun. Ti tone Haeu, seilon kum sal masin teka engel.

<sup>31</sup> Nga kaxi haxewa hani amuto sale xahatai seilon maten. Amuto tioi waliko ti pepai Haeu kakak. I kakaxi waliko ti Haeu kakak muhin ti Abraham, Aisak ma Jekop matewa. I ukek,

<sup>32</sup> ‘Nga Haeu tetel ti Abraham, Aisak ma Jekop lolotui.’ ” *(Exod 3:6)* Ape Jises ukek, “I Haeu ti teka seilon moihin nake teka seilon tetan laha matewen, laha kumahe salan maten.”

<sup>33</sup> Ti teka kilai seilon hongoa kakai Jises, laha ongaini hawane sale hanauan tetan.

### *Nauna tuah tapein ti Haeu*

*Mk 12:28-34; Lk 10:25-28*

<sup>34</sup> Ti tesol Parisi hongoa ka Jises kak hatahunosen tesol Sadusi, lato apuha ape lato nahih hani kapin.

<sup>35</sup> Leilolato, tel ti hanau nauna ti Moses i kamei pisi Jises. I ukek,

<sup>36</sup> “Tel masiwi, ti lawe nauna ti Moses lahe nauna tuah tapein?”

<sup>37</sup> Jises kak pahoi i, “ ‘Waheni hawanewa Haeu tel Masiwi ti amuto, xoiniwa ti amuto waheni teka seilon liai. Amukewa Haeu ti leili tiamuto, namilo i eliel hawanewa i ma aile hatapoa puasan ti hatesol kuimuto.’ *(Deut 6:5)*

<sup>38</sup> I se nauna tenen tuah tapein i xoini lawe nauna.

<sup>39</sup> Tenen nauna usian i masin, ‘Waheniwa seilon liai hanowi ti amuto waheni aliake puki amuto.’ *(Lev 19:18)*

<sup>40</sup> Huonen nauna ien se salangawe lawe nauna ti Moses ma hatesol waliko ti teka kuluiai kakai Haeu hanauen.”

*Kahi nati aita tel Krai?*

*Mk 12:35-37; Lk 20:41-44*

<sup>41</sup> Ti tesol Parisi tutuen ien, Jises kamei lato,

<sup>42</sup> “Kaie amuto namilo i ukek ia? Krai, tel seilon Haeu taloma, i kahi nati aita?”

Lato hone i, “Kahi nati David.”

<sup>43</sup> Jises kamei lato, “Na masin ien, alahan David axai i tel Masiwi tetan? Puki Holi Spirit hanamiloa David kak kewak,

<sup>44</sup> “ ‘Haeu kakane tel Masiwi tetak, toma papak tepaun manau ti neinia seilon atengi tataen nga hanawa teka seilon laha pahoxai o hani hahitakam.’ *(Ps 110:1)*

<sup>45</sup> Na masin David axai Krai tel Masiwi tetan, i kumahe tuahe tel ti kahi natun.”

<sup>46</sup> Tap tel ti lato kak pahoi uke i. Muhin ape laha mamata kamei pisiai Jises.

## 23

*Teka hanau nauna ti Moses ma teka Parisi sameni aliake lato*

*Mk 12:38-40; Lk 11:43-46, 20:45-47*

<sup>1</sup> Imuh Jises kakane teka kilai seilon ma tesol kahikahin, i ukek,

<sup>2</sup> “Teka hanau nauna ti Moses ma teka Parisi lato kukului puase Moses ti lato hanau seilon nauna tetan.

<sup>3</sup> Tenen na lato hone amuto, amuto puas usiwa. Tuahe amuto kum puas usiusi woulato nake puki lato kum puas usi kakaialato.

<sup>4</sup> Lato lungei teka seilon usiai kilai nauna ailan ti puki ti lato, tuahe lato kum solonga ti usiai tesol nauna ien ma kum hana minalato hualiai teka liai.

<sup>5</sup> “Lawe waliko lato aile se lehe seilon paxai sameni lato. Teik waliko teka Ju uke lohiai kakai Haeu ape laha xinoti he kawalaha ma huipaulaha sai kalamau, lato aile halapa. Hinaloik maia teka Ju hakea he ngixi puxuaulaha ti kolakol ka laha ailele puase Haeu, lato aile hawelu aheke lehe seilon ningahi.

<sup>6</sup> Lato waheni totoan tuah ti tone angiaian lalap ma leili synagog.

<sup>7</sup> Pahalato seilon namilo i kewak lato tuah ti puli lawe seilon ma pahalato seilon axaiwa lato ‘masiwi tuah.’

<sup>8</sup> “Tuahe amuto, kum hahani laha axai amuto ‘masiwi tuah’ nake amuto hatesol tekewe masin talin ma tuan. Telawe Masiwi ti amuto.

<sup>9</sup> Aile ape amuto kum lolotui tel na seilon ti tehu pon ie nake ala amuto lotui tel Tamamoto Haeu.

<sup>10</sup> Kum hahani laha axai amuto teka neinialaha nake telawe Krai neinia i seilon.

<sup>11</sup> Tel masiwi leilomuto i kewa unauamuto.

<sup>12</sup> Na tel i sameni aliake i, Haeu teheni i. Ape na tel i teheni aliake i, Haeu aile i seilon tuah.

*Jises kak hokai teka hanau nauna ti Moses ma teka Parisi*

*Lk 11:39-44*

<sup>13</sup> “Amuto teka hanau nauna ti Moses ma teka Parisi, Haeu axi hawane amuto kawatan. Lehomuto huoka! Waliko ti amuto hahanau i tiehi teka seilon ti Haeu neneini laha. Puki amuto, Haeu kum neini amuto ape amuto hasele teka ti pahalaha Haeu neini laha.

<sup>14</sup> Amuto teka hanau nauna ti Moses ma teka Parisi, Haeu axi hawane amuto kawatan. Lehomuto huoka! Amuto pisi teka hehin axoalaha matewen lehe amuto seseke soxialaha ma ingalaha. Ape amuto aile lotu weluwelun lehe teka seilon namilo i kewak amuto sawisawin. Hui tesol waliko ien, kawatan ti amuto pamu sean.

<sup>15</sup> “Salan, Haeu axi hawane amuto kawatan. Lehomuto huoka! Amuto lang koti kanitax ma amuto hasunga hani kilan xux ti waxainiai seilon tel hani Haeu lehe i soh tetan hanowi ti amuto. Ti amuto waxainiwa, amuto aile tel seilon ien i sohot lialu hawane, pamu lialuan ti amuto.

<sup>16</sup> “Amuto masin teka pulaxa neiniai teka seilon. Haeu axi hawane amuto kawatan. Amuto kakaxi ka na tel kak kuinakei tehu Ingi Haeu, ewi na i kum aile usi, tuahe na tel kak kuinakei teik waliko tuah leili Ingi Haeu masin gol, amuto ukek i aile usiwa.

<sup>17</sup> Amuto masin pulaxa a taxitaxia! Tenen ia pamu tuah, gol ka tehu Ingi Haeu? Pake i aile ape gol tuah.

18 Tin amuto hanau seilon, tap tenen na tel kak kuinakei tesol tone waliko teka seilon kau hani Haeu leili Ingan. Tuahe na i kak kuinakei waliko teka seilon kau hani Haeu, amuto ukek i aile usiwa.

19 Amuto masin teka pulaxa. Tenen ia pamu tuah, waliko tenen teka seilon kau hani Haeu ka tesol tone waliko laha kau hani Haeu? Pake i aile ape teik waliko tuah.

20 Na amuto kak kuinakei tesol tone waliko teka seilon hani Haeu, amuto kuinake hehetekie hatesol waliko ti laha hahana ien.

21 Na amuto kak kuinakei tehu Ingi Haeu, amuto kuinake hehetekie Haeu, tetel i ingai tehu ing ien.

22 Na amuto kak kuinakei tone Haeu, amuto kuinake hehetekie Haeu ma tehu totonan.

23 “Amuto teka hanau nauna ti Moses ma teka Parisi, Haeu axi hawane amuto kawatan. Lehomuto huoka! Amuto hani Haeu tenen ti huopanim soxiamuto masin kai pata ti hanamui an. Tuahe amuto kum usi tesol nauna tuah ti Moses masin ailei saun sawisawin hani seilon, tahanei seilon ma puas usiai waliko ti Haeu pahan. Solian amuto hani Haeu tenen ti huopanim soxiamuto tuahe tin amuto usi hetekiewa tesol nauna ien.

24 Amuto masin teka pulaxa neinia teka seilon. Pate amuto haeliel usiai nauna kokol masin na amuto xaxaweni lang he unumamoto uke amuto haleke, tuahe amuto kum usi nauna tuah ti Haeu. Ien masin ka amuto haleke tunahi tok pou!

25 “Amuto teka hanau nauna ti Moses ma teka Parisi, Haeu axi hawane amuto kawatan. Lehomuto huoka! Pate amuto haeliel nuhiai melal ti kap ma pelet tuahe waliko ti leilon, amuto kema ti pipis ma halepelep.



<sup>26</sup> Teka Parisi, amuto masin teka pulaxa! Nuhi haunimua leilomuto. Haunimua namilomuto ma atemuto lehe waliko amuto aile ma kak mewenae solian.

<sup>27</sup> “Amuto teka hanau nauna ti Moses ma teka Parisi, Haeu axi hawane amuto kawatan. Lehomuto huoka! Amuto masin wanen amal tenen melal tetan haun ma paxaian solian, tuahe namilomuto ma atemuto masin leili amal xuhai kui seilon maten ma waliko kohan.

<sup>28</sup> Amuto woinakon ka seilon sawisawin tuahe salan wanen amuto xuhai saun lialun a amuto putini ka amuto ailele puase Haeu.

*Jises kak kilami hani lato kawatan*

*Lk 11:47-51*

<sup>29</sup> “Amuto teka hanau nauna ti Moses ma teka Parisi, Haeu axi hawane amuto kawatan. Lehomuto huoka! Amuto tanomi hasolia hahawane amali teka kului ai kakai Haeu ma teka seilon sawisawin liai a amuto kum usi kakai alato.

<sup>30</sup> Ape amuto ukek na masin amuto ien lokon ti teka tamamuto ti matahaun, amuto tai huali laha teleiai teka kului ai kakai Haeu.

<sup>31</sup> Puki kakai amuto sului aliake amuto ka amuto kahi nati teka kuwen laha telei teka kului ai kakai Haeu.

<sup>32</sup> Ien, amuto aile tinamiwa waliko tenen lialun ti teka kuwen hutuiwen.

<sup>33</sup> “Amuto masin noh! Amuto kum salia ti tesol kaui kawatan tenen tap tahi tapoan.

<sup>34</sup> Nga kakane amuto, nga talo hani amuto teka kului ai kakai Haeu, teka seilon aneso ma teka hanau saun ti Haeu. Amuto telei teka, amuto tahi hakea teka he kros, teka amuto heti leili synagog ape teka amuto usi haoxa hani toan tewau tewau.

<sup>35</sup> Aile ape amuto uke kawatan ti teleiai teka seilon sawisawin, hutui ti teleiai Abel hani tataen ti teleiai Sakaraia tel nati Barakaia, tetel laha telei wasole Ingi Haeu ma tone waliko ti haniai Haeu.

<sup>36</sup> Nga kaxi hawane hani amuto, kawatan ti tesol matemate ien, kauan teka seilon ti aope ie.”

*Wawahen ti Jises hani Jerusalem*

*Lk 13:34-35*

<sup>37</sup> Ape Jises ukek, “Tekka seilon ti Jerusalem, amuto telei teka kuluiwai kakai Haeu ma amuto hokai teka liai pot, tetekka Haeu talo hani amuto. Mongohuan pahak nga apuhini aumi amuto masin mom hehin poni natun hahitake paun, tuahe amuto watakai.

<sup>38</sup> Aile ape Haeu lioi amuto ma kum ingai tehu Ingan hetekie tehu taon kapimuto.

<sup>39</sup> Nga kakane amuto, amuto kum ningahi ulea nga atengi tataen amuto ukek, ‘Kako amukewa tel i nahih hehetekiema poh ma solian ti Haeu.’ ” (*Ps 118:26*)

## 24

*Jises ukek tehu Ingi Haeu laha toi hamanana*

*Mk 13:1-2; Lk 21:5-6*

<sup>1</sup> Ti lehe Jises nahih salili tehu Ingi Haeu, tesol kahikahin kakane i sale tesol ing ti i tanomi tehu Ingi Haeu.

<sup>2</sup> Ape Jises ukek, “Amuto sasameni tesol ing ie. Nga kakane hawane amuto, imuh laha toi hamanana ape tesol pot ti tesol ing i put silahota.”

*Jises ukek kilan kawatan i sohot*

*Mk 13:3-23; Lk 21:7-24*

<sup>3</sup> Ti Jises toto he tehu Maunt Oliv, tesol kahikahin nahih hani kapin ti mewenae lato. Lato kamei i, “Kaxi hanima amite lokon wanen ape waliko ien sohot? Kaie kikilam la i sohot imat ti aliaiam ma tapoi tehu pon ie?”

<sup>4</sup> Jises ukek, “Kanipetiwa, kum hahani laha puluti amuto.

<sup>5</sup> Imuh kilan seilon ukek ka laha Krais. Laha puluti kilan wanen seilon.

<sup>6</sup> Ti amuto hong hilehile sosohot xohixohin ma xauxaun, amuto kum maamata. Waliko masin hoi liai i sohot tuahe kumahe ape tapoi tehu pon ie.

<sup>7</sup> Hilehile i sohot wasole xux, toan tewau hilei toan liai. Hitolo lalap i sohot ma hepekeun i nuea eliel ti xux tesol tesol.

<sup>8</sup> Waliko ien tuahe hutuaii kawatan ti i luluain-ima imuh.

<sup>9</sup> “Tataen ien amuto laha pahi. Laha aile lehe amuto kau moloan ma laha telei amuto. Kilan seilon ti lawe xux laha watakai hawane amuto nake amuto kahikahik.

<sup>10</sup> Kilan seilon laha soh tetak laha kapaxe aliake. Laha he wawatak alia laha ma laha he hahangain alia laha.

<sup>11</sup> Kilan seilon laha woinakon ka teka kuluiaia kakai Haeu ape laha puluti kilan wanen seilon.

<sup>12</sup> Saun lialun kila kasia ape kilan seilon lioi saun ti wawahan.

<sup>13</sup> Tuahe teka na laha tu matuha kahikahik atengi taun ti kawatan tapo, Haeu waxi auni laha lian tehue.

<sup>14</sup> Ape teka kahikahik kaxi ahuti meng solian ti Haeu neini seilon hani hatesol xux. Taen ien tehu pon ie i tapo.

15 “Amuto hong matainiwa. Ngain tehu i lulu-ainima amuto ningahi waliko ti Daniel tel kului ai kakai Haeu kak kilamiwen. Amuto ningahi waliko pate lialun wanen ti seilon tanomi, i tetesol ti Haeu hahalini.

16 Tataen ien, teka laha toto Judia, kewak laha kiliwau muna haniwa he maunten.

17 Tel na i melal, tin i kiliwawa. I kum alia hahani leili ing waxiai soxian.

18 Tin masin na tel i he kin, liai i kum alilia hani leili ingan waxi palahiai puxuaun. Tin i kiliwawa.

19 Taun tehu ien, kawatan wanen ti teka hehin tialaha hina akaik ma teka natulaha susus tutuen.

20 Kameiwa Haeu lehe taun ien i kum sohot leili taun ti waiwain ma na telao Sabat nake ngain tehu ien hahalin ti puasain ma kiliwain.

21 Kawatan ti ien i xoini kawatan ti imat, ti uli tanomia i tehu pon ie haniwa taen imuh.

22 Tuae Haeu namilo i teka seilon tetan ape i koti hakukuna taun lialun ien uke tap seilon moih.

23 “Taun tehu ien, na tel hone amuto, ‘Paxaiwa, Krai s ie,’ ma na i ukek, ‘Paxaiwa, Krai s io,’ kum hong sohosoh.

24 Hina seilon puputa sohotuma ukek ka laha Krai s ma teka ukek laha kului ai kakai Haeu. Laha aile hasohotu waliko lalap tenen tenen ape laha tohong i pulutiai teka seilon ti Haeu.

25 Hongoa! Nga hahongo pepelei amuto waliko na i sohot. Amuto lepetawa!

26 “Na laha hone amuto, ‘Paxaiwa, Krai s io, he lohong,’ amuto kum nanahiwa. Tin masin na laha hone amuto, ‘Krai s ie, leili tehu ing,’ kum sohosoh.

27 Nga tel Nati Seilon sohotuak hanowi usil i xep koti maun hutuima ti angiha haniwa ahang.

<sup>28</sup> Amuto tioi xixi tetesol na amuto ningahi tal-iah. Tin masin amuto tioi aliaiak ape i xohiwen taen ti amuto ningahi waliko ti nga kakanewen amuto.

*Aliai Jises ma tapoi tehu pon ie*

*Mk 13:24-27; Lk 21:25-27*

<sup>29</sup> “Muhi kawatan ien,  
 “ ‘al i kum kam,  
     pangapang i kum xeu,  
     kohot ti he maun i put,  
     hatesol waliko ti he maun i nuea.’ *(Isa 13:10, 34:4)*

<sup>30</sup> Tataen ien, kolakol ti aliaiak tel Nati Seilon i sohot he maun. Teka seilon ti lawe xux laha tang mamata. Ape laha ningahi nga tel Nati Seilon mosulih patul he maun hetekie lalape poh ma soliai talepai xewaiak.

<sup>31</sup> Tataen ien nga talo tesol engel, spirit solian ti Haeu. Lato kuini suhusuh ape lato waxi apuhini teka seilon Haeu kilamiwen tetan ti tesol tesol, ti sai ahang, angiha, haiup ma tola.

*Paxai kilami haniwa talil*

*Mk 13:28-31; Lk 21:29-33*

<sup>32</sup> “Amuto paxai kilami haniwa talil. Ti kaun mak put, amuto tioi ka taun ti aupol angiha.

<sup>33</sup> Tin masin, taen amuto ningahi tesol waliko nga kakanewen amuto ape i sohot, amuto tioi kewak aliaiak ape i xohi hawanewen.

<sup>34</sup> Nga kakane hawane amuto, hina seilon ti aope ie laha kum matemu atengi tataen waliko ien i sohot.

<sup>35</sup> Maun ma xux ti aope i tapo tamus tuahe kakaiak hamalum lian tehue.

*Apeasawa ti aliai Jises*

*Mk 13:32-37; Lk 21:34-36*

<sup>36</sup> “Tap tel ttoi ngain tetehu ma lokon wanen tesol waliko ien i sohot. Teka engel, spirit solian ti Haeu, kum ttoi ma puki nga tel Natun, tin nga kum ttoi, mewenae tel Tamak Haeu ttoi.

<sup>37</sup> Aliaiak tel Nati Seilon i hanowi lokon taun ti Noa.

<sup>38</sup> Lokon ien, imat ti Haeu hasomu mat atuhi lawe xux, teka seilon laha ang, un ma sal amuam atengi tataen ti Noa soh hani leili tea waian.

<sup>39</sup> Laha amuam luh ape laha kum ttoi waliko ti lehe i sohot. Ape ti mat somule i soheni hatapo laha. Tin masin wanen aliaiak tel Nati Seilon, i haonga seilon.

<sup>40</sup> Telao ngain ien hua wawan lalu pupuas he kin ape nga tel Nati Seilon waxi tel ape tel tiliwen.

<sup>41</sup> Hua hehin lalu nunuhi api. Nga waxi tel ape tel tiliwen.

<sup>42</sup> “Aile ape apeas peleawa nake amuto kum ttoi lokon wanen nga, tel Masiwi ti amuto, aliama.

<sup>43</sup> Amuto hong matainiwa, na masin tel tame tehu ing i ttoiwen lokon tel seilon ti xuxuina nahima, ala i ah peteni lehe tel seilon kum soh hani leili ingan.

<sup>44</sup> Aile ape amuto kum luhuluh nake amuto kum ttoi lokon wanen nga tel Nati Seilon aliama.”

*Hanowiwa tel seilon puasan solian*

*Lk 12:41-48*

<sup>45</sup> Jises kak tatale ukek, “Amuto hanowiwa tel unau tel tame tehu ing, lawe i aile aluini puasan. Tel tame tehu ing hani tel unauan ngahatai teka unauan liai ma axiai analaha ti taun ti angiain.

<sup>46</sup> Na tel tame tehu ing aliama ape i paxai tunahi ka tel unauan aile aluluini pupuasan, i axi aluini kahun.

<sup>47</sup> Nga kakane hawane amuto, tel tame tehu ing hana i ngahatiaia lawe soxian.

<sup>48</sup> Tuahe na masin tel unauan seilon lialun, i namiloi ukek, ‘Pake tel tame tehu ing aliaian kuen.’

<sup>49</sup> I hutui xaiai teka unauan hahitakan ape i tua ang ma un kapi teka seilon ti unum.

<sup>50</sup> Imuh tel tame tehu ing alia haonga tel unauan.

<sup>51</sup> I axi hawane tel unauan ien kawatan. I towi i hani tesol ti teka laha woinakon ka ailei puase Haeu ape i tang atalahi nisun nake ti lalape moloan.”

## 25

### *Menge huopanim hehin uluha*

<sup>1</sup> Jises kak ulea ukek, “Aweisal ti Haeu neini seilon masin tesol huopanim hehin uluha. Lato waxi tesol kamaialato ape lato nahih tengeni tel seilon i sal.

<sup>2</sup> Tepanim, lato hina namilolato a tepanim tap namilolato.

<sup>3</sup> Tesol hehin tap namilolato, lato tai kau hasea wel ti kamaialato.

<sup>4</sup> Tesol tepanim liai, lato kau hasea wel kamaialato.

<sup>5</sup> Tel seilon ti i sal kuen tahiaian, aile ape puli tesol hehin lihi ape lato matih.

<sup>6</sup> “Ti luhui ipong lato hong tel seilon titilol ukek, ‘Tel seilon i sal ape i nanahima. Amuto nahih tengeniwa i.’

7 “Ien, hatesol hehin uluha lato xahat ape ape-seni kamaialato.

8 Ape tesol hehin tap namilolato katei tesol hehin liai, lato ukek, ‘Tihi axima amite teik welaumuto nake kamaiamite ape lehe i peh.’

9 “Tuahe tesol hehin hina namilolato ukek, ‘Tap. I kum pon ti ati kamaiakako. Amuto nahih kahui ngahawa.’

10 “Taen ti lato nahiwa, tel seilon i sal tahياما. Tesol hehin lato apeasawen, lato soh akati i hani leili ing ti tehu angiaian lalap ti sala. Ape teka seilon kongini aweing.

11 Muhin ien tesol hehin uluha liai aliama ape lato titilol, ‘Tel masiwi, tel masiwi, hei hanima amite kahip.’

12 “Tuahe i kakane lato ukek, ‘Nga kum ttoi amuto.’”

13 Ape Jises ukek, “Aile ape amuto pax petawa ma apeasawa nake amuto kum ttoi lokon wanen aliaiak.”

### *Menge tesol seilon ngahatiai moni*

#### *Lk 19:11-27*

14 Jises kak ulea ukek, “Aweisal ti Haeu neini seilon tin masin na tel seilon lehe i nahih salili tesol tonan hani tesol xauxaun. I tiloi tesol unauan ape i hani lato soxian lehe lato auni.

15 I namiloi anesoalato ti ngahatiai moni ape i sei moni hani lato. Tel i hani tepanim tomi moni, tel tom huohu, tel tom tehu. Ape i nahih.

16 Tel unauan i waxi tom tepanim, i hapuasa hulutini tesol moni ien ape kiliwan wanen i hasohotu tom tepanim liai.



17 Tel i waxi tom huohu, i hasohotu tom huohu liai.

18 Tuahe tel i waxi tom tehu, i tihini auni tesol moni.

19 “I kuewa tel tame tesol moni i aliama. I tiloi tesol unauan lehe i upia paxai sale ngahatiaia moni ti lato aunini.

20 Ape tel unauan i waxi tom tepanim ukek, ‘Tel masiwi, o hani nga tepanim tomi moni. Nga hapuasa ape nga hasohotuen tom tepanim liai.’

21 “Tel tame moni ukek, ‘Puasam solian. O unauak solian, o auni aluini moniuk. O ngahati aluini waliko kokol, aile ape nga hani o ngahatiaia waliko pamu tuah. Amuam akatima nga.’

22 “Imuh tel unauan i waxi tom huohu ukek, ‘Tel masiwi, o hani nga huohu tomi moni. Nga hapuasa ape nga hasohotuen tom huohu liai.’

23 “Tel tame moni ukek, ‘Puasam solian. O unauak solian, o auni aluini moniuk. O ngahati aluini waliko kokol, aile ape nga hani o ngahatiaia waliko pamu tuah. Amuam akatima nga.’

24 “Ape tel unauan i waxi tom tehu ukek, ‘Tel masiwi, nga tioi o seilon ahian. O waxi an ti kumahe o seini. Paham o waxi moni ti seilon liai hasohotu.

25 Nga mamata uke nga lioi monium ape nga tihini muneni. Monium ie.’

26 “Tuahe tel tame moni ukek, ‘O seilon lialun ma nunuxa. O sokok nga seilon ahian, nga waxi an ti kumahe nga seini ma pahak nga waxi moni ti seilon liai hasohotu.

27 Na o namiloi ukek ien, kaie ala o hapuasawen tesol moni lehe nga uke palahi.’

28 “Ape tel tame moni hone teka unauan liai, ‘Waxiwa tesol moni toi i ape haniwa tel unauak i hina huopanim tomi moni.

29 Tel na i aile aluini puasak, nga axi palahi waliko ti i auni ape i uke akulai kahun. Tuaehe tel i kum puas alua, nga waxi aliake teik kokolean toi i.

30 Aile ape towiwa tel unauak puasan lialun haniwa tesol ti i tang atalahi nisun nake ti lalape moloan.’ ”

### *Jises hiniti seilon*

31 Jises kak ulea ukek, “Taun ti nga tel Nati Seilon alia hetekiema hatesol engel ti Haeu, nga to Masiwi ti tesol tonain neinia seilon hetekie poh ma xewai Haeu.

32 Seilon ti lawe xux apuha hani kapik. Ape nga sei laha uke hupaun masin tel ngahat i selai teka sipsip ti teka meme.

33 Nga selai teka seilon sawisawin hani minak sai manau a teka liai sai kalamau.

34 “Ape nga hone teka seilon minak sai manau, ‘Amuto se seilon teka tel Tamak Haeu aile hasolia hani amuto. Nahima lehe Haeu neini amuto hani leili tesol tonain i apeseni haniwen amuto hutui ti tanoi tehu pon ie.

35 Ti nga hitol, amuto axi anak, ti pahak nga un, amuto axi unumak. Ti nga tel soliwa ti xuxumuto, amuto ilowi nga hani leili ing.

36 Ti nga tap sosok, amuto axi sosok. Ti nga tinun, amuto ngahati nga. Ti nga kakalabus, amuto nahih paxai nga.’

<sup>37</sup> “Ape tesol seilon sawisawin ukek, ‘Tel Masiwi, lokon amite ningahi o hitol ape amite axi anam? Lokon paham o un ape amite axi unumam?’

<sup>38</sup> Lokon telao amite ningahi o soliwa ape amite ilowi o hani leili ingamite? Lokon amite ningahi o tap sosom ape amite axi sosom?

<sup>39</sup> Lokon amite ningahi o tinun ma na he kalabus ape amite nahih paxai o?’

<sup>40</sup> “Ape nga pahoi lato ukek, ‘Nga kakane hawane amuto, waliko ti amuto aile haniwen tel na seilon, kalak na i tap wanen axan, tin masin ka amuto aile hahani nga.’

<sup>41</sup> “Ape nga hone teka sai kalamau tetak, ‘Amuto xaxaua kapik. Amuto teteka seilon amuto uke kawatan ti tel Tamak Haeu hani amuto. I towi amuto hani he tehot ah tap tahi pehoan i apeseni haniwen Satan ma teka spirit lialun tetan.

<sup>42</sup> Ti nga hitol, amuto tai axi anak. Ti pahak nga un, amuto tai axi unumak.

<sup>43</sup> Ti nga tel soliwa ti xuxumuto, amuto tai ilowi nga hani leili ingamuto. Ti nga tap sosok, amuto tai axi sosok. Ti nga tinun ma he kalabus amuto tai nahih paxai nga.’

<sup>44</sup> “Ape lato pahoi nga ukek, ‘Tel Masiwi, lokon wanen amite ningahi o hitol, paham kan, tel soliwa, tap sosom, tinun, he kalabus ape amite tai huali o?’

<sup>45</sup> “Ape nga pahoi lato ukek, ‘Nga kakane hawane amuto, waliko ti amuto tai aile hani tel na seilon, kalak na i tap wanen axan, tin masin ka amuto tai aile hani nga.’

<sup>46</sup> “Ape tel Tamak Haeu i towi lato hani tesol kaui kawatan tap tahi tapoan ape teka seilon

sawisawin i waxi hani tetesol ti lato to kapin lian tehue.”

## 26

*Upiai aweisal ti teleiai Jises*

*Mk 14:1-2; Lk 22:1-2; Jn 11:45-53*

<sup>1</sup> Ti Jises kak hatapoa hatesol kakaian, i hone tesol kahikahin,

<sup>2</sup> “Amuto tioi ka Pasova, tehu angiain lalap ti laha telei sipsip wawan uluha, i hutui muhi ngain huohu. Tataen ien laha hangaini nga hani laha telei. Laha tahi hakea nga tel Nati Seilon hani he kros.”

<sup>3</sup> Lokon ien teka masiwi tuah ti hukuminiai Haeu ma seilon, ma teka masiwi liai, laha apuha hani leili ingi Kaiapas, tel masiwi tapein ti hukuminiai Haeu ma seilon.

<sup>4</sup> Laha xinoti tanomi kakain, ti tap tel seilon tioi, sale pohiai Jises ma teleian.

<sup>5</sup> Tuahe laha ukek, “Kako kum aile ti leili Pasova uke teka seilon paxaiwa ape laha hutui hile waso-lalaha.”

*Tel hehin tihi sanda he pati Jises*

*Mk 14:3-9; Jn 12:1-8*

<sup>6</sup> Lokon ien Jises Betani leili ingi Saimon, tel seilon kemuk hina nax lialun he tinun.

<sup>7</sup> Ti lato to angiang, tel hehin kauma tehu sanda kahun pate lalap ma poun pate solian ape i tihi hani he pati Jises.

<sup>8</sup> Ti tesol kahikahin paxaiwa, lolato lialu. Lato ukek, “Kalahai i tua tihi xoini tehu sanda?”

<sup>9</sup> Pamu ewian na hangaini waxiwen moni lalap ape hani teka seilon tap soxi.”

<sup>10</sup> Tuae Jises hone lato ukek, “Kum hohowini i nake i ailele saun solian hani nga.

<sup>11</sup> Teka seilon tap soxi laha lawe kapimuto, amuto pon hualialaha telao ti na pahamuto. Tuae nga kumahe lawe kapimuto.

<sup>12</sup> I tihi sanda hani patuk apeseniak ti tehu tihiniak.

<sup>13</sup> Nga kakane hawane amuto, tesol tesol ti laha kaxi meng solian ti Haeu, tin laha kaxi waliko ti tel hehin aile hahani nga lehe seilon nameni i.”

*Judas pahan i hangaini Jises*

*Mk 14:10-11; Lk 22:3-6*

<sup>14</sup> Imuh, tel ti tesol huopanim hua kahikahin axan Judas Iskariot, i nahih hani kapi teka masiwi tuah ti hukuminiai Haeu ma seilon.

<sup>15</sup> I kamei lato, “Na nga hangaini Jises hani amuto, hil moni amuto hani nga?” Ape lato hani i 30 moni silva.

<sup>16</sup> Taen ien ape Judas upia tehu taun solian na i hangaini Jises hani lato.

*Apeseni an ti Pasova*

*Mk 14:12-16; Lk 22:7-13*

<sup>17</sup> Ngain tehu hutuai angia in lalap ti teka Ju ani bret tenen i tai xiu, tesol kahikahi Jises nahih hani kapin ape kamei i, “Paham amite apeseni tehu angia in ti Pasova hani ia?”

<sup>18</sup> Jises hone lato, “Nahih haniwa Jerusalem kapi tel seilon nga kakanewen amuto ape honewa i, ‘Tel masiwi ukek ka taun tetan ti Haeu kikilami ape i xohiwen. I ma tesol kahikahin ang tehu angia in ti Pasova leili ingam.’ ”

<sup>19</sup> Tesol kahikahin aile usi waliko ti Jises hohone lato ape lato apeseni an ti Pasova ien.

*Jises ang tehu angiaian ti Pasova kapi tesol kahikahin*

*Mk 14:17-25; Lk 22:14-23; Jn 13:21-30; 1 Kor 11:23-26*

<sup>20</sup> Ti i alohahawa, Jises ma tesol huopanim huhua kahikahin to ang apuha.

<sup>21</sup> Ti lato angiang, Jises ukek, “Nga kakane amuto, tel ti amuto hangaini nga hani mini teka laha watakai hawane nga.”

<sup>22</sup> Ti lato hongoa, tialato kawat hawane ape tel tel ti lato kamei Jises, “Kaie kumahe nga?”

<sup>23</sup> Jises kak pahoi lato ukek, “Tel na i xomi anan hani leili tehu tone an kapik, i tetel i hangaini nga.

<sup>24</sup> Nga tel Nati Seilon imuh nga mat, masin ti kakai Haeu kakawen. Tuae kawatan lalap tu-nahi tel seilon i hangaini nga hani laha telei. Pamuewian na i tai takah!”

<sup>25</sup> Judas, tel hangainian tin i kamea, “Tel masiwi, kaie kumahe o kakak nga?”

Jises pahoi i ukek, “Masin ti puki o kakawen.”

<sup>26</sup> Leilon ti lato angiang, Jises waxi bret, i kak kemulik hani Haeu ape i wiki sei hani tesol kahikahin. I ukek, “Waxi aniwa, se tupuak.”

<sup>27</sup> I waxi tehu kap waen, i kak kemulik hani Haeu ape i hani tesol kahikahin. I ukek, “Amuto hatesol unumiwa.

<sup>28</sup> Ie se kakauk i xiweu ti kolakol ka Haeu oxoxi seilon ti kawatan ti lialui woulaha na laha hana namil xoxoan hani i. Mateak kola hapoponowi ka Haeu xinoti tenen namil haun kapi seilon.

<sup>29</sup> Nga kakane hawane amuto, nga kum un ulea waen atengi tataen ti kako amuam leili tone Haeu tel Tamak.”

<sup>30</sup> Muhin ien lato pakui tenen pak hani Haeu ape lato nahih ahuta hani Maunt Oliv.

*Jises kak kilami ka Pita ase*

*Mk 14:27-31; Lk 22:31-34; Jn 13:36-38*

<sup>31</sup> Jises hone lato, “Ti ipong tetehu amuto hatesol kiliwau salili nga, masin ti kakai Haeu kakawen, i ukek,

“ ‘Nga telei tel ngahatiaai sipsip

ape teka sipsip kiliwau silahota!’ ” (*Zech 13:7*)

<sup>32</sup> Ape Jises ukek, “Tuahe muhin ti Haeu xahateni aliakewa nga ti mateak, nga nahih hani Galili imat ti amuto.”

<sup>33</sup> Pita hone Jises, “Nga kum ox salili wanen o, kalak na lato hatesol ox salili o.”

<sup>34</sup> Jises hone Pita, “Nga kakane hawane o, imat ti tok mom wawan kokoini ipong tetehu, o putini ka o kum tioi wanen nga uke he toluhu.”

<sup>35</sup> Tuahe Pita ukek, “Nga kum kak wanen ukek ien, kalak na nga mat ohoi o!” Ape hatesol kahikahin tin lato kak ukek ien.

*Jises kakak kapi tel Taman Haeu he Getsemani*

*Mk 14:32-42; Lk 22:39-46*

<sup>36</sup> Jises ma tesol kahikahin tahia hani tesol kin axan Getsemani. I hone lato, “Amuto tiliwen ie ti nga kakak kapi tel Tamak Haeu.”

<sup>37</sup> I waxi Pita ma hua nati Sebedi, Jeims ma Jon. Tian pate i kawat ape i mamata xexex.

<sup>38</sup> I kakane lato ukek, “Tiak pate kawatan, sikole i telei nga. Amuto tiliwen ie, ah akatima nga.”

<sup>39</sup> I nahih ahewa teik kokol ape i eng kalunga hani hepekeun. I kamei eliel Haeu ukek, “Tel Tamak Haeu, na i pon, xaxaweniwa kawatan ti

matemate ti lehe i tunahi nga! Tuae pahak nga usi namilom.”

<sup>40</sup> Jises nahih alia hani kapi tolu kahikahin ape i ningahi lato mamatih. I kakane Pita, “Alahan pate amuto kum ah?

<sup>41</sup> Ah kapitawa ma lotu tatalewa lehe amuto xoini totohong ti Satan na i tunahi amuto. Pahamuto ailean tuahe tupuamuto pate kawatan.”

<sup>42</sup> Jises nahih ape i kakak ulea kapi tel Taman Haeu. I ukek, “Tel Tamak Haeu, na kumahe paham xaxaweniai kawatan ti matemate, nga usi namilom.”

<sup>43</sup> Ti i nahih aliawa, i ningahi lato mamatih ulea. Lato kum kongini uke lihiai pulalato.

<sup>44</sup> Ape he toluhu i nahih kakak kapi tel Taman. I kakak waliko tin tetenen.

<sup>45</sup> Ti i nahih alia haniwa kapi tesol kahikahin i hone lato, “Amuto matih hahanau tutuen? Hongoa! Ape i meiwen taun ti nga tel Nati Seilon, laha hani he mini teka seilon lialun.

<sup>46</sup> Xahatawa! Seilon tetel hangainiak ape i nanahima. Kako nahih pahoi i.”

### *Laha xoti Jises*

*Mk 14:43-52; Lk 22:47-53; Jn 18:1-12*

<sup>47</sup> Jises kakak tutuen ti Judas tel ti tesol huopanim huhua kahikahin tahiawa. Kilan wanen seilon kakahiti i, laha akekeni ngol weluwelun ma pata ti hile. Teka masiwi tuah ti hukuminiai Haeu ma seilon, ma teka masiwi liai taloa laha.

<sup>48</sup> Judas hani peleiwen laha tenen kolakol, i ukek, “Seilon tel nga asoi taliopan se tetel ien. Amuto pohiwa!”



<sup>49</sup> Judas nahih sawi hani kapi Jises ape i ukek, “Tel masiwi, amuam ti Haeu hani o.” Ape i asoi taliope Jises.

<sup>50</sup> Jises hone i, “Tel lohuk, aile koseniwa waliko ti lehe o aile.” Laha pahi i ape akeni kongini.

<sup>51</sup> Tel ti tesol kahikahi Jises waxi tea ngol weluwelun ape i tai koti haputa taxingi tel unau tel masiwi tapein ti hukuminiai Haeu ma seilon.

<sup>52</sup> Jises hone i, “Hana aliakewa tea ngol haniwa he ingan. Seilon teka laha hil ani ngol, laha mat alia ti ngol.

<sup>53</sup> Oheak o kum tioi ka nga pon kameiai huhual ti tel Tamak Haeu ape i pon hamosu hanima nga lawalawai teka engel ti hile?

<sup>54</sup> Tuahe na Haeu aile ukek ien, kakain ti kakai Haeu kaxiwen i kum sohot poponowi.”

<sup>55</sup> Jises hone teka seilon, “Amuto nahih het-ekiema paumuto ti hile waxiak hanowi ka nga seilon lenginean. Lawe ngain nga to hahanau teka seilon leili Ingi Haeu tuahe amuto tai pahi nga lokon ien.

<sup>56</sup> Tesol waliko ie i sohot hapoponowiai kakain ti teka kuluiwai kakai Haeu taiwen.” Lokon ien hatesol kahikahin kiliwau salili i.

*Teka masiwi ti teka Ju sului Jises*

*Mk 14:53-65; Lk 22:54-55, 63-71; Jn 18:13-14, 19-24*

<sup>57</sup> Teka seilon laha akeni kongini Jises, laha ati i hani tehu ingi Kaiapas, tel masiwi tapein ti hukuminiai Haeu ma seilon. Teka hanau nauna ti Moses ma teka masiwi liai hoi laha apupuha ien.

<sup>58</sup> Pita nahih otioti Jises tamus hani mate ingi Kaiapas. I to akati tesol peteniai Ingi Haeu. Pahan i paxai waliko tenen na i sohot hani Jises.

<sup>59</sup> Kaiapas ma teka masiwi liai ti teka Ju, laha upiup teka seilon na laha aile kakain puputa ti suluiai Jises lehe waxi laha telei.

<sup>60</sup> Kilan seilon laha nahima tuahe kakaiialaha i kum pon suluiai Jises. Tapeinan hua seilon nahima ape lalu ukek,

<sup>61</sup> “Tel seilon ie ukek ka i pon toi hamananai tehu Ingi Haeu ape hatuhi aliakean leili ngain toluhu.”

<sup>62</sup> Kaiapas tua ape i hone Jises, “Huhua seilon ie susului o. Hina kakaiam?”

<sup>63</sup> Tuahe Jises tai wix pahoi.

Ape Kaiapas hone ulei i ukek, “O tuohawa ti puli Haeu na masin o Kraiss tel Nati Haeu.”

<sup>64</sup> Jises kakane i, “Masin ti o kakawen. Nga kaxi hani amuto hatesol, imuh amuto ningahi nga tel Nati Seilon toto he tepaun min manau ti Haeu tel pohen wanen, neinia i seilon kapin ma ti nga luainima he maun.”

<sup>65</sup> Ti Kaiapas hongoa, i leng lexi tehu puxuaun ape i ukek, “Kako kum ngah ulea seilon suluian. Amuto hongoen i ukek i tel Nati Haeu.

<sup>66</sup> Amuto namilo i kako aile ukek ia?”

Laha pahoi ukek, “I aile hawane kakain lialun. I kak hahataehu Haeu. Pon hawane telei i.”

<sup>67</sup> Ape laha pukeini kawan ma xai i. Tek a uke maia talini puxui pulan, teka laha tapahi i ape ukek,

<sup>68</sup> “Na o Kraiss, tilawa aita tel tapahi o!”

*Pita ukek i kum tioi Jises*

*Mk 14:66-72; Lk 22:54-62; Jn 18:15-18, 25-27*

<sup>69</sup> Pita toto tutuen mate ingi Kaiapas ti tel hehin unaui Kaiapas nahima ape i ukek, “O tin tel kapi Jises ti Galili!”

<sup>70</sup> Tuahe Pita ase he matalato hatesol, i ukek, “Nga kum tioi waliko tenen o kakak.”

<sup>71</sup> Ape i nahih hani onote aweing ti melal. Tel hehin liai unaui Kaiapas ningahi i ape hone teka seilon ien, i ukek, “Tel seilon ie i tin kapi Jises ti Nasaret.”

<sup>72</sup> Pita ase ulea, i ukek, “Kuinake, nga kum tioi wanen tel seilon ien.”

<sup>73</sup> Tai kue, teka seilon laha tutu ien nahih hani kapi Pita ape laha ukek, “Salan wanen o tel ti lato, kinaxom kaxi ka o ti Galili.”

<sup>74</sup> Ape Pita ukek, “Nga tuoha hawane. Na nga puputa, Haeu axi nga kawatan. Nga kum tioi wanen tel seilon ien!” Tataen ien wanen tok mom wawan kokoini.

<sup>75</sup> Ape Pita nameni kakai Jises ti i ukek, “Imat ti mom wawan kokoini, o putini ka o kum tioi wanen nga uke he toluhu.” Pita nahih salili laha ape i tang tahane hawane.

## 27

*Laha ati Jises hani kapi Pailat*

*Mk 15:1; Lk 22:66-71*

<sup>1</sup> Ti pate letu wanen teka masiwi tuah ti huku-miniai Haeu ma seilon, ma teka masiwi liai ti teka Ju, lato aile ngah namil ti sale teleiai Jises.

<sup>2</sup> Lato hone teka unaulato xinotian ape laha ati i hani kapi Pailat, tel ti teka masiwi ti Rom.

### *Sale matei Judas*

<sup>3</sup> Ti Judas, tel i hangaini Jises, upia tunahiwa ka teka masiwi ti teka Ju sului Jises waxi laha telei, i towiahu namilon ape i kau atoheni aliake tesol 30 moni silva hani laha.

<sup>4</sup> Ape i ukek, “Nga aile hawane saun lialun nake nga hangaini tel seilon tenen tap teik waliko lialun na i ailewen ape lehe amuto telei.”

Lato pahoi i ukek, “Kalahai lehe amite nam waxi? Ien soxiam.”

<sup>5</sup> Judas towi lioiwa tesol moni leili tehu Ingi Haeu ape i nahih hakea telei aliake i.

<sup>6</sup> Tesol masiwi waxiwa tesol moni ien ape lato ukek, “Te se moni ti i kahuiwen teleiai tel seilon. Lialun na kako hana hani kapi moni ti Ingi Haeu.”

<sup>7</sup> Imuh lato xinoti tenen namil ukek lato hapuasa teik moni ien kahuiwai teik pekeun ti teka seilon laha tanomi salek. Tesol ien lato hani ti-hinia seilon ti xux liai.

<sup>8</sup> Hanima aope seilon axai teik pekeun Pekeun ti Kaka nake kahuan teik moni ti kahi teleiai seilon.

<sup>9</sup> Aile ape waliko ti Jeremaia tel kuluwai kakai Haeu kakawen sale Jises i sohot poponowi. I ukek, “Laha uke tesol 30 moni silva,

lapan ti teka seilon ti Israel kolongeniwen kahi teleian.

<sup>10</sup> Ape laha hapuasa tesol moni ien kahuiwai teik pekeun

ti teka seilon laha tanomi salek,  
masin ti tel Masiwi honewen nga.”

*32:6-9)*

*(Jer*

### *Jises tu mate Pailat*

*Mk 15:2-5; Lk 23:1-5; Jn 18:28-38*

11 Jises tutu mate Pailat ape Pailat kamei i ukek, “Nakon o se tel masiwi tapein ti teka Ju?”

Ape Jises pahoi i ukek, “Se, masin ti o kakawen.”

12 Tuahe ti teka masiwi tuah ti hukuminiaia Haeu ma seilon, ma teka masiwi liai ti teka Ju kak hohokai i, Jises tai wix pahoi.

13 Ape Pailat hone i ukek, “Nakon o hongohong hatesol waliko ti laha kak susului o?”

14 Tuahe tap tenen na Jises kakawen, aile ape Pailat pate i ongaini.

### *Laha eliel tahi hakeai Jises*

*Mk 15:6-15; Lk 23:13-25; Jn 18:39-19:16*

15 Leili taun ti Pasova, tehu angiaian lalap ti namenai ngain ti Haeu waxi aliake teka Ju ti Igip, saun ti tel masiwi Pailat i ahuti tel ti teka kalabus, tel ti na teka seilon pahalaha.

16 Ti lokon ien tel seilon leili kalabus axan Barabas, axan lalap wanen ti ailei waliko lialun.

17 Ti teka kilai seilon apuhawa, Pailat kamei laha, “Pahamuto nga ahuti hani amuto Barabas ka Jises, tel laha ukek Krai?”

18 Puki i tioi hawane ka teka masiwi ti teka Ju atoheni Jises hani kapin nake lato watakai kilan seilon sameni i.

19 Lokon ti Pailat hong papaxai kakain, tel axoan hakau hani i teik kakain i ukek, “Kum aile halialu tel seilon ien. Tap tenen waliko lialun na i ailewen. Ipong tehu tamusuen, nga tunahi paxangongo tenen lialun wanen sale tel seilon ien.”

20 Tin lokon ien, teka masiwi tuah ti hukuminiaia Haeu ma seilon, ma teka masiwi liai ti

teka Ju hahika teka seilon kameiai Pailat ti ahutiai Barabas ma teleiai Jises.

<sup>21</sup> Tuahe Pailat kamei ulei teka seilon, “Pahamuto nga ahuti hani amuto aita?”

Ape laha pahoi i ukek, “Barabas!”

<sup>22</sup> Pailat kamei laha, “Ape nga aile la hani Jises tel laha ukek Krais?”

Laha hatesol pahoi i ukek, “Teleiwa i! Tahihakeawa i he kros!”

<sup>23</sup> Ape Pailat kamei laha i ukek, “Nake lahan? Waliko la lialun na i ailewen?”

Tuahe laha tilol eliel hawane ukek, “Tahihakeawa i he kros!”

<sup>24</sup> Ti Pailat paxaiwa ka laha kum hong waxi i, ma tehu lape hile uke i sohot wasole teka seilon, i waxi kan ape nuhi minan he pulalaha. I ukek, “Tap teik kawatan tetak ti sale matei tel seilon ie, ien se waliko ti amuto!”

<sup>25</sup> Laha hatesol pahoi i ukek, “Hanima amite ma natumite kaui kawatan ti matean!”

<sup>26</sup> Ape salan, Pailat ahuti hani laha Barabas ape i hone teka unauan hetiai Jises. Imuh i hani laha tahi hakeai Jises he kros.

### *Teka seilon ti hile soxeni Jises*

*Mk 15:16-20; Jn 19:2-3*

<sup>27</sup> Imuh teka unau Pailat ti hile ati Jises hani leili tehu ingi Pailat ape lato tiloi tesol tuaulato.

<sup>28</sup> Lato xaxaweni puxuaun ape puxui i tehu puxux weluwelun kakai ati polun.

<sup>29</sup> Lato alingini ngaxe au ape nihini hana hani he patun. Lato waxi teik pata ape hana hani he tepaun minan manau aile hanowi i tel masiwi.

Lato lokuha hanowi ka lato lotui i. Lato ukek, “Tel masiwi tapein ti teka Ju tap tahi mateam!”

<sup>30</sup> Lato pukeini i ape waxi teik pata he minan ape lato xai patun.

<sup>31</sup> Ti lato heisawa soxenian, lato naxi xaxaweni tehu puxux weluwelun ape puxui aliake i puxu-aun. Lato ati i hani tesol ti lehe lato tahi hakea i hani he kros.

*Tahi hakeai Jises he kros pata*

*Mk 15:21-32; Lk 23:26-43; Jn 19:17-27*

<sup>32</sup> Ti lato nanahiwa, lato apatuini tel seilon ti Sairini axan Saimon ape teka seilon ti hile lungei i kaui teik kros ti Jises kakau. <sup>33</sup> Lato tahia hani tesol axan *Golgota*. Teik kakain ien ukek, “Tetesol tanoman masin kui pati seilon.”

<sup>34</sup> Ti ien lato axi unumi Jises waen tenen maxa-ian ti hamongai moloan. Ti i namihini laliwa ape i kum unumi.

<sup>35</sup> Lato tahi hakea i hani he teik kros pata ape lato halokeni satu ti upiai tetel i uke tetenen ia ti tesol sose Jises.

<sup>36</sup> Muhin lato to paxai peteni i.

<sup>37</sup> Teik kakain ti suluian lato tahi hahakea onote patun i kak ukek,

“IE SE JISES, TEL MASIWI TAPEIN TI TEKA JU.”

<sup>38</sup> Imuh lato tahi hakea hua seilon lialun xohixohin kapi Jises, tel papan sai manau ape tel sai kalamau.

<sup>39</sup> Teku seilon ti laha nahiwa nahima laha tohutohuini patulaha ape laha kak soxeni Jises,

<sup>40</sup> “O ukek o toi hamana tehu Ingi Haeu ape o atai aliake leili ngain toluhu! Na masin o tel Nati

Haeu, huali aliakewa o ape mosulih ti he teik kros ien!”

<sup>41</sup> Teka masiwi tuah ti hukuminiai Haeu ma seilon, teka hanau nauna ti Moses ma teka masiwi liai ti teka Ju, tin laha kak soxeni i ukek,

<sup>42</sup> “I huali seilon liai tuahe i kum pon huali aliakean! Nakon i tel masiwi tapein ti teka Israel? Na masin i mos ti he teik kros aope, kako soh tetan!

<sup>43</sup> Na masin namilon xoxoan ti Haeu ma salan ka i Natun, kako paxaimu na Haeu pahan i huali i aope!”

<sup>44</sup> Huhua lalu akeak kapi Jises, tin lalu kak soxeni i.

### *Matei Jises*

*Mk 15:33-41; Lk 23:44-49; Jn 19:28-37*

<sup>45</sup> Ti lape ngain, hatehu xux i tilok ti leili aua toluhu.

<sup>46</sup> Ti 3 kilok alohah, Jises tilol eliel hawane, “*Eloi, Eloi, lama sabbatani?*” Teik kakain ien i ukek, “Haeu tetak, Haeu tetak, nakon lahan o lioi hawane nga?” *(Ps 22:1)*

<sup>47</sup> Teka seilon ti laha tutu ien laha hong ape laha ukek, “I titiloi Elaija!”

<sup>48</sup> Tel ti lato kiliwawa ape waxi teik maia. I xomi hani waen wangingian ape i hana hani tumi teik pata. I tulini hani he awe Jises lehe waxi i sumuxi.

<sup>49</sup> Tuahe tesol liai ukek, “Nutomu, kako paxaimu na Elaija luainima hualian!”

<sup>50</sup> Jises ausini eliel hawane ape i mat.

<sup>51</sup> Tataen ien wanen Haeu lexi teik maia i akeak leili tehu Ingi Haeu, ti patul hani taen itan. Xux nua ape pot lalap takel.



<sup>52</sup> Amal hea ape teka kilai seilon ti Haeu laha matewen laha xahat alia.

<sup>53</sup> Laha salili amal ape muhin ti Jises xahat ali-awa ti matean, laha soh hani Jerusalem ape kilan seilon ningahi laha.

<sup>54</sup> Lokon ien, tel masiwi ti teka seilon ti hile ma tesol unauan to paxai pepeteni Jises. Ti lato ningahiwa xux i nuea ma hatesol waliko ti i sosohot, lato mamata hawane ape lato ukek, “Salan wanen i Nati Haeu!”

<sup>55</sup> Kilan hehin laha tu siasia papaxai waliko ti i sosohot. Lato kahitima Jises Galili ngahatian.

<sup>56</sup> Leilolato se Mary Magdalen, Mary tel tini Jeims ma Josep ma tel tini Jeims ma Jon tetel axoi Sebedi.

### *Tihiniai Jises*

*Mk 15:42-47; Lk 23:50-56; Jn 19:38-42*

<sup>57</sup> Ti ape alohah, Josep tel seilon kilan wanen soxi, i nahih hani kapi Pailat. I ti tehu taon axan Arimatea ma tel ti teka kahikahi Jises.

<sup>58</sup> I kamei Pailat na i waxi auni tupui Jises. Ape Pailat hone teka unauan haniai Josep tupui Jises.

<sup>59</sup> Ti Josep waxiwa, i puxui talini i teik maia haun weluwelun.

<sup>60</sup> I hana tupui Jises hani leili tehu amal, kemuk teka unauan tanomi he pot patul ti hepekeun. Muhin i hulini tehu pot lalap tiehiai tewau wal ti tesol amal ape i nahih.

<sup>61</sup> Mary Magdalen ma tel Mary liai, lalu toto onote tesol amal papaxai waliko ti i sosohot.

### *Teka unauai Pailat peteni amal*

<sup>62</sup> Ti ngain liai telao, tehu ngain ti Sabat, teka Parisi ma teka masiwi tuah ti hukuminiai Haeu ma seilon, lato apuha hani kapi Pailat.

<sup>63</sup> Ape lato ukek, “Amite nameni ka ti lokon tel seilon ti puputa i moihin tutuen i kak ukek, ‘Nga xahat alia muhi ngain toluhu.’

<sup>64</sup> Amite kamei o honei teka unauam ti peteni aluiniai amali Jises leili ngain toluhu, lehe teka kahikahin kum pon xuinau tupuan ape lato kum hone teka seilon ka i xahat aliawen. Tehu puputa ie i pamu lialuan, i xoini tehu imat ti i ukek i Krai.”

<sup>65</sup> Pailat hone lato ukek, “Waxiwa teka unauak ape peteni aluini hawanewa amali Jises.”

<sup>66</sup> Ape salan, lato nahih hana ngah kikilam he tehu pot lehe lato tioi na hina seilon tohongi lali laha soh. Ape teka unaui Pailat to paxai peteni.

## 28

### *Jises xahat ti matean*

*Mk 16:1-8; Lk 24:1-12; Jn 20:1-10*

<sup>1</sup> Muhi telao Sabat, pate letu ti Sande, Mary Magdalen ma tel Mary liai nahih paxai amali Jises.

<sup>2</sup> Hepekeun i nuaa eliel hahutuia hawane. Tel engel ti Haeu mosulih ape i hulini xaxaweni tehu pot laha uke siponiai amali Jises ape i to patul he tehu pot.

<sup>3</sup> Kawan i xepaxep hawane hanowi usil, puxu-aun papaxaxun wanen hanowi ole olawik.

<sup>4</sup> Teka peteniai amali Jises mamata xexex hawane ape lato put hani itan masin seilon tenen maten.

<sup>5</sup> Tel engel hone huhua hehin, “Kum maamata. Nga tioi ka amulu paxai sasakal Jises, tel laha teleiwen.

<sup>6</sup> I ape tap ie. I xahatawen masin ti i kakawen imat. Nahima paxai tesol laha hahanopi i.

<sup>7</sup> Ape nahih koseawa honei tesol kahikahin ka Haeu xahateni aliakewen i ti matean. Jises nahih imat ti amuto hani Galili ape amuto ningahi i ien. Nameniwa waliko ti nga kaakane amulu.”

<sup>8</sup> Talowian wanen lalu nahih salili amali Jises. Pate lalu mamata hetekie amuam ape lalu uke ani kikiliu honei tesol kahikahin.

<sup>9</sup> Ti he aweisal, Jises sohot hahutuia hani kapi lalu ape i ukek, “Amuam lalap haniwa amulu!” Lalu kiliwau lokuha akeni aen ape lalu lotui i.

<sup>10</sup> Jises hone lalu, “Kum maamata! Honewa tesol kahikahik lawak lato nahih haniwa Galili lehe lato ningahi nga ien.”

### *Puputa ti teka peteniai amali Jises*

<sup>11</sup> Ti hua hehin nanahiwa he aweisal, teka peteniai amal alia hani Jerusalem kakanei teka masiwi tuah ti hukuminiai Haeu ma seilon waliko ti i sosohot.

<sup>12</sup> Ti lato hongoa, lato apuhini hatapo teka masiwi liai ape lato taneni apeseni kakain. Lato hani teka peteniai amali Jises moni lalap wanen.

<sup>13</sup> Lato ukek, “Amuto kaxiwa ka tesol kahikahi Jises nahima ipong ti amuto mamatih ape xuina tupuan.

<sup>14</sup> Ape na Pailat hong tunahi ka kumahe amuto peteni aluluini, amite tukei awamoto.”

<sup>15</sup> Teka peteniai amali Jises waxi moni ape lato puas usi waliko ti teka masiwi kakanewen lato.

Ape kakaialato i sawat hatapo hani teka Ju han-  
ima tataen tetelao.

*Jises talo tesol kahikahin hani lawe xux*

*Mk 16:15-18; Lk 24:44-49; Jn 20:19-23; Apo 1:6-8*

<sup>16</sup> Tesol huopanim tel kahikahi Jises nahih hani  
he tehu maunten leili Galili, tetesol Jises hone lato  
atengian.

<sup>17</sup> Ti lato ningahiwa i, lato lotui i tuahe teka ti  
lato kapaxe ka i Jises.

<sup>18</sup> Jises xohi hani kapi lato ape i hone lato ukek,  
“Haeu hanawen nga Masiwi ti lawe waliko ti patul  
ma tehu pon ie.

<sup>19</sup> Aile ape nahih haniwa lawe xux ape aile  
hasohotua teka seilon kahikahik. Baptaisiwa laha  
hahitake axe tel Tamak Haeu, nga tel Natun ma  
Holi Spirit.

<sup>20</sup> Ape hanaua laha usi hatapoi waliko ti nga  
honenwen amuto. Nga kakane hawane amuto, nga  
kapimuto lian tehue.”

**KAKAI HAEU**  
**The New Testament in the Seimat language, The**  
**Ninigo Islands, Manus Province, Papua New Guinea**  
**Nupela Testamen long tok ples Seimat, Manus Provins,**  
**Niugini**

copyright © 2012 Wycliffe Bible Translators, Inc.

Language: Seimat

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-14

---

PDF generated using Haiola and XeLaTeX on 28 Dec 2024 from source files dated 31 Aug 2023

9fa179b2-dd20-5dbd-9745-1fb6d5f9b415